

سالفة وقصيدة

الجزء الثالث

الراوي

محمد بن علي الشهران

العبيكان
Obëkan



نيابة عن صاحب السمو الملكي ولي العهد

صاحب السمو الملكي الأمير سلمان بن عبدالعزيز - حفظه الله -

يسلم المؤلف شهادة شكر وتقدير لمساهمته في حفظ المصادر التاريخية والوطنية

ودعم جهود دائرة الملك عبدالعزيز - رحمه الله - في هذا المجال.

وذلك في عام ٢٠٠٣م.

obeikandi.com

المحتويات

الصفحة

الموضوع

٧	المقدمة
٩	اللي بيينا عيت النفس تبغيه
١٥	مشعان وعبد المعين
٢١	البشت البدرى
٢٧	شديد البدو
٢٧	وصف الجسم
٤٥	مكانة الأخ
٥٥	ابن مزيد وابنائاه
٦٣	الخليفي شاعر قطر
٧٩	قرصة الحبيبة
٨٣	ابو ماجد وابنه
٩١	صياح يتيم
٩٧	العجيمي عند الديان
١٠٧	الأم وزوجة ابنها
١١٥	من تاب تاب الله عليه
١٢٣	الشاعر الغزلي محمد الفيحاني
١٢٩	الزواج من أجنبية
١٣٧	قصة بداح العنقري

- ١٤٣ من قصائد الغزل الجميلة
- ١٥١ الجار ولو جار
- ١٥٧ تمر الصوام
- ١٦٢ القهوة
- ١٧٢ بوادر الشيب
- ١٨١ يا ناس خلوا كل واد ومجراه
- ١٨٧ حسن الوفا
- ١٩٢ من ضحايا الغرام
- ١٩٩ مغيب القمر
- ٢٠٥ حرص الآباء على الأبناء
- ٢١٢ غربة دباس
- ٢٢٧ الصقر الجريح
- ٢٣٣ احد عشاه القرص ومفتح الحيل
- ٢٣٧ الغويش اليتاما



مقدمة

بعد أن لاقى الجزء الأول والثاني بطبعاتهما المتعددة الرواج الكبير غير المتوقع وتلقاه القارئ العزيز بقبول منقطع النظير رأينا في هذا كله ما يدفعنا لإصدار الجزء الثالث من الكتاب (سألقة وقصيدة) على نفس النهج والأسلوب نفسيهما اللذين انتهجناهما في الجزء الأول، وهو أن الرواية تقرأ، وكأن الراوي يلقيها على مسمع القارئ، حرصاً منا على امتاع القارئ العزيز، ونكرر القول إن في مثل هذا الأسلوب متعة وسهولة في متابعة القصة - أو بتعبير الكتاب السألقة - وزيادة في اجتذاب انتباه القارئ العزيز؛ خاصة من محبي ومتذوقي هذا الفن من الرواية وفن الإلقاء، ولا شك أن سماعها من الراوي بصوته أبلغ في إيصالها إلى المستمع وأكثر متعة ومتابعة إلا أن اتباعنا لهذا الأسلوب من العرض قربنا إلى ذلك بالقدر الذي يكفل للسألقة بأن تحظى بالقبول والرضا من قبل القارئ العزيز.

وأود الإشارة هنا إلى أن هذه السوالف ليست فقط للتسلية بل إنها لتبصير الأجيال وخاصة الشباب منهم؛ لينهلوا مما فيها من عبر وقيم وحث على مكارم الأخلاق، والتحذير من بعض السلوكيات والممارسات الخاطئة، ففيها توجيه غير مباشر لهم ولغيرهم.

ونكرر تأكيدنا وتأكيد الناشر أن في مثل هذا الأسلوب محاولة لإرضاء عشاق هذا الفن، وليس كما أشار بعضهم بأن الأسلوب المتبع يتعارض والحفاظ على اللغة العربية والحرص على الذود عنها، فلم نك يوماً من الأيام دعاة هدم للغة أو لإضعافها، وحاشى لله أن نتجرف إلى هذا الدرك من التوجه والمفهوم،

ولو رأينا أن في هذا القول - ولو شيئاً يسيراً - من الصحة لتوقفنا عن إصدار الكتاب، ولكننا أول المنافحين والذائدين عن لغتنا الجميلة.

إن ما يهمننا هو الاستمرار بتقديم ما يرضي عشاق هذا الفن وهم كثر، والذين باقتنائهم للأجزاء الثلاثة عبروا عن ثقتهم بالمؤلف والناشر؛ مما كان له أطيب الأثر وأحسنه.

لهم منا جزيل الشكر والامتنان، والله ولي التوفيق.

المؤلف

محمد بن علي الشرهان



اللي بيينا عيت النفس تبغيه

هذه السالفة جرت على الشاعرة المعروفة/ نوره بنت حوشان بن علي بن دخيل الله الحوشان من أهل عين الصوينع (بمنطقة السرّ) في عاليه نجد عاشت في بداية القرن الرابع عشر الهجري .

تزوجت من الشاعر/ عبود بن علي بن سويلم العازمي وهو قريب لها ولكن بعد مضي الزمن وانجابها منه بولدين وبنت حصل بينهما اختلاف بسبب حرارة زوجها فاستعجل وطلقها طلاق لا رجعة فيه إلا بزواج من آخر

فندم ندم شديد بسبب استعجاله في أمر الطلاق (وهذا شأن كثير من الشباب هداهم الله هذه الأيام) .

والطلاق أبغض الحلال إلى الله سبحانه وتعالى الحاصل أن الزوج تلخبطت أموره في مزرعته التي كان عايش معا فيها وانحاس وتعطل كثير من الأعمال التي كانت هي قائمت بها هي مثل حلب المنايح من أغنام وبقر وملاحظة أمور المعيشة في بيت المزرعة لا سيما وأن المزرعة خارج القرية لأنها بعد الطلاق رجعت لبيت يعودلها بعد والدها في الديره المهم أن الزوج انحاست أموره وصابه مثل الهيام عليها وكثرت عليه الهواجيس والانزعاج والهموم وصار يطلع للجبال اللي حول المزرعة ويهوبل ويغني على فقدها ويتمنى لو ترجع له ويخاف يأخذها غيره ويمسك عليها وهو هايم بحبها وحتى هي كذلك تبيه بس المشكلة الحرارة والعجلة منه دائماً وخاصة في النهار ولا هو من العصر ووراء حليل تعرفه هي . ومع طول

الغياب وعدم شوف لها صار يغني فيها ويقول :-

يامل قلب حب نوره تغشلاه

يومي به اوماي الهواء للشراعي

ان نمت عندي وان تنبتهت مالمقاء

ما اسج عن طرياه لو كان واعى

قلبي غداء به داه ما يعرف دواه

وان جاه من ينهاه طقه جلاعي

عليك يا للي كن وضح ثناياه

بردي قنوف يوم هل النواعى

ياللى تعرف الحب هو ويش معناه

هو خلف ولا ولف ولا انه زاعي

ثم تمضى الأيام وهو لا يزال في حسرة وفي حيرة من أمره ما يدري وش

يسوي يحاول يقابلها عند سوق في مدي عن الدلو إلى جت تروي يسلم عليها ما

ترد تسفه ما ترد عليه تنطنش عنه تبي علشان يستأدب ولا يتعجل في أمور الطلاق

الطلاق ما هو ب لعب (مثل السيف ما ينلعب به).

ثم مضت الأيام عليه وهو لا يزال في حسرة وحرقة وذات يوم تعلق إلى

رأس جبل حول مزرعته وأخذ يغني هذه الأبيات على فقدته لنوره ويقول :-

أمس الضحى عديت راسي الجذيبه

لا عاد مرقها حضر كل ما غاب

الدمع من عيني تزايد صبيبه
 صبيب محناب تعلاه سكاب
 ان مت يا اخواني تراني صويبه
 تراي عند منقش الكف بخضاب
 زاوي حشاه من البتوت اللبيبه
 مستقطعن الزين عن تلح الأرقاب

اعزائي

ماش كل هالقصيدة وها التوجد عليها ما فاده بشي يعني ما نفعه القصيد ولم
 يرد له غايب .

نوره الحوشان مستقرة في بيتها بالديره وعيالها عندها حوشان وطامي وميره
 وحرمة مليانه عقل ورزانه وذات منطق جميل وحشيمه وفيها دين وعطف على
 كبار السن والفقراء والمقطوعين وعلى جانب من الوقار والهيبه والدين وجميله
 وحسنه المظهر وصاحبه دبره جيده في بيتها وعيالها وهذه الصفات هي المطلوبة
 والمرغوبه عند كثير من الناس العقلاء فتقدم لها الكثير من الناس يخطبونها
 للزواج خاصة كبار السن من أهل ديرتها لكن رفضتهم بامل العودة إلى زوجها
 لأنها هي تحبه بعد وتبيه .

المهم أوزها هاك الشايب من أهل الديره ويتردد عليها وعلى بابها ويشيل
 عيالها ويحببهم ويجيب لهم ولها هديا ويشيل البنية الصغيرة ويقول وهي تسمعه
 من وراء الباب يحليل ذا لبييه يا حبني لها وهو يكذب ابغض ما يشوف البزران

لكن يبي لين يتملك بس شايب قضع كنه (عرق ارطاة) لكنه نشيط وغني عنده تمر وعيش ونخل ويقولها والله أني لأغنيك أنت وعيالك وأنا أنزل عليكم واطلل على العيّل وأصير في مكان أبوهم الله لا ييتمهم (كذوب الخبيث) بس يبي لين يقطب يدها وتطيح في حبالته ثم يسوم عيالها سوء العذاب . يجمع روسهم بقفاء اصبعه إلى مشوا قدامه . صاير ملمسه ملمس داب كل يوم يتردد عليها وينقل عليها من نخله مرة خضره ومرة عيش ومرة تمر ومرة فرايح لها ولعيالها ويقولها شورري عليك خذيني قبل اهون قالت له ابرك ساعه ان تهون طس في بليس انأ ابعود على رجلي أنشاء الله قم بس فارق عن بابنا وقالت ثلاث آيات بعدها اقتنع انها صدق ما تبيه تقول :

قلبي يحب صويحبي مير يكوين

مكوى يبين الجرح به قبل دمه

ابغيه لو هو يطبخن ثم يشوين

يبرد لهيب القلب ضمه وله

يا حلو قولة هيش يا ويش تبغين

احلى من الورع المغاغي على أمه

فلما سمع منها هذه الأبيات اقنع تماماً وعرف ان مالها رغبة في الزواج من غير زوجها عبود بن علي بن سويلم بتاتا ما تبي إلا هو فرجع الشايب ادراجه ولم يعود عليها .

زوجها الاساسي عبود بن سويلم لما قطع الياس منها وعرف انها ما رباح ترجع له الا بزواج من آخر أو عز الي ولد أخوه محمد بن سويلم واحد اسمه

خالد بن محمد بن سويلم وطلب منه انه يأخذها مؤقت حتى يحللها له وفعل ولكن بعد ما تزوجها خالد رغب فيها وأمسكها ولم يطلقها وهي ما تبيه بعد لكن علي أمل أنه يطلقها لكنه أمسك بها وحطها في مزرعة قريبة من مزرعة عمه (اللي هو زوجها السابق).

وكلما مرت رايحه للديره جاء بها الطريق علي مزرعة زوجها السابق عبود ابن سويلم اللي هي تحبه وتبنيه وتمناه وذات يوم تعلت علي جبل يطل علي مزرعة زوجها السابق متظره أولادها يسلمون علي أبوهم عبود بن سويلم وشاهدة المزرعة والسواني وهي تصدر وزرعه اللي هو زارع والمعاويد اللي تصدر وتسقي الزرع والمنايح اللي هي تحلبهن قبل والنخل والمكان وتذكرت وتمنت الرجوع واخذها الحنين لمحلها اللي عاشت فيه مدة طويلة مع زوجها الأول عبود بن سويلم وقالت هذه الأبيات المعبرة عن صدقها لأنه كلما لاقاها في الطريق وسلم عليها ما تقدر ترد عليه وتقول :

يا عين هلّي صافي الدمع هليه

والى قضى صافيه هاتي سريه

يا عين شوفي زرع خلك وراعيه

هذي معاويده وهذي قليبته

منول خلي قريب وأنا أرجيه

واليوم جيتهم علينا صعبة

إن مرني بالدرب ماقدر احاكيه

مصيبة ياكبرها من مصيبة

اللي بينا عيّت النفس تبغيه
واللي نبي عيّا البخت لا يجيبه

هذا البيت الأخير حاول كثير من الشعراء يعبروا بمثل سهولة تركيبه وجزل
معناه فلم يقدرُوا رحمها الله رحمة واسعة يقال انها توفيت عام ١٣٥٥ هـ .
وهذا ما أعرفه عن هذه القصة وبالله التوفيق .



مشعان وعبد المعين

قصتنا جرت أحداثها في جهة بلاد المحاني في الحجاز للشاعر المعروف من شعار عتيبة اسمه عبدالمعين بن ثعلي العتيبي يسولف علينا مرة يمكن قبل حوالي عشر سنين أو أكثر جا في مهرجان الجنادرية والتقيت به أنا وقعدت اسولف معه واسجل منه بعض القصيد وعلمني بالسالفة هذي والقصيدة - الله يذكره بالخير- هو الحين كبير بالسن ويوم يسولف علينا هذيك المرة يقول أن احداث القصة هذي جرت قبل حوالي أربعين أو خمسين سنة خمسين، أول ماطلعت السيارات والونيات اللي يروحون ويسافرون عليها الناس .

يقول حنا في بلادنا بالمحاني طبعاً، هم أهل ملك وأهل نخل ، و القرايا اللي مثل هذي إلى جا وقت الربيع يجون أهل البادية ينزلون حولهم فيقول جا هاك الواحد نزل حولنا من البادية من هالناس وإلى عنده حلال ومال وعنده ماشية وش كثرها والابل حاط لها راعي ، لكن الماشية والغنم حاط عليها بنت له جيدة عن ثلاثة رجاجيل هي اللي تتابع الغنم وإذا جا الصبح تسرح بهن وإذا جا مسيان تهضلهن وتجي البنت للبيت وهي تحس بتعب عظيم إلى رجعت مسيان تسبق الغنم للبيت وإلى جت الغنم منطلقة تبي الماء وتبي الأكل وإلى كلك تأخذ من تاليها وتجدع في أولها وإلى هذي هي واقفة في المدخل تفرز البهم لحالها والغنم لحالها وعلى الطريقة .

المهم هذا شغلها بالاضافة إلى أن أبوها بعد كان يكلفها بترقيع بدود الجمل لأنها جيدة لان جمل الشاوي هذا مع البطا والمشي أحياناً الشداد إلى صار على

ظهر الجمل يصير ما عليه لحم وخفيف كنه (اكس إل) الحاصل إنه إلى جاء مسيان وحط الشداد قامت هي تطوي عليه خرق بحيث أن الخشب ما يأكل من جلد الجمل ويحصل على البنت تعب شديد بالاضافة إلى أنها تحلب الابل، ظفرة ما يحتاج، ومشعان أبو البنت هذي رجال كريم وطيب وشهم وهب ريح حاط له مجلس ويجون يسIRON عليه من أهل الديرة ناس ومن غير الديرة من ربه ومعارفه وحاط القهوة من أحسن شيء الحاصل أن عبدالمعين من ضمن اللي يجون عنده وهو يرتاح مرة لعبدالمعين أول شيء أنه شاعر ورجال رفيق غائين وسوالفه زينة وعلومه غائمة فدايم يجي عنده فجاء يوم من الأيام كن عبدالمعين شاف البنت هذي أكثر من مرة وشاف صفارتها وركضها وأنها هبة ريح وإلى قال أبوها وين اللبن وين الحليب جانبته تركض وجيدة، الحاصل أن عبدالمعين صار له رغبة فيها ويوم جا يوم من الأيام طبعاً هالكلام مبطي قال له يا مشعان أنت حبيب ولحية غائمة ومن عرب طيبين وحناء بعد وأبي يد البنت هذي ابخطبها منك، وقعد يسولف هو واياه وأخذ وعطى وتعرفون موضوع الخطبة تراها تبطي وتطول وبعض المرات ما يصير فيها حكي يصير فيها ملاحظات ومن خلال كلامه هو واياه عرف عبدالمعين أن مشعان طماع، نعم مقصده طمع وش دراه؟

دراه يوم حاكاه من سنهها قال والله البنت هذي أمها مهيب هنيا، وقد تقدم لها ناس واجد يخطبونها وقد جانا فلان الفلاني والتاجر الفلاني وبغى يعطينا وش كثر من الفلوس وجانا فلان ورديناه، عرف أنه من خلال هالهرج والكلام أن كل مقصده طمع وجا عقبها بأيام سهلة يوم درى أن هذا هدفه قام عبدالمعين وحاول أنه يبيع من مقتنياته شيء أما بندق عنده وإلا سيف ما يبيه فحاول أنه

يروح يبيعه ، راح مثل ما تقول جهة الطايف و حاول أنه يبيع من هالمقتنيات و جمع له شيء يسير يرضيه ، راح عبدالمعين و حاول في هالفتره اللي راح فيها يجمع شيء من المال علشان يرضي أبو البنت ، يقول المال ما يهم ، لعله يحصل على هالبنت فراح عبدالمعين في سفرته و طول ، تعرف مثل هالسبع ما يقدر يكسرها لعل الله يجيب له زبون و يبيعها بيعه طيبة الحاصل طول في سفرته هذي و يوم أنه رجع و من بكرة جو رجال مسيرين عليه من ربهه يتقهوون عنده و إلى معهم هذالك الواحد اللي معه و نيت حمر و يبي يسافرون لجهة بعيدة قالوا يا أبو بدر (عبد المعين) نبي نمر في طريقنا هذا على مشعان اللي كان من أول ساكن هنا ، أبو البنت اللي أنت خابر ، قال بتمرونه قالوا نعم قال عز الله أنها سفرة سعيدة ليتني والله معكم لكن ماني بقادر أروح بس ابعطيكم رسالة ، قام كتب القصيدة هذي و أرسلها معهم ، يقول :

يا أهل الويت اللي سرى الليل عجلان

والفجر ما حمر عليهم عموده

بالله عليكم ريضوا لي علشان

اكتب لكم خط عطوني ردوده

وإلى قضيتوا يا طويلين الأيمان

شبووا عليه وزودوا في وقوده

وإن كان مريتوا على دار مشعان

سلم على مشعان ياللي تروده

وسلم على اللي كن خده اليا بان

يشدي للون الورد حمرة خدوده

ورع سليم العرض والعود ريان
كن الكواكب غطس في نهوده
والعود تقليد على عود ريحان
ما طق في غصنه ولا هز عوده
وقل له يقول إن كان يا صاف الألوان
موقفينك بالثمن ومحدوده
والله أن ترخص فيك غالية الأثمان
وماهم كثر المال نقصه وزوده
عز الله أنك مهرة كان لحصان
متيب للتاجر محسب نقوده
ياليت يوم انا معارف وجيران
حبلي وحبلك بالقران معقوده
على طريق الحق والحق سلطان
والحق واضح والدلائل شهوده
هذي سلوم الناس من عصر بدران
سوالف بين الرجال معيوده
واحط لك قصر على جال بستان
فا لقيض فيه والشتاء عن بروده
أبيك ترتاحين عن رعية الضان
وبعير شاوي يرقع قدوده

هذي هي القصيدة اللي أرسلها عبدالمعين لمشعان أبو البنت لكن يوم أنه يقول ورع سليم العرض والعود ريان دائم في لهجه البادية البنت اللي ما تزوجت يطلق عليها ورع صغير السن أو حتى الولد اللي ما تزوج يسمونه ورع لكن عند الحضرة ما يقولون كذا يقولون غرو صغير السن والعود ريان، هذي بس حببت أوضحها، يوم يقول ما طق في غصنه وماهز عوده يعني توها شباب صغيرة مأخذها أحد ويوم يقول بغير شاوي يرقع قدوده هذي شرحتها في بداية القصة اللي هي تقوم البنت تطوي على شداد الجمل اللي يروح عليه الراعي خرق بحيث أنه ما يأكل سنام البعير ويحت شعره من المشي والدرهام .

وبعدين هذا هو الأسلوب اللي يتخذه عبدالمعين في القصيد وهذا هو الصحيح وهذا اللي يمشون عليه الرجال دائم والشعار العقلاء يعرفون يرسلون القصيدة ويعرفون وشلون يطلبون، هذا هو طالبها على السنة المحمدية يبي يتزوجها يقول أبيها بالزواج يقول ياليت أننا معارف وجيران وأنكم قريين حولنا حبلي وحبلك بالقران معقوده، ويقول عز الله انك مهرة كان لخصان يعاني نفسه منتيب للتاجر محسب نقوده يقول اذا اخذها تاجر باكر أخذ عليها وحدة ثانية وضيق صدرها لكن مثله هو اذا اخذها بيحافظ عليها مهوب مطلقها . ويوم يقول على طريق الحق والحق سلطان يعني الإسلام والحق واضح والدلائل شهوده هذي سلوم الناس من عصر بدران^(١) لكن يوم يقول هذي سلوم الناس من عصر بدران يبين أنه قديم سؤالف بين الرجال معيوده وأحط لك قصر على جال بستان

(١) بدران : جدّ البدارين من قبيله الدواسر .

في القريض فيهِ والشتاء عن بروده أبيك ترتاحين عن رعي الضان وبعير شاوي
يرقع قدوده . هذا هو الأسلوب الطيب للشعراء اللي يطلبون بالطريقة الواضحة
والغزل العفيف اللي ما فيه بجاجة ولا فيه قلة أدب ولا شيء مع الأسف فيه
شعراء من عصرنا الحالي ومن هالشباب اللي تشوفونهم الله يهدينا واياهم في
السيارات يضايقون العوائل ويضايقون بعض الأسر في المواقف العامة وفي البر
هذي مهيب من السلوم الطيبة إذا شفت الناس ما بيونك خلاص الواحد يكتف .
افرض أن هالعائلة أو الناس هذولا يقربون لك وش يكون ضميرك ، البنت
المحافظة واللي تحافظ على نفسها وشرفها هذي هي اللي تستحق التكرم وحتى
البنت المتسترة بعباتها ومحافظة على زيتها وعلى شرفها تكون مرغوبة أكثر والزينة
تبين حتى لو هي لابسة يقول الشاعر :

الزين مثل الحيا متبوع
لو تلا الناس يتلونه
والشين مثل الدهر مقطوع
يمشون لين يتعدونه
(وسلامة الجميع).



البشت البدرى

هذي القصة التالية جرت للشاعر محمد بن ناصر بن نويجح - رحمة الله عليه - رجل شهيم وكريم وطيب من أهل حوطة بني تميم توفى عام ١٤١٢ هـ وذكر لي الراوي اللي روى لي القصة بأن بن نويجح كان له أخو اسمه أحمد كان مقيم في البحرين وأخوه أحمد هذا له بيت هناك هو وإيا عياله فمرة من المرات في السنين الأولى يوم كان الناس يروحون ويتسبون يطلبون الرزق ويسافرون ، اتفقوا ناس من جماعته من أهل حوطة بني تميم ومن الحريق راحوا على أساس أنهم يروحون عن طريق البحرين يركبون للغوص وفعلاً تجمعوا وكان على أساس أن محمد بن ناصر يروح معهم لكن ما حصل له هذيك السنة أنه يروح معهم وراحوا الجماعة لحالهم .

وعقب وصولهم للبحرين طبعاً الجماعة يلفون على الناس اللي من جماعتهم في البلدان الثانية فلفوا على أحمد بن ناصر بن نويجح أخو محمد واستقبلهم وأكرمهم وحط لهم عزيمة تليق فيهم وبمقامهم وقعد ينشدهم عن ديرته وعن اللي جوا منهم ووشلونهم عساهم طيبين عاد تخبر اللي يجي من نجد هاك الحين للبحرين ويلقي على رجال مبطي عن ديرته مثل أحمد هذا يفرح بهم وينشدهم ووش جاكم من السيول ووشلون نخل فلان ، وهو بعد اللي يسنعهم يعني مثل ما تقول هو الواسطة بين النواخذة وبينهم يتخير لهم النواخذة الطيبين اللي يوفون بحقوقهم وأنت يافلان اركب مع النواخذة الفلاني وأنتم يا ذولا روحوا مع النواخذة الثاني وفعلاً راحوا وركبوا الغوص ومعروف الغوص ييطون

فيه ياخذون فيه ثلاثة أشهر وذاك الوقت اللي يروح للغوص ويركبه يعتبر مخاطر بعمره اللي يجي من الغوص سالم هاك الحين تعتبر حياة جديدة له وكانت مهنة الغوص هي أسباب المعيشة من مبطي المهم محمد بن ناصر الشاعر اللي عليه الكلام كان في الحوطة وإلى والله مقبل عليهم فصل الشتاء وإلى الأمور ضعيفة هذيك السنة يمكن ما وافق زرع واضطرته الظروف أنه يبيع بشته اللي عليه فحدته الحاجة وباع البشت وبرطيب وشرا بثمانه مؤنه للبيت تمر وعيش لهلبيت والأطفال والنسوان اللي عنده وقام بالواجب فشرا بقيمة البشت المؤنة وقعد ما عليه بشت وهذا الرجال ما صار عليه بشت مع أن الرجال له قيمته ورجال صاحب وقار فصار ما عاد يقدر يدخل للسوق .

من أول اللي ما عليه بشت أو يروح من قرية لقرية ما يقدر يدخل لقرية ثانية وهو ما عليه بشت ، بن نويجح اضطر أنه ما يحضر أكثر المناسبات .

جماعته اللي في البحرين ، اللي ركبوا الغوص عقب ما انتهوا جوا للديرة للبحرين يوم أنهم رجعوا وبيعوا اللي هم حصلوه حصلوا فلوس كانوا يودعونها عند أحمد بن ناصر وأماناتهم ، فعاد يطلعون لنجد يتزهبون اللي بيجي إلى نجد يقعد عند راعي دكان يشتري له هيل وقهوة ولومي ودارسين يحطونها في خرايط وكيس واحد يحط في مزودة وواحد يحط في صندوق يسمر عليه واللي يشري كسوة لأهله والأشياء اللي ما يلقونها إلا في البحرين أو البلدان الكبار من أول ، فأحمد بن نويجح حط لهم عزيمة وداع يوم بغوا يطلعون إلى نجد لكن هاك اليوم قبل طلعتهم ابن نويجح له دكان في البحرين ومحله معروف فيه ورجال ثابت وراسي ومعروف يعتبر من الأعيان هاك الحين فجأ دلال في السوق يخرج من

جهة سوق الزل والبشوت فهناك الدلال معه بشت بدري وبر الأبيض وإلاه بشت طيب ويحرج عليه ووصل حوالي ميتين رويية أو يمكن مية وتسعين أو أن المحرج حده بميتين رويية وإلى ميتين رويية تعادل عشرين ألف هالحين فقاموا الزباين يقلبونه هذا يقول زين وهذا يقول شين وهذا يقول غالي والأولين إلى بغوا يشرون البشت يناظرون أسفله يطققونه يشوفون ليا فيه حرق وإلا شيء فناظره بن نويجح وقلبه وطالعه وإلى والله انه زين ويشريه بميتين رويية ويوديه للبيت وجأ عقبها بيومين سوا لهم عزيمة الوداع بيطلعون للنجد .

وصلوا نجد ووصلوا الحوطة ويقابلون محمد بن نويجح جأ يسلم عليهم يا هلا يا الله حيهم ما شاء الله الحمد لله على السلامة قدوم خير حطوا لهم عزائم لكن لاحظوا الجماعة اللي جاين أن محمد بن نويجح ما عليه بشت ، يا الله حيه كيف أنت وشلونك أخوك أحمد يسلم عليك وين بشتك وري ما عليك بشت قال للي يمون عليه والله الوضع كذا وكذا وجانا وقت ما عندي شيء وبعته وشريت فيه ميانة للبيت ، قالوا زين حظك زين أخوك أحمد قبل يومين أو ثلاثة قبل نجح شاري له بشت وبر بدري طيب حياكته طيبه حياكته يا في العراق أو ايران بشت طيب شاريه بميتين رويية اطلبه منه من أخوك تشنى فيه في هالشتوة ويقوم محمد بن نويجح ويقول قصيدة ويرسلها لأخوه أحمد لكن يوم بغى يكتب القصيدة اختار الذلول اللي تروح بالرسالة هذي وعلم وين هي راعية فيه ومن هو الشخص اللي بيركها اختار له واحد في الديرة هو المرسول حتى ذاكرا اسمه في القصيدة واحد يقال له راشد البوري راشد هذا واحد من أول هو اللي يودي الرسائل والأخبار رجال هميم وسريع يمكن أنه اسرع من (الذي اتش ال) هالحين في توصيل الرسائل الحاصل أنه ذكره في قصيدته وعلمه وين يروح معه ووين ياصل وقال له تمرح في العقير ومن باكر تركب الين تاصل أخوي وقال محمد في القصيدة :

يا راكب حمرا تشاد الغزالي
 وقم الرباع وقافل كنها طار
 قطما الفخوذ وقافل من الخيالي
 والديد منها ما بعد طق بصرار
 مرباعها بالدبدبة من شمالي
 ترعى من الزاهر نبات ونوار
 تسرح من الحوطة سقاها الخيالي
 ديرة تميم اللي حموها من الاخطار
 بني تميم مرخصة كل غالي
 لاجا نهار فيه عج الدخن ثار
 نعم بسادات العرب والرجالي
 زمول التخوت الى تعومسة الاشوار
 من لامني جعله من العقل خالي
 في مدح ربع بالمحاضير صبار
 ركابها البوري هو اللي صفالي
 يفرح بها البطارش الى صار حدار
 يا راشد اقهر بالرسن راسهالي
 انظم بيوت من حشا الصدر واختار
 من كوكب يجهش غدِير زلالي
 ولا استعير من العرب وقم دينار

لا جت مع البطنان وصف الغزالي
 تصفق بخرطوم كما كف بذار
 انص العقير وطقها بالعقالي
 واحمس ودق وقند البن بيهار
 وتسمي برجوى من على الناس عالي
 اجاب يونس وسمعه وسط الابحار
 واركب شراعك واسمته بالحبالي
 يعجبك ضربه مع غزيرات الابحار
 يشق موج مثل وصف الحبالي
 والنوخذة يصلب على الدرب بيطار
 لا جيتواالبحرين وقت الزوالي
 وارتمت من عقب المشقة والاسفار
 انشد عن احمد وين قصره يوالي
 وقل له ترانا لك ضيوف وخطار
 وابشـر ببن رايب بالدلالي
 ومفطح يزعج عليه السمن حار
 يا اخوي لو تدري وتعلم بحالي
 صخفت لي الله يجيرك من النار
 البشت بعته في ميانة عيالي
 وابي العوض يا ريف من جاك زوار

بشت شريته لك يذكر وغالي
 البدري اللي عندكم باسفل الدار
 قل تم يا ريف الركاب الهزالي
 الله يجيرك من صواديف الاخطار
 هذا وصلوا عدنو الخيالي
 على نبي حطه الرب مختار

قال القصيدة هذي وارسلها لاخوه ويوم وصلت لاخوه قام بالواجب وأكثر
 فاخذ البشت وحطه في الشنطة وحط معه سكر وهيل وقهوة وزنجبيل وزعفران
 وطيب عود وكسوة وفلوس وارسلها ووصلت له، والحقيقة هذي من العادات
 الطيبة بين الاخوان.

وفق الله الجميع لما فيه الخير.



شديد البدو

القصة التالية عن شديد البادية ونزولهم وقت الربيع إذا جوا البادية ونزلوا لاجا وقت الربيع يحبون الربيع اللي يكون قريب من الديرة والقري ومن الاماكن اللي يتزودون فيها من الماء والمونة والأكل اللي قريب حولهم وكذلك أهل القري يفرحون بجيتهم لأنهم يجتمعون ويتجمعون وإلى تجمعوا قاموا يسيرون عليهم أهل الديرة من وقت العصر وورى هالدلال وهالقهاوي مشبوبة في بيوت هالشعر، هذولا مسير عليهم فلان وهذولا جاين عندهم الفلان ولا فيه إلا سواليف وعلوم رجال وقصيد وقهوة ومبادل حديث بينهم وعلى طول هالمدة هذي يالفونهم ويصيرون البادية بجيتهم لأهل الحاضرة يصيرون بمثابة الترويح السياحي هالحين يفرحون بجيتهم، فاللي حصل أن مرة من المرات نزلوا فريق من الملابس من الدعاجين من قبيلة عتبية نزلوا في عالية نجد في مكان يقال له الرفيعة حول الأثلة اللي هي ديرة الشاعر المعروف فهيد المجمال، ويوم نزلوا عندهم وجلسوا مدة وقت الربيع والخير وإلى جا الليل سيروا عليهم أهل الديرة وقعدوا عندهم وسواليف وقصيد ومعرفة عاد عقب ما مضت مدة طويلة ويوم بغوا يشدون أهل البادية وكان دايم لابغوا يشدون يتحسفون على شدتهم ودهم أنه يقعدون، و ابن سبيل وش يقول؟ يقول: البدوا هم وضعونهم عذبوا بي، ومرشد البذال يوم يقول:

البدو غربال القلوب المشافيق

يا ما عدت خلافهم واتعبوني

لكن ابجيب قصيدة فهيد بن عويد المجمال يوم شدوا البادية من مكانهم بيون
مكان ثاني وربيع ثاني وقد كان المجمال وقت شدتهم صابين عيونهم رمد ومستكن في
مكان أظلم مده أربعين يوم لين تطيب عيونهم وبعد ما طاب وخرج ففقدهم فهيد وقال :

لا والله اللي شدوا البدو نجاج

كل هدم مبناه وارتد زملة

واتلا الخبر ركبوا على كل مطواع

كل اشقح ماحلا قرينه ورملة

شدوا وطوو وانتووا نجع مربع

وراع المحبة فرق بين شمله

غدا لهم فوق الرفيعة تمزاع

واللي بغى درب فرق وانقسم له

اقفوا كما نوثر ماه وانزاع

برقه يعقرب والسدا يرتدم له

يامل قلب من هوى البيض ينلاع

كما يلوع الصيد رام خطم له

وابكرتاه اللي غدت مالها سناع

واكود دورتها على اللي جهم له

مدري مع اللي يم دخنه بالاسناع

والامع اللي سندوا مستهمله

ماهي لافاطر ولاهي مرجاع

حمرا فتاة وراعيه ماوسم له

ياعود موز ناعم له تمر ياع
 ومنين ماهب الهوا دار حمله
 راعي ثليل فوق الامتان شرع
 سود على بيض العواتق يعمله
 وراعي هدب عين مظاليل ووساع
 خرس عيونه والمحاجير جملة
 عليه ماوقفت عيوني بالادماع
 وهجس ان يلحقني على الطول سمله
 اعوي عوى ذيب بتال العرب جاع
 يقنب الين الله يجيب اللحم له
 حبه يخج القلب مايوجع اوجاع
 لاشك قلبي مودعه بيت نملة

هذي قصيدة فهيد المجمات ودايم الناس ينسبونها للشاعر عبدالله بن سبيل
 لأن نفس بن سبيل في القصيد قريب من نفس فهيد، ولا هنا بعد عن بعض لان
 بين المجمات وبن سبيل قرابة نسب لكن بن سبيل من باهلة والمجمات من تميم،
 واللي حفظ هالقصيدة وخلاها تشتهر بيته الاخير اللي يقول حبه يخج القلب
 مايوجع اوجاع.

أيضا فيه شاعر ثاني مثل سالفه فهيد المجمات جوا ناس ونزلوا حولهم وقت
 زين وربع وإلى جا في هالليل حليب واقط وسمن وفتح الى جا وقته ويسيرون
 الحضر على البادية وجمعة وسوالف فيقول الشاعر سويلم العلي السهلي :

البدو شالوا قربوا كل مطواع
 للشيل ما أحلى جمعته واجتماعه
 شالوا وخلوهن مع الدو قطاع
 والجو صار خلي قفر ارباعه
 عقب النزول وعقب روجات الأقطاع
 اليوم ذيبه لاعه البين لاعه
 واقلبي اللي مع ظعين الظعن ضاع
 ادوره وانا البخيص بمضاعه
 اقفا عليه من المخاليق طماع
 استملكه لا قال له قولاً طاعه
 غرو غزير الزين بخدوده انواع
 الموت بان في جبينه شراعه
 أصفر عفر خده ثقل فيه شعشاع
 تذهيل تنويش يتشاعل شعاعه
 وذوايبه من فوق الارداق شرع
 ثلاثة اذرع قاسهن في ذراعه
 ونواهد مالسها كل رضاع
 ولا قالوا العيل تعاليل رضاعه
 هاض الغرام وهيضه بارق فاع
 جنح الدجى ما احلى رفيف ارتفاعه

برق بغر قنوف الامزان لماع
دوبه الى ما ناض بين شعاعه

جعله على مدهال نقاش الاصباع
يسقي مجاري صلب خده وقاعه

حيث ان به للبدو مشتى ومرباع
نقيض والمصياف شلخ تلاعه

هذي قصيدة سويلم السهلي وفيه قصايد قد وردت عن موضوع الشديد
والروحات مثل قصيدة حاضر بن حضير العازمي يوم شاف ربه شادين من
محلهم وقال :

يا من لقلب كن جوفه جريمة
ما يستريح من الشهر خمسة أيام

لا كن لجلاجه بغيبة نديمة
لجلاج سوق العصر في بندر الشام

قلبي من الفرقا وصل راس تيمة
كنه يشلق ثومته موس حجام

على الحبيب اللي وصوفه عديمة
احسن شخص قاعد وزوله الى قام

اللي عنه شبرين يقصر بريمه
هافي حشا كنه عن الزاد صوام

حبه محني يالعقول السليمة
واظن راع الحب ما هوب ينلام
حي نحوا به جعلهم للثليمة
ما شاوزوني والرضا سيد الاحكام
ليتي حضرته يوم غاب السقيمة
واشاوره قدام تختلف الاقدام

هذي من قصيدة حاضر، ودائما البادية في الشديد وروحهم يحرصون على
أن يبقى لهم اثر طيب عند اهل الديرة وحتى الاحاديث اللي تدور في مجلسهم
اما عن وصف الابل او بيع ومشترى ومقايسة الحضر يعطون البادية تمر وعيش
والبدو يعطون بداله سمن واقط، وفيه قصيدة بعد عن واحد كان خاطب منهم
وراح يمكن يبي يتزهب وغاب عنهم فترة ورجع والاهم شادين وقال :

شدوا فريق نوير واظلمت الدير
واصبحت اصفق على الجرة بكفيني
يا لعن ابوكم شواوي ما بكم خير
قامت تفرق على بيت وييتيني
لا جاء الضحى شد كلن له على حمير
ونفوسهم ما تثور بها البعاريني
وهذي قصيدة عن نفس الموضوع لسويلم العلي يقول فيها :
أخوي طاب الكيف له والتعاليل
صدره وسيع ولا تجيه الهوموي
لا واهنيه له شبوح ومراسيل
وأنا شبوحي ما تجيب العلومي

والبدو شالوا نوهوا بالمراحيل
كل ركض للزمل شلاه تومي

حد يخم العلق يخطيه ويشيل
واحد تقلل ما بقى له لزومي

شالوا وقفن الضعائين زعاجيل
شفوا وهفوا واتقوا بالحزومي

وانا بمرقاب الشقا عيني تخيل
في راس مرقاب طويل الرجومي

اخايل الاضعان واقفت مقابيل
واستقبلن ضعون زاه الرقومي

وأيست من دعاج الاعيان بالميل
مالي على ناب الردايف سلومي

واهجر قلبي كان هو طاول الطيل
عز الله أني مهجل كل يومي

هجال من تاهت عن الذود بالليل
ما بين سرح وارد الجو تومي

والولف بلوا به هبال وهرافيل
ولولا الحيا راعيه يرمى الهدومي

يا لايمي جعله بحسر وغراويل
الله يبلى بالبلا من يلومي

عساه بالدنيا قليل المحاصيل
وبالآخرة يسقى حميم وسمومي

وجدي عليهم وجد من له مواحيل
حيل وخلفات تدوس الوسومي

وعشاير شقح تلاد ومخاليل
ومعهن على شقران فلو قحومي

سبر لعجمان على كنس حيل
شيب المتون عيونها تقل لومي

كل ابلج ضاري بكسب التنافيل
ضرما يبون المال ما فيه لومي

وغارت عليه القوم خيل ورجاجيل
وطيح على فلو حشور عزومي

واقفى يرادي به عن الخيل حلحيل
شذر حذر تالي شيوخ قرومي

صله وخلي العج مثل المخايل
عج الرمك والبل مثل الغيومي

بي يداري هرجة القول والقييل
احضر حياه ولا بنفسه وهومي

وطيح له اللي ضاري بالمحاويل
وثارت الى ان حذاه مثل النجومى

واقفى مذل مع دكاك الغراميل
يفرك يديه ومر كبده يزومي
عقب السعد والعز والبن والهيل
وكبش مربينه لكل محشومي
اليوم يسهر كل ما جرهد الليل
دايم على غيضة صنوت كضومي
هذا وجودي وجد من له مواحيل
من عقب ما هي ذود صارت قسومي
أو وجد من صدر على اربع محاحيل
لها الى غاب الرقيب معلومي
صدر على اربعمائة كلها كيل
حب حمر تسقي نواحيه كومي
اربع عقايبها اربع كنس نحيل
يشيلن الما في وساع الكمومي
يوم استتم الزرع شال النما شيل
نشت بردها كبر روس البهومي
وهلت على وسط المفالي هماليل
وصارت على روس النواحي رجومي
واللي بقى من حبها شالها السيل
غثو السبل بالسيل مثل الهدومي

واصبح يصيح ويزعج الويل بالويل
عن نول ما نالت يديه محرومي

الله يكفيننا شرور المخاييل
الا عطا رحمة كما انه رحومي

ما قلتها باللي تعرف التهاويل
ولا هي من اللي يجمعن العلومي

وسلامتكم جميعاً.



وصف الجسم

القصة التالية عن شاعر من الشعراء المجيدين في عملية وصف الأشياء الدقيقة والداخلية في السيارات، من أول كانوا الأولين بشعرهم يوصفون الناقة والابل، يوصفها من راسها الى اقدمها يوصف راسها وحركته وكل عضو فيها وحركته لكن فيه واحد من الشعراء المعاصرين - واحد من شعراء مطير اسمه هاييف النعيم رحمه الله هذا عنده اجادة في الوصف والأشياء الدقيقة في السيارات من الداخل ووصفه اللي هو وصل له ما ياصل له الا واحد قد فك السيارات أو فك المكيئة، وما وصف المظهر الخارجي وبس وهو يوم بغى يرسل مرسل لرفيقه اللي بتوصل له القصيدة اختار السيارة الفخمة الرفيعة الى جت في الطريق السواق يشوف يمين ويسار وعلى مسافة وتنطلق انطلاقه عجيبة يقول في القصيدة:

قم يا نديبي فوق جسم منجب
 من الوكالة ساع ورد موديله
 مجمعين اجزاه توه مركب
 مواصفاته عن اخوانه قليله
 لا من بخاخه وري عايه صب
 دقت بلوفه كل بلف وقبيله
 قامت بلوفه في سيستها تعاقب
 مازونة بالفيلسة مستطيله

فره بسكروبه ويربط بلولب
 واحيان يشبك بينهنه بتيله
 وزع لها الشاكوش نار تلهب
 عن البساتم كل عادم تزيله
 زيته ورا الجالون صب اربع علب
 ان شيت سوبر شل والا موبيله
 لا درت مفتاحه على دقمته قب
 يرزم كما ترزم رعود المخيله
 قامت شكامينه خلافه تخاطب
 هرجة تكارين لغتهم ثقيله
 من قو لفتح النار شكمانه اشهب
 والعاير الثاني كما هو مثيله
 عليه قطاع الفيافي معرب
 سايق مهندس للصحاري دليه
 لا بان جو دونه الشوف يذهب
 اقل من عشر الدقايق يجيله
 كنه بجنحان الطيور يتقضب
 الى صفت مية وستين ميله
 خلفه مثل عج المثيرة الى هب
 ثور دقاق القاع من تحت وبيله

قامن بلوفه يرشحن من جهنب
يشرب من الممتاز صافي زليله
يرفع له السبرينق وجهه الى طب
ومساعد السبرينق له يرتكيه
يخضع تخضع جادل يوم تلعب
جمله وتلعب بالقلوب الهبيله
نوره كما الفلة بوجهه الى شب
مابان قدم النور كيولو تخيله
وكباس نوره وين ما ردت يقلب
حتى مقابل شمعته يهتديله
وفرامله على هوى الرجل تقضب
لا داسه السواق بالرجل حيله
الى دعست الفرملة حجر الهب
والى رفعت الرجل خلا سبيله
نصه لبيت للرجاجيل يجذب
غرب من المزرع براس الطويله
من يوم تقبل والحويقل يرحب
له عادة للضيف ذبح الجزيله
شبل على درب الرجالة مدرب
من أي نوع المرجله ينعني له

وقل له برد القاف لي يتحزب
 ويكمل فراغ اللي قصر عن زميله
 يا كثر فرقا الناس لا جيت احسب
 مسافة بين الاوادم طويله
 حتى بدم اجسادهم ما تراكب
 جعل فصيلة تختلف عن فصيله
 الله جعل بالدم سالب وموجب
 يبين دم الشخص عند تحليله
 كالضرب والقسمة عملها مشقلب
 القسم عكس الضرب يظهر حصيله
 هذا كلام اللي لك الله مجرب
 شاف الصحيح بنظرته وتحليله
 صلوا على افضل رسول مقرب
 محمد اللي موعده بالوسيله

هذي القصيدة اللي قالها هايف النعيم المطيري مرسلها لصديقه الحويقل وما
 ادري عاد رد عليه ولا لا ، انا سمعت القصيدة هذي بصوته بشريط وموجود
 خابره يباع بالسوق ، لكن العجيب بالامر أن الرجل هذا أكيد أنه مثلاً أما مشتغل
 في ارامكوا والا قد صار مهندس والا قد فك وربط لان الاشياء اللي ذكرها في
 المكيئة من الاشياء الدقيقة اللي تصير تحت بالنسبة لتوزيع الزيت والكهرباء يوم
 توزع على البساتم انا عاد منيب بخيص ترا بالمكيئة اخاف اقول شيء اغلط فيه ثم

عاد يتقدون علي المهندسين ويقولون قمت تحط شيء علي شيء لكن أنتم قررتوا القصيدة وكيف قال ووصف، انا ما اعرف الا شيء واحد بس اللي هو يوم يقول علي البلوف مازونه بالفيلسه مستطيله ذيك الحين وانا واقف عند واحد يوضب سيارة طلع حديدية مثل مقص الظفور فيها ريش يجرحهم هما المقص يصير فيه حق موس ويصير فيه حق اذن فعاد قلت له وش اسمها قال هذي اسمها الفيلسه يازنون بها البلوف بحيث ان البلوف لا بغت ترتفع تصير رفعتها وحده ونزلتها وحده .

عاد انا جازت لي القصيدة ووصفه الدقيق لأن ما قد سمعت احد ياصف بها الوصف الدقيق للسيارة بالنسبة لتشغيلتها وأجزاء المكيينة اكثر اللي سمعتهم من الشعراء المعاصرين ياصفون السيارة من قدام من وجهها من مظهرها من لمعة السيارة او من لون المراتب بس هذا رجال دقيق وباحص كنه قد فك المكيينة وركبها، وبعد هو صاحب قصيدة الخمس المظلل ابجيبها باختصار .

و سببها انه مرة من المرات كان يتمشى في السوق ووقف سيارته ووقف في البرحه قدام مثل ما تقول سوق او محلات او مجمع فوقف سيارته ، ويوم رجع والى والله هاك الخمس تقبل محول من درجة شكله مطمئن من قدام وله لونين لاهو احمر ولا اسود ما تعرف وش لونه وقزازه مظلل كله ويوم دار وطالع جازت له سحبة الكبوت على القزازه على الاصطبات الخمسة اللي فوق ويشوفها على جنب العصر ساطع عليها النور وهو مثل ما تقول يشوفه من جهة الشرق ويوم جازت له الكفريات جنوبها كروم الموتر جديد عاد هو راعي بخص في السيارات ويمكن انه اشتغل في ارامكوا ويعرف من هالكلمات المشهورة بالانجليزي ويلكوم وهاوار يو من هالنوع المهم جاز له الموتر وحط يده على الباب الوراني ناظر تحت وراح من بعيد وشاف

دفرنسه قال هذا الموتر (مقلط كامل يمشي مهوب موتر) اللي ما عنده مثل هالموتر لا يهملك بس ان القزاز مظلل وبعد شوي والى هاك الولد ولد مريرب متعافي معه كيسة زرقاء فيها كراريس ودفاتر ابو عشرين ومساطر واقلام وفتح الباب وجدعهن في المرتبه وراح عاد مثل ما تقول تأخر وبغى يمشي .

قال في نفسه يا ولد انت الحين ناظرت السيارة وشفنت كفراتها وجازت لك وتقول هذا الموتر عز الله انه مقلط يمشي لكن بقى القير هو في الدرکسون والا عادي لازم تشوف القير يقول على روجه كان القزاز مظلل فما يقدر يشوف القير الين يقرب مره ويحط يديه علشان يشوف وفعلا حط يديه يوم طالع والى عين حميده . . كيف وشلون والى في الموتر ثلاث بنات كنهن نجفات المهم انهم في هالمرتبة يمكن اخوهم راح يجيب لهم مقاضي هو عاد رجال نظيف وعفيف ونزیه ومهوب لم هالامور بس وش يسوي والى على اخر مراحل الدلع هالبنات حتى معهم سندويتش يمكن انه جايب لهم الولد من هالاكلات السريعة سندويتشات من اللي تسمى توست تعض عضه عضتين وتجدع الباقي والعصير ملون والمصاص ملون ومن الامور اللي تعرفونها هم قالوا وش هاللي يدور على الموتر ويطالع طبعاً عرف وين القير فيه ومشى شغل سيارته اللي موقفها جنبهم فيوم شافوه بيمشي اخذو من هالكراريس وكتبوا في قفاها (هاوار يو) ولصقتها في القزازة يوم شافها عرف ان المسأله فيها شيء من المغازل فراح الرجال مهوب لهم لكن وهو في السيارة تمثل في هالابيات هذي :

يا هيه يا اهل السبرمان المظلي

شكلين لا باسود ولا باحمر اللون

شكله رهيب وماقفه مستقلي
 متخيرينه من يجي نص مليون
 مديح مثل خرب وقف مستذلي
 جوه القنوص وطالع الصقر بعيون
 ينزل الى طقعة تراخي وذلي
 والملوت من كف اشقر الريش مضمون
 عبارتين وكامل الوصف فلي
 شد الخواجة والكفبرات بالون
 متانته بالكاندس ايت ملي
 والحجم تسعمية من النوع نشلون
 حجم المكيئة زايد ومتعلي
 اربعمياته زايد اربع وخمسون
 قييره ثلاث تروس والرابع اللي
 مفهوم قييره في يمين الدرکسون
 ماطق بالهوبات رمان بللي
 ولا هربت صوفه ولا صوت بنيون
 وقفت اطالع منظره جايزلي
 وضحكت في حال وفي حال مغبون
 وائر الظبأ من داخله ينظرن لي
 انا اتفرج والعداري يشوفون

تباينوا بكفوفهم وكتبن لي
هواريو ذا كتبهم يوم يقرون

واقول يا سيد الظبا وضحن لي
هواريو هو ويش وش تقولون

قالوا وراك لكتبنا ما تحلي
نرطن رطينة ما نباهم يعرفون

واقول ياسيد الظبا ما حصل لي
شهادتك عليا وانا كتبي ادون

خل الكتابة بالعيون ارمزن لي
والله علم عن منطق الاعين الخون

عينك ترمزلي وعيني تحلي
ما فيه داعي هرجنا رمز بعيون

بالله ياسيد الرعايب قل لي
وين البلاد اللي بها اهلك يحلون

تفضلن يا شاطرات اوصفن لي
الحي والشارع ورقم التلفون

حتى لوصفه يا حبايب ندلي
نمركم يا زين والا تمرون

هذه القصيدة قالها الشاعر للمداعبة فقط .

وسلامتكم . .

مكانة الأخ

يذكر لي غانم بن دخيل بن غانم من أهل الزلفي رحمه الله يقول هاك السنة وأنا بالزلفي زعل علي ابوي الله يرحمه وقال يا غانم فكنا من شرك لا يجونا الديايين باكر يبيعون بيتنا يقول لأنني كنت فقير واعزم هذا واجيب هذا واحط وحننا وابوي واخواني كلنا فقراء يقول ما عندنا شي يوم شفت ابوي يقول كذا زعلت وقلت له والله ما عد اقعده عندكم قال ابوي (طس) عاش بالبلد من لا له ولد. يقول غانم رحمت وهدرت للكويث رايح اترزق الله طبيت الكويث وبالعادة دائماً كل اهل قرية وكل اهل ديره يتجمعون جميع في مكان معلوم واروح للجماعة (اهل الزلفي جماعتي) يقول يوم الفيت عليهم: ياهلا وبالله حيّه ماشالله متى جيت؟ قال والله هذي وصلتي، ويوزع اللي معه من وصايا ورسايل من أهلهم.

يقول غانم يوم طبيت والا اخوي عبدالرحمن جاي قبلي له حول الستين، سلمت على الجماعة ياالله حيهم وشلونكم طيبين وسألت: وين عبدالرحمن؟ خابره معهم، كلهم عزويية في هالبيت ويشتغلون اللي في الغوص واللي في التجارة واللي صبي عند احد، المهم قال وين عبدالرحمن؟ قال له واحد من الربع اللي قاعدين: اجل مادريت؟ قال: لا وشفيه؟ قال: عبدالرحمن الله يسلمك محبوس يعني مسجون. قال: افا، خير ان شالله؟ قال له: لا مهوب عند علم ردي ولله الحمد، الامور نظيفة. وش فيه؟ قال انه كافل واحد يقال له الزنيدي على ماظن يطلبه واحد درايم، (عبدالرحمن الغانم كفيل غارم) وانهم ماسلموا

المال لا هو ولا الكفيل وشكوههم اهل المال وسجن لأنه كفيل غرام، قال طيب ماتسببتوا له؟ ماعرفتوا تطلعونه؟ قال والله يا ابن الحلال ما بعد امداه توه داخل السجن ماله الا يومين، يقول غانم: ماغت هاك الليلة واقعد اهو جس انا لله وانا اليه راجعون عبدالرحمن و مسجون وله عايلة في الزلفي وكلهم صغار .

وش الحيلة؟ ووش الدبرة؟ واخترع له غانم دبرة، ويوم جا من باكر الصبح يروح غانم للشيخ مبارك (كان في عهد الشيخ مبارك) والاه في القصر في الصفاة ويطلب الاستئذان في مقابلة الشيخ ويوم رقى والاه في هاك الروشن جالس وعقاله الشطفه حاطه على ركبتة، وافقت انه مستاسع صدره يقول وجيت لمه والاه جالس يستقبل الناس مساك الله بالخير السلام عليك يا شيخ قال يا هلا قلت ياطويل العمر هذا انا غانم ابن دخيل ابن غانم قال ايي نعم خير ان شالله؟ قلت انا جاي من سنح اخوي عبدالرحمن محبوس عندكم .

قال ايه حابسينه علشانه كفيل غرام للزنيدي مدري منهو ولا سلم الدراهم وحبسناه، الناس بيون حقهم وانا ابوك . . قلت ايه طال عمرك بس انا رجال اركب الغوص ولي نوخذة قال ايه وشفيه؟ قلت نوخذاي قوي وتاجر ولا عنده خلاف وانا غيص عنده ويغليني بالحيل . ابيك طالع عمرك تسجني بداله لأن ما عندي دراهم علشان اسدد و اذا درى نوخذاي اني مسجون بيجي وييسلم الدراهم واطلع اخوي عبدالرحمن، قال عجيب، صحيح؟ قلت الله الله، زين اسجنوني طالع عمرك بدال اخوي عبدالرحمن لأنه ابو اطفال ويكد على عائلة .

وانا نوخذاي بحاجتي اذا درى اني مسجون بيجي ويطلعني، يبدو من كلام غانم ومن شكله ووجهه الصدق والصراحة، استانس الشيخ بكلامه، وكان كلام

غانم مؤثر ورجال له هيبه وله حس ، والشيخ ينادي هاك المحابسي عنده واحد اسمه حمد من اهل حائل ، قال : يا حمد . قال : نعم . قال : تعال وانا ابوك ، دخل هذا في الحبس وطلع ذاك . قال : زين ، يقول غانم ولاني انا كاتب وريقة صغيرة وحاطها بين اصابعي . كاتبها لاخوي ، وجاي انا مع المحابسي . منول الامور بسيطه وناس يصدقون وطيبين ولافيه شي مخفى والعلم كله نظيف . يقول ولاني كاتب لاخوي عبدالرحمن في هالوريقة : غادر البلد لاتمرح به .

ويوم جا طالع سلمت عليه ودخلت في مكانه وعطيته الورقه وراح هو وعرف وش في الورقه انه غادر البلد لاتمرح فيه ، وراح على طول للجماعه في البيت وتجهز وخذ اغراضه وركب الذلول وعنا للزلفي ، ، يقول غانم يوم هقيت انا ان اخوي قطع مسافه وراح له يجي خمسة ايام يمشي ، والمسافه من الزلفي الى الكويت للذلول تاخذ تقريبا خمسة عشر يوم ، واذا كان مسرع يالله ١٢ أو ١٣ يوم ، واقوم واقول للمحابسي : استأذن لي على الشيخ الله لايهينك ، قال المحابسي : وش تبي؟

قلت بحاكي الشيخ ، قال طيب . . ويستأذنون لي على الشيخ واطلع ومن يوم رقيت وسلمت عرفني ، كان غانم الله يرحمه يلبس صدره ومنتخاف دمه الشيخ من حينه . من اول ماجا وهو شايف انه لابق وحليل وجايز للشيخ ، يقول من يوم اقبلت عليه وانا علي الصدره قال لي : مايا نوخذاك (ماجا) قلت وانا ابتسم : طال عمرك مالي نوخذه . قال وشلون؟! يالقمبازي والله مالك نوخذه؟ قلت : والله مالي نوخذه ، قال مالقيت الا حنا تلعب علينا! تطلع اخوك وتقول مالي نوخذه! قلت ايه والله مالي نوخذه بس انا طالع عمرك اخوي هذا أكبر مني

يكد على عايلة واطفال ومحتاجين له بيونه هناك وانا رجال مالي شغل وابقعد في
 هالحبس لين الله يدير فلك ، اخوي ذاك ألزم بالطلعة ، قال ياابن الذين ياللي فيك
 ومافيك ويسبه ويهاوشه وياخذ العقال بغى يطقه ، قال للمحابسي : تعال ياحمد
 ود الحمار للحبس ، وده وثقل عليه لاتعطونه الا خبزة وملح ، مالتقت الا حنا
 تقص علينا يالله وده ، ويودوني ويسكرون علي ثاني مرة ، يقول يوم اوفيت
 شوي كن الشيخ تحسّف وقال والله ان هذا عبقري ، اللي قدر يطلع اخوه ، والله
 انه حسافة على الحبس وينادينني ثاني مرة ويوم فضت عليه قال : وشلون سويت
 ياقمبازي؟ طيب انا الحين بكفلك لكن تروح تجيب الدراهم وتدبرهن؟ قلت :
 والله لأجيبهن ياطويل العمر ، قال : زين يالله رح ، واروح ويسهل الله امري
 والقى هاك البندق واشترىها بـ ٢٢ ريال ويسهل الله وايبع البندق بـ ٤٠ المهم
 واروح لهم ٢٠ من الدراهم وصرت ارسل لهم على شوي شوي لين مابقي الا
 شوي وقال الشيخ ابد بس خلاص الباقي انا بسلمه لهم ، وسلمه عنه الشيخ
 وسدد دين اخوه .

يقول غانم بعد مده اشتقت لاهلي واخواني وابوي وتحسفت وارسلت لبوي
 هالقصيدة يقول فيها غانم :-

يا مل نفس كاثرات شطونها

طالت لياليها وسهرت عيونها

تسهر طوال الليال قلقا حزينه

وتجاوب اللي فوق عالي غصونها

مما دهاها يا رشيد وصابها
 بفراقها الخلان زيد جنونها
 الي بدا الغراب وانساق وانطوى
 تخفي عن العراف لا يسمعونها
 بفراقهم كل المصايب تصيبيني
 مصايب زادت علينا غبونها
 وجددي عليهم زاد واشتد وارتم
 لاجد طرفه عند خَوْلَه ودونها
 ولا وجد غيلان على العامريه
 اللي عليها هام واثبت فنونها
 ولو جد بن حجر وعتر ومحسن
 ولا وجد أبو زيد بعليا زبونها
 ولا وجد ابن عدوان نمر ومخلد
 اللي دموعه ما تقيض شنونها
 أيضا ولا وجد التميمي على الذي
 تسبي عقول الناضرين بلونها
 ولا وجد ابن لعبون وابن ربيعه
 وابن فرج للي بقلبه طعونها
 أيضا ولا الصياد وأيا خصيمه
 وراكان بن حثلين حامي ضعونها
 وابن وميم مع جباره ودندن
 وقضاة باحوا للخلايق كنونها

أيضاً سليم والبريمي وناجي
واللي حكم حاييل وعالي ركونها
وجدي عليهم آه مما دهاني
لا حزن يعقوب ويونس بنونها
بمقارق الأحباب وفراق حيننا
يا حسرتي والعين لا تزعجونها
بفراق بو غانم وهيف وغلمه
وهيف هيف ضامرات بطونها
اللي بعد روعي وروحي فداها
دمعي عليها آه لا تحسبونها
على بنات ضامرات نواعم
سود مدامعها وشقر أقرونها
يا طارشي يم أبو غانم تخبره
الكلمه اللي قلتها له أبصونها
والله يا لولا كلمة قلتها لي
يا دارنا والله لو حيل دونها
لو حالت الأتراك لما لمومها
معها المدافع والدنا يعملونها
أنني لأجيبها لو يحطون دونها
أبطال عيال قليل سكونها

مار البلى يا بوي مما تقول لي
كلمتك هذاي في ضميري كمونها

عساك تذكرني الي جاك حاجه
صولات عيال ولا تنطحونها

ومني صلاة عد ما قال قايل
يامل نفس كاثرات أشطونها

هذي هي قصيده غانم اللي ارسلها لبوه بالزلفي وهو كان بالكويت وصلت
الى ابوه بعد جيت أخوه عبدالرحمن لهم بالزلفي وقد اخبر عبدالرحمن والده بان
غانم هو اللي تسبب في اخراجه من السجن وسدد عنه الطلب اللي عليه . عندها
تأسف الوالد على الكلام اللي سبق وان قاله لغانم يوم يقول رح عنا لا يبلشونا
الديايين علاشك ورد على ولده غانم بقصيدة على نفس القافية يقول دخيل ابوه
في معناها أنني أنا أبوك مهما قسيت عليك ما يجب أنك توأخذني وإني تعبت في
تربيتكم وغذيتكم يوم السنين الضعيفة وهالحين أنا كبير بالسن لي التقدير
والاحترام وينصحه فيها بمن يرافق وغير ذلك يقول

قال الذي كبده تزايد غبونها
يجابوب القمري بعالي لحونها

شفت الكتاب وهاض ما التج بالحشا
وأخف المشايل خايف ينكرونها

تركتها ذالي ثلاثين حجه
 وان قلتها يا أديب جتني فنونها
 أنا لها يا ديب وأعطيك ردها
 أعطيك معني كلمة تفهمونها
 تقولا لولا كلمة قلتها لي
 سندات يم الدار لو حيل دونها
 تراك مثل اللي طرف موق عينه
 بيمناه ما خليتها في شطونها
 تبي تعاقب والدك في كلامه
 ارضاي حق وكلمتك لي تصونها
 وأفعالنا أسلاف علينا مرده
 أعمل وتلقا والحفظ يحفظونها
 وجددي على الجمعا ولا ناب كاره
 واللي كذب يعطي العمى مع جفونها
 وجد الربيط اللي حباله قويه
 في وسط دباب حبس في ديونها
 دين على دين ولا هوب سالم
 ما ظني ان أدميهم هدرونها
 غذيتكم يوم السنين الرديه
 جهال عيله ما تغطي بطونها

واليوم أنا شايب على راس مكبر
 وحق عليكم شيبتي تكرمونها
 أنا ديارى من وري هيت بالقضا
 شرقها قطيات ما تفهمونها
 وجابتني القدره والأقدار غالبه
 للديره اللي هولتني بكونها
 ولا ترابع الا من تعرفه على النقا
 حيد صميدع هرجتك ما يخونها
 تبدي له أسرارك ويبصرك ما خفى
 والا بلك الباليه حال دونها
 هذه هي قصة غانم وابوه وأخوه عبدالرحمن رحمهم الله جميعاً .
 والسلام عليكم .



ابن مزيد وابنائاه

السالفة هذي عن الشاعر إبراهيم بن زيد المزيد رحمه الله من الشعراء
البارزين المعروفين وهو صاحب القصيدة المشهورة:

لقيت الناس ما منهم سلامة
لزوم يلحقك منهم ملامة
ولا تحسب حلالك لو تبيده
يبي يحماك عن هرج الفدامة
بذرت الجود في من لا جزاني
سوا ذم الى هبت ولاممة
حقود القلب نقال الوشايا
هذور سهمته نقل النمامة

الى أن قال:

الا يا ليت ربي يوم سوا
عبيده حط للطيب علامة
على شان الذي بالناس جاهل
يعرف الحر من برق الجهامة
لاجل في الناس شيطان ملبس
ولو لواء على راسه عمامة

بفرك بالسلام وبالتحففي
وهو شيخ وجشجات طمامة
مثل هذا تحذر منه جدا
ولا تدني مقامك من مقامه
الى أن قال :

وبعض الناس محمود السجايا
رقى العليا بعزمه والتزامه
الى منه بدا لك فيه لازم
قضى لازمك ما ثمن حطامه
كما انه وافي في كل خسره
عريب الجد خاله من عمامه
اسأل الله يرفع كل خير
عن الخذلان لا يهفي مقامه
قضى نظمي وما لاق بضميري
حلاة القيل مبداته ختامه
اقول الناس مشكاهم على الله
لزوم يلحقك منهم ملامه

إبراهيم المزيدي عياله مشا الله كثيرين وفيهم خير وبركة ومتكاتفين وكان أبوه
له مجلس من الصبح وبابه مفتوح الين آخر الليل رجل دمث الاخلاق وحبیب

ولا يعرف يتقهوى لحاله ابد لازم يجي عنده احد ومن دماثة اخلاق اصدقائه كثيرين أنا اخبرهم واتذكر وهم يجونه في بيته وسط الديرة ناس يجونه بعد الفجر ودفعة تجي اول ما تطلع الشمس ودفعة ثالثة تجي الضحى ودايم موجود وكذلك الغداء والعشاء .

فيوم جت سنة من السنين راح للطايف يصيف فيه ، يقول يوم دخلنا الطايف جيت انا وعيالي الكبار مبكرين علشان نجهز بيتنا ونزينه ونرتبه لان العايلة بيلحقونا، اغلب العوايل يصيفون في الطايف تعرفون مصيف زين، يقول يوم رتبنا بيتنا وغسلناه وكنسنا المجلس والمقلط وصفينا كل شيء وقلت لواحد من العيال شب النار وصلح القهوة وعطنا مدختين نطيب المجلس بيجون ربعنا الحين يقول يوم زهبت الدلال والقهوة نظيفة ومرتب وشغله كله متكتك حتى في القدوع والتمر والفناجيل رجال لبق يلاحظ كل شيء ولازم ترتيب مافيه اسراف ولا فيه تقدير .

فيوم جهزت القهوة قال واحد من العيال بيه قال نعم . قال انا ابروح لواحد من اصدقاي في هالديرة قال ابوه طيب واذا جو الضيوف وش اسوي من يظيفهم قال عندك اخوي بياصل قريب وفيه بركة قال طيب بس لا تبطي وراح ذا الولد وهي الروحة ابطى ما جا ، وجأ اخوه اللي يقول هو بيجي بس لحسن الحظ ما بعد جا احد من الضيوف والى اخوه اللي جا يتمقرص مثل اخوه يبي يسلم على اصدقاه وربعه اللي في الديرة ووده يقول لي ومستحي ودلا يتمقرص ويسال وين اخوي قلت له بيجي الحين ما علمته انه مستأذن ويسأل بعد شوي وين اخوي وراه ما بعد جا ابطى سألته قلت انت وش تبي باخوك قال انا ودي ارواح اسلم على ربع لي قلت هو رايح يسلم على ربع له في هالديرة الحين ورا ما يجون هنا يسلمون عليكم ويتقهون قال

الولد انا معي رسالة لواحد منهم ابروح اوديهها وابسلم عليهم واشوفهم وقال ابوه
 طيب لو يجيني احد قال بتعبر نفسك الين حنا نجحي الحين بنجحي محناب مطولين
 المهم يقول ما دريت الا كل الاثنين راحوا وخلوني في المجلس وضاق صدري لو
 يجي احد الحين من ربيعي واصقائي وخاصة من كبار السن يبي من يصب له ويبي
 من يداري خاطره، فيوم راحوا تركيت على المركي واقعد اهو جس ويجيني
 ابليس ويلعب علي قال هذا الحين شغل عيالك وانت حي وفي هالسن كيف باكر
 الين لا سمح الله توفيت تهقى انهم يفتحون المجلس ويبتلقون الضيوف ويسوون
 سواتك كذا نادر نفسك ووقتك لهم لربعك واصدقائك وحين يجيه ما يظمن
 نفسه ويقول لا ان شاء الله بيسوون مثلي ويطلعون طيبين ولا تزل وحين يجيني
 ابليس يقول والله يا غريضاتك هذي ودليلاتك اللي انت حاطها يمكن ثالث يوم
 او رابع يوم تلقاهم بالحراج مبيوعه ومسكر المجلس ومحد جاي ويقول ما خفت
 الا من هالشيء قام وقال هالقصيدة هذي :

يا عزتي للباب من صكة له

من عقب ما تركز علي النصايب

ما في عيالي واحد فزعة له

الى وقف تدرى عليه الهبايب

من عقب يوم ان النشامى تدل له

خلوه مجناب سوات الخرايب

الباب يشكي عقب عزه مذله

يا باب لا تشكي وانا عنك غايب

لومك على اللي باعوا البيت كله
 كل خذا قسمه وخلوك سايب
 بعض العيال الى ظهر ما تمله
 وبعض العيال لو الدينه عقايب
 خسارة تغذاه خله لعله
 يبقى على الدنيا كثير المصايب
 لا مقلط سفرة ولا شال دله
 ولا مع اللي ينطحون النوايب
 لعل من يبكيه رمح يشله
 على عروق القلب بين الترايب

قال القصيدة هذي وانتشرت ، ويوم يقولها ابراهيم المزيدي كان من شيء
 يوجسه في قلبه ومهتم لعل العيال من بعده يصيرون طيبين ويمشون على خطاه
 والحمد لله الآن هم طيبين ، وهو بعد قال القصيدة هذي وعاش عشر سنين بعدها
 او اكثر ومجلسه الى الآن كل ليلة اثنين يجتمعون وماصك ابد وعياله كلهم
 متواجدين ماسكين محل ابوهم وهذا هو المفروض العيال الطيبين والاسر الطيبة
 والحمائل الى صار لابوهم عادة طيبة مثلا من اكرام الضيوف او من عمل خير
 انهم ما يخلون طريقة ابوهم وسلمه اللي هو ماشي عليه وهذا لله الحمد حصل
 يجتمعون ربه واصدقاه وانا الى وقت قريب وانا عندهم واللي اعجبني وجاز لي
 مجارة واحد من اصدقاه القريين رد على قصيدته ويقول له يا ابو خالد ابشرك ان
 لا يزال مجلسك مفتوح وما تزال دلالك ومعامل موجوده الى الآن فقال
 القصيدة هذي اللي هو الشاعر محمد بن صالح الحسينان يقول :

بيتك يا ابو خالد اصحابك تدله
الباب مفتوح ولا هوب سايب
من عقبكم باقي ولا فيه خله
ربعك يعودونه ولا غاب غايب
البيت باقي فيه فرشاه وزله
واليوم صار الملتقى للحبايب
من عقبكم ما كن شي حصل له
البيت عامر مدهل للقرايب
خالد مع اخوانه عماره وظله
كل يقوم بواجبه والنوايب
لا غاب واحد سد الاخر محله
سفرتك ممدودة عليها الوجايب
البن والشاهي على النار كله
بدلال رسلان بها الهيل رايب
الباب صاروا كلهم فزعة له
من يوم ما ركزت عليك النصايب

هذي القصيدة جارا بها على قصيدة إبراهيم المزيدي ويتذكره في هالأبيات
هذي ويقول ولله الحمد لا يزال بيتك مفتوح ولا يزالون عيالك قائمين بالواجب .
والحين بعض الناس فيه صفة طيبة اللي هي صفة الكرم والطيب مع جيرانه وربعه
ويصير دايرة بينهم وقهوة واجتماع لو انه على فنجان شاهي ، وسبحان الله بعض

الناس تكون جبلته وطبعه ان الشاهي ما يعرف يشربه لحاله واعرف ناس مثل كذا لو ما يلقي احد يمكن يفرش له زولية في الشارع ومن جا قال له اقلط ، وبعضهم ما يبني احد خطر تقول له انت يا الأخ وشوله تحط لك مجلس ومقلط الى صرت متتب عازم احد .

تذكرت بيتين قلها الشاعر المعروف محمد بن صقر رحمة الله عليه يوم مر عليه واحد من ربه قال له محمد بن صقر ودنا نروح لفلان قلت له توكلنا على الله ويقول يوم رحمت معه ويدخلنا الرجال في بيته والى هالفلة اللي وش كبرها فيها النخل والممرات ومدخل السيارة وقال تعال اوريك هذا ملحق الرجال واللي بعيد هناك ملحق النساء ويوريه الملحق ومهوب من كبره لكن فيه بسيط من كبر تكييب الشاهي غادي كنه لوح بلكاش لو توقف البساط وقف قال هذا يقعد فيها السواق والصبي لكن المجلس الداخلي تعال واريك اياه ويوريه هاك المجلس اللي مطقوق بالكنب والمقلط مقابله والى في آخر المجلس زولية مطوية لين جت في اخره والأرض بلاط ، قال هذا المجلس؟ قال الرجال ايه قال محمد بن صقر طيب ورا ما فليتوا الزولية قال مهوب يجينا احد قليل اللي يجونا عاد تذكر اللي قباهم في بيتهم وكيف منارة ضوه من الرماد من كثر الضيوف اللي يجونه وبين هذا وقال البيتين هذي :

المجلس اللي ما تجيه الرجالي

حتيش بالكيشان لو يفرشونه

بعض الحزوم احسن على كل حالي

لا صار راع الحزم ربه يجونه

هذا وسلامة الجميع وبالله التوفيق .

الخليفي شاعر قطر

الشاعر الفذ والعلم المعروف عبدالله بن صالح بن ماجد بن عتيق الخليفي من أبرز الشعراء المعروفين في دولة قطر له ديوان مطبوع ولد عام ١٣٠٤ هـ، في الغارية شمال قطر نشأ فيها وتعلم التعليم اللي كان في وقته من الكتاتيب والقرآن وحفظه وامور الدين ويوم انه كبر اتجه حاله حال اقرانه من الشباب في هذالك الوقت لأعمال البحر واشتغل فيها بالغوص .

ومعروف ان الغوص مهنة خطيرة تطلب رجال نشيطين اللي عندهم صبر وجلد على احوال البحر وصار من الناس المرموقين ومعروف في الغوص بعد فترة قلت اعمال البحر وتركوها الناس فاتجه للعلم وطلبه له وقطع مرحلة في العلم لين اصبح مدرس والناس كانوا في هذالك الوقت في الجزيرة العربية كلها في حاجة للتدريس والعلم والمدرسين حتى لو المدرس مؤهله قليل بس عنده استطاعة على التدريس وعلى توجيه الطلاب ، فتوقف عبدالله بن صالح وصار مدرس في مدرسة ابتدائية في الدمام وابطا فيها جلس سنين عديدة وهو يدرس .

فيها وبعد السنين رجع لمسقط راسه في قطر وانظم الى نخبة طيبة من المشايخ ومن المعلمين وفتحوا اول مدرسة في قطر وصار هو من ضمن المدرسين ، وتخرج على يديهم كثير من اللي الحين ماسكين المناصب فكان التعليم في هذالك الوقت قوي يسولفون الحين في وقتنا الحاضر عن التعليم ويقولون ان التعليم اول اقوى من الحين كانوا يعطونهم من المناهج الكثيرة وكانوا ما شاء الله يستوعبونها ويحفظونها لان ما عندهم من المشاغل مثل ما عندنا اليوم ، وطلعت هالوقت

مختلف العلوم والمعلومات الجديدة والحمدلله استفادوا كثير من اهالي دولة قطر منها وهذا بالاضافة الى انه شاعر وفي روحته للدمام تذكر ديرته وبلده ومسقط راسه وخاصة في الوكرة لان ديرته كانت قريبه من الوكرة وتذكر الشعاب والوديان والاراضي ودايم الانسان يحن لبلده اللي هو عاش فيها وقال قصيدة مع العلم ان ديوانه شامل على العديد من قصايدده وقال قصيدة يتذكر فيها موطنه وصباه وايام شبابه ولو ترجع لديوانه تشوف اغلب قصايدده لها علاقة تقريبا بالوقعات والاحداث اللي صارت في عهده مثل ما تقول جزء من شعره يحتوي على تاريخ دولة قطر شأنه شأن الشعراء الباقيين دايم الشعراء الشعبيين يسجلون الاحداث اللي تصير في البلد وتسجل الوقعات يذكر اسم موقع واسم شخص ومعرفة جرت واماكن الحين تغيرت اسامياها ، قصيدته اللي قالها وهو في الغربة يقول فيها :

تذكرت والذكرى اهاجت لي الخافي

ربوع الحبيب اللي بها يذري السافي

محتها الذواري بين رايح وغادي

وأزت بلاقع كنها دار الاحقافي

وداجت عليها المدجنات الغوادي

وبل وهطال حقوق وهتافي

من كثر ما هلت عليها الغوادي

وهوج الرياح اللي بها تسحب العافي

وقفت بجباها انتظر في عراسها

لعلي اري عنها خبير وعرافي

فلا مخبر عنهم ولا ذاكر ذكر
 ولج العنأ بي عقب ما طار وقافي
 خلاف العنأ فيها تبينت رسمها
 كما رسم كتاب ضعيف بالاصحافي
 فلما تبين رسم دار بها مضت
 عهد الصبا وانا بها مرغد غافي
 لج الضمير بعبرتي من حشاشتي
 كما لج طملان من الجوع بسنافي
 وهلت دموعي مثل ما هل مدجن
 من فوق خدي واعتري الحال قفقافي
 سقاها الحيا دار بها كامل الحيا
 صباني واحياني بوصله ولا خافي
 ثمانين يوم ليلها مع نهارها
 تساوى بها والبرق عجل ورفافي
 فلما مضت عقب الثمانين نصفها
 حيا كل خد عقب ما كان هو غافي
 واصبح بها النوار والزهر مختلف
 يحير الحكيم الى بغى يذكر اوصافي
 فلا السندس الغالي يشادي لبهجهته
 ولا جنس ابورنقين او قمش الاصنافي

واضحت بها طيور الفلا مرجهه
 يغني عليها الطير طرب ومتعافي
 الى غردت هاجت شجوني بصوتها
 تضرب لي السنطور واقعد لها قافي
 الى ما نشر لون الزهر حزة السحر
 تقل بي خطر او طاف مياس الاعطافي
 بلاد بها امضيت غاية صبابتي
 وغايات لذاتي مع كل مهيافي
 ايام انا سني بعشرين حجة
 بعصر الطرب والكيف مع طيب الاولافي
 مع الغادة الهيفا التي كن قدها
 الى ما مشت غصن من الموز غريافي
 بجعد يشادي المرغري فوق متنها
 اثيل جثيل او كما الريش الاغدافي
 قضيت الهوى من قدها اللي قد ارتوى
 بجنب اللوى واللاش يصفق بالاكفافي

هذي من قصايد الشاعر عبدالله بن صالح الخليفي وهو من ابرز الشعراء
 المعروفين بدولة قطر .

وودي بعد اقول لكم كل شيء جميل من اللي عندي واتذكر قصيدة عن
 القهوة والمشهورين فيها وهم خمسة اللي هم دغيم الضلماوي راعي الدلال

الوالمة دايم زيد الخوير اللي يعرف يصلح القهوة ومحمد القاضي اللي يعرف
المقادير اللي تنحط مع القهوة وعلوش بن ظويهري اللي يعرف طعم القهوة
وعبدالله بن صقيه اللي عد من هم اللي تصب لهم القهوة وبقول لكم قصيدة
زيد الخوير اللي وصفوه هو اللي يعرف يصلح القهوة يقول:

قال الذي يبدا على كل قافي

من ضامره ياتن ريام مواليف

بمنومسة لقم على بكر صافي

من شغل ابن سكران عليه التواصيف

خله الى ما تونس النذل غافي

وقرب دلال مثل بط مهاديف

دلال ما عنهن سنى النار طافي

بوجار من لادونهم بابهم جيف

مبرهج تسفي عليه السوافي

من رزته^(١) ما طق في ركزته سيف

احمس ثلاث بالعجل يا السنافي

بشامية طرف لها الجمر تطريف

حماسها قرم من الغوش شافي

بهون يقلبها حريص على الكيف

ثم دقها بالنجر زين الحوافي

مصدف في فرعته بالتصاديف

(١) رزته: يعني منذ أن ركب هذا الباب.

لقم بصفرا من دلال نظافي
 من شغل رسلان كفيت الصواديف
 زله وصفه عن سريب المصافي
 عن قولة بالكيف لا شف يا حيف
 وبهارها من يمة الهند لافي
 في مركب يحدها زجر العواصيف
 لا شفهها الشراب بين الاشافي
 لاتقل يمكع من شفا شارب الشيف
 يبرالها من طلع فج الخوافي
 بكابير طلعة سهيل الى شيف
 وان كان تزل من طيور هوافي
 عليك سد افواها باشقر الليف
 صبه لمن يثني خلاف المقافي
 يوم الفرنج يقذف الملح تقذيف
 يقولها اللي بالمروات وافي
 ما دور التجرات به والمصاريف
 اللي الى غليت شراها جزافي
 ما كيله عند الدلائل بنصيف
 يا سامع مني علوم تشافي
 خذها من اللي نافل كل عريف

دنيك لو ضحكت تراها تجاني
 تبرم دواليب الشقا والتكاليف
 اكسب منه من قبل ما العمر يافي
 صيور ما تقفي ركابك مواجيف
 وصيور عمرك ناهج للذلافي
 سود الليالي تكمله بالتتاليف
 وصيور ما يصبح لضى الجمر طافي
 دنيا تفرق كل ربع مواليف
 الى حصل عز مع الكيف كافي
 ماني على الدنيا كثير التحاسيف
 صلاة ربي عد نجم يشافي
 على النبي محمد عد من شيف

هذي القصيدة للشاعر زيد الخوير وهو من الخورة امير قرية قفار في حايل
 من الحميضي من بني تميم وتوفى عام ١٣٣٤ هـ، وهو من المشاهير اللي عرف انه
 يعرف يصلح القهوة مضبوط ولهذا ذكر يوم قال

فنجالها وان شف بين الاشافي
 لا تقل يمكع من شفى شاربك شيف

وهالبيت محد سبقه عليه .

واليوم كثير من اللي يهتمون في الشعر الشعبي يجمعون للشعار اللي في
 منطقتهم ويدونون شعرهم ويطلعون دواوين باسم شعار المنطقة مثلا طلع ديوانين

أو ثلاثة دواوين شعراء من عنيزة ألفه عبدالرحمن الهطلاني وعبدالرحمن العقيل وفي الزلفي ألفوا ديوان جمعه حمود النافع وألف عبدالله بن حمير بن سافر الدوسري حوالي خمسة أجزاء لشعراء منطقة وادي الدواسر بقصصها ورواياتها مع العلم الى انه شاعر بعد وفي لمنطقة الجنوب ديوان وفي قطر جمعوا اللي هم لقوه وكذلك في الكويت والبحرين والامارات بدوا الناس يهتمون بشعرهم لكن أحياناً بعض المرات يصير أخطاء في الرواية تنسب قصيدة لفلان وهي مهيب له وفيه قصايد معروفة ومعروفين أهلها لكن احياناً ينقلون من رواة خطأ او من كتب وردت بالخطأ ويستمر الخطأ مرة ثانية في الرواية، واللي اذكر مثلاً من القصايد المعروفة اللي لو تسأل أي شخص من هي له القصيدة قال لنمر بن عدوان اللي هي :

البارحة يوم الخلايق نياما

بيحت من كثر البكا كل مكنون

على عشير مات شهر الصياما

عشر القيام وليلة العيد مدفون

حظوا عليه من الخرق ثوب خاما

وقاموا عليه من الترايب يهلون

أنا بنفسي قد أوردت القصيدة هذي في برنامج البادية على أنها لنمر بن عدوان ورويتها على انها لنمر مجتهد فيوم جأ مرة من المرات اتصل فيني واحد من الأخوان الباحثين اللي هو الأستاذ الباحث فايز الحربي وانا طالع من الإذاعة ويتصل علي ويقول لي ترى يا أبو خالد هذي القصيدة مهيب لنمر بن عدوان قلت معروفة عند الناس انها لنمر بن عدوان ولا هي اللي قالها مرثية في وضحي

زوجته . قلت لمن؟ قال هذي القصيدة لمحمد بن مسلم وارجع لديوان نمر ومنتب
محصل القصيدة هذي وفعلاً رجعت للديوان ولا حصلتها، وردت في كتاب
اسمه خيار ما يلتقط من شعر النبط ألفه عبدالله بن خالد الحاتم أنها لمحمد بن
مسلم، واتضح فيما بعد أنها لمحمد، واللي أكد لي قال لي فايز الحربي شف في
القصيدة يقول على عشر مات شهر الصياما يعني ميت في العشر الاوخر من
رمضان وفيها دلائل أنها مهيب لنمر ولا في وضحي مثل يوم يقول جيت للبزور
وقالوا أنا يتامى وقال نمر ما جاء الا عقاب من وضحي ويبدو من هالبيت أن له عيال
واجد وبعدين لهجتها وتركيبها كلامها تختلف، وبحثت في المخطوطات وتأكدت
أنها لمحمد بن مسلم ومحمد يقال أن أصله من الحريق في نجد وأنه عاش في
الاحساء توفى عام ١٢٨٠ هـ، والقصايد اللي تنسب لغير أهلها كثيرة مثل قصيدة:

ألف وليف الروح قبل أمس زرناه

غرو يسلي عن جميع المعاني

مذكورة في أكثر الدواوين أنها لمحسن الهزاني وهي مهيب لمحسن ذكروها في
أحد المخطوطات أنها لشاعر من شعراء مدينة حرمة في سدير أسمه أباثمي، وفيه
ملاحظة على كثير من الأخوان الله يهدينا وإياهم خاصة محرري الصحف الشعبية
ودك الانسان إلى بغى يذكر أحد الشعراء وخاصة المتوفين منهم أنه ما يجيب إلا
الحسن عنه مثل محمد القاضي وتركبي بن ماضي وغيرهم إلى عدوا مثلاً قصايدهم
يجيبون طاري الخمر وهم ما يعرفون الخمر ولا قد شافوه ناس نزهاء وطيبين ولا
يعرفون الأمور هذي لكن يسمعون بها بأنه وكيف وأنه كذا فيذكرونه في قصيدهم
فيظنون الناس اللي يقرون من الجيل الحالي أن هذولا مثلاً يعرفون هالأمر وهم

ما يعرفونها ويريون منها يسمعون بها سماع وإلا هم نزيهين عن هالأمر هذي،
ومثلا محسن الهزاني مع الأسف ما يعرف عنه إلا أنه شاعر مجون وغزل بينما له
قصائد في التوحيد يكفي بس قصيدته اللي قالها في الاستغاثة اللي ذكر فيها
اسماء الله الحسنى، وفي الحديث يقول اذكروا محاسن موتاكم، لا تجيبون لهم
إلا الشيء الطيب والزين اللي ما يلحقكم انتم أثم ولا يلحقهم اثم بعد ماتهم، أنا
مرة قرئت في أحد المجلات الشعبية منسوب بيت لمحسن الهزاني في القصيدة
اللي يقول:

إلى أذن المذن وراحوا يصلون
فرشت أنا ردن الحبيب وصليت

ما يصير محسن ما يقول هالكلام هذا وبالعكس محسن له قصيدة يقول فيها:

أبي الله ما يبقى من الخلق واحد
وكل نعيم ما سوى الخلد نافد

وعاش إلى عمر الثمانين ويعتبر من أسرة الهزازنة أمراء الحريق يتمون إلى
قبيلة عنزه و كذلك ودك تذكر إذا بغيت تجيب قصيدة لشخص أنك تذكر الشيء
الجميل، أما القصايد الثانية الواحد يقولها وهو صغير وفي شبابه مهوب من
الواجب أنك تعيدها، والناس مسلطين على الشيء اللي مهوب زين والشيء
اللي فيه مسبة وهجاء ابد يدورونها والحين إلى جا طاري حميدان الشويعر في
المجالس يجيبون قصيدته مثلا اللي يقول فيها:

مانع خيال في الدكه
ظفر في راس المقصوره

وان صاح صياح من برا
وايق هو ويا الغندورة
اليمنى فيهما الفن ال
واليسرى فيهما البربوره
واليظه ريم السكة
تاخذ وخته السنوره

أما القصيد اللي فيه حكمة ما يذكرونه مثل الهجاء مثل قصيدة ثانية لحميدان
اللي يقول فيها

النعمة حمر جياشه
مايملكها كود وثقه
والجوع خديديم اجواد
ودك ياطى كل زنقه
ليت الفقير يشاورني
كان ادهك به كل فسقه
كان ادهك به عير ينكر
من الصمعا فيه نهقة

مثل هالقصيد وهذا قصيدة كله نقازي لكن فيه من الحكمة توفى حميدان عام
١٢٠٠هـ، اللي ابذكرها الحين قصيدة جميلة للشاعر محمد بن مسلم ويمكن
بعض الأحيان أنها تنسب لأحد شعراء الحجاز وهي لمحمد بن مسلم موجودة في
ديوانه ويقول فيها:

هذا زمان أظهر حلالك يعاديك
 وتقوم له من بعد هذا تسوّل
 لا قمت تذكر ما مضى من حسانيك
 في حال الأوّل قال الأوّل تحوّل
 حنا عيال اليوم عطنا ونعطيك
 نقد بنقد وخل ما فات الأوّل
 ذا خر زمان ما تشوف المهاليك^(١)
 قامت ترفع و الطواري تحوّل
 عن المعاني اقر ذا البيت يكفيك
 ركب الرديف وراعي الكور حوّل
 وأهل الغنى والجُود صاروا صعاليك
 وأهل الفقر و البخل قامت تموّل
 ياما تشوف من العجب ما يعينك
 إن متع الله في حياتك و طول
 اكذب وتلقى لك مع الناس تسليك
 واصدق وتجفّى لو تكون السموّل
 فالحرّ ما ضاقت عليه المساليك
 لولا الضرورة و الحرّم والمعوّل^(٢)
 ولا يغرك كل زول يحاكيك
 هرجه كذوب وبالصحيح يتفوّل

(١) المهاليك: يعني الضعوف.

(٢) الحرّم والمعوّل: يعني العائلة.

يضحك بوجه لك و بالنصح يوريك
 وهو على العثرة يرز المطول
 احذر صديقك قبل تحذر معاديك
 إن كنت عاقل فالليالي تنول
 حسب لدرب ما مشوا فيه أهاليك
 فالمرجله بالقنبزة^(١) ما تظول
 اقنع بقسم الله و ما كان معطيك
 والماقف اللي يتعبك لا تطول
 وترى صديقك من بنفسه يواسيك
 ويواصلك في مرزقه والمخول
 يستر وجهه وإن سمع مدحة فيك
 والى ضربتوا قالتن صار الاول
 واصدق صديقك ما حصل في تمانيك
 ولا تخيل لك جهام تزول
 تحسبه ماء في واهج القيط يسقيك
 وهو سراب في هجير يتجول
 وخف الإله وعامل الصدق ينجيك
 في ساعة يخزى بها من تقول
 كم صادق ينجى بضيق المساليك
 وكم كاذب أومى كراعه وشول

(١) القنبزة: يعني الخيل.

ثم اطلب الله مثل ما قيل في ذيك
يفرج لنا في ذا الزمان المهوّل
واسمع نصيحة واحد ما يهفيك
واعبر على مركب زمانك ونوّل
واحذر على نعمتك من فعل أياديك
تري النعم عند المعاصي تزوّل
وازكى السلام التام من غير تشكيك
عليك ياتالي الرسل وأنت الأوّل

ايضاً هذي قصيدة محمد بن مسلم من شعراء الاحساء المعروفين البارزين لما
جمعوا شعراء الاحساء هو من ضمنهم ومنهم حمد المغلوث وله قصيدة جميلة
عن موضوع الطيب والريحة والشم الزين ، مرة من المرات شم له ريحة طيبة وهو
خابرها من وين هي جاية يمكن أنه اهدى على أحد قارورة طيب أو زباد أو شيء
من الريحة الطيبة ويوم جت المناسبة فاحت عليه الريحة هذي وقال الأبيات
الجميلة هذي :

ذا مسك او عنبر تنشيت ريحه
او ورد جوري على الطل مقطوف
او عشب روض عط رمته وشيحه
او قرن عطار مع الريح مكشوف
ان جاد هجسي والعقل بالقريحه
انه زباد فاح من عرف لطوف

ما جت بقذلتها وهي مستريحه
وافت بموجتها مع الريح عاصوف
ياريح شيخ طيب الله ريحه
الريح مايرد حشاء قلب ملهوف
إلى آخر القصيدة هذا وبالله التوفيق .



قرصة الحبيبة

أحداث هذه القصة وقعت في مدينة الهدار التابعة لمحافظة الأفلج في وادي الدواسر فقد كان الناس في الزمان السابق يعتمدون في أعمال الطبخ في منازلهم اعتماداً أساسياً على أوقاد النار من الحطب فكان كل يوم أو كل أسبوع يذهب أهل البيوت إلى البرية لجلب الحطب وجمعه والاحتطاب وتحميله على ظهور الدواب كل حسب الطريقة التي تيسر له .

وفي مرة من المرات راحت مجموعة من الحرير من نساء الهدار يجيبون حطب لبيوتهم وكانت معهن مرت الشاعر/ فالج بن مبارك آل وحيد الدوسري رحمه الله وكانوا بالضبط في موقع شمال بلدة الهدار وفي شعيب يسمى الشعب وبينما هن منهمكات في جمع الحطب وقعت عين مرت فالج على شجرة من شجر الشفلح (وهو نبات بري) وإذا هي مثمرة فمدت يدها من غير مبالاة لجني ثمرة الشفلحة وكان بالشجرة داب منظوي على جذع الشجرة فانقض عليها ولدغها لدغة سامه لم تسلم بعدها وتألّت من أثر القرصة ألم شديد فحملوها من كان معها من النساء ولكنها تمت مريضة لمدة حوالي ثلاثة أيام بعدها توفيت رحمها الله وكان وقت وفاتها زوجها غايب ليس حاضراً فالديره كان يشتغل في الرياض لطلب الرزق وبعيد عنهم ما يدري عن وفاتها لأن الاتصال صعب ولم يكن فيه وسائل نقل مثل هالحين لم يعلن لا بعد حوالي شهرين أو أكثر لما قابله بالصدفه واحد من جماعته من التتيفات جاي يشتغل مثله فالرياض يوم سلم عليه وحياه قاله احسن الله عزاك فأم عيالك يحسبه داري عنها (وهو والله ما يدري

مسكين هاذي أول مره) المهم أنه انصدم بالخبر هاك الحين قليل السيارات متى
يجي سياره راичه ولا جايه من الوادي المهم أن زوجها فالح جمع روحه واللي
هو محصل من دورة العيشه وراح لأهل فالهدار يوم جاهم وايلا هذا خبرها
صحيح وراح وشاف قبرها وعلموه بكل شي ووشلون قرصت عاد تخبرون
الحريم الى جو ينقلون خبر وفاة زوجه يخلون حتى الجدارن تبكي من دقه نقلهم
للاحزان قعد رجلها يبكي مثل البزرر ثلاثة أيام لا ليله ليل ولا نهار نهار مغير
يلطخ بعمره في كل عاير والحريم يعاونوه على العويل وهي لها هاالحين يجي أربعة
أشهر من يوم توفت (الله يرحمها) وكلما ما جاء يبي ينساها أو يتنيساها ذكره
بمحاسنها ورد في عماء ظلاله الين غدي قلبه رعرعه أدنى شي يبكيه ما يتحمل
وكان هو شاعر ورثاها بالقصيدة التالية ويقول :

آه لا ونيتها قام صدري له صليل

من سمعني تالي الليل جرّ بقليل آه

آه ولو آه يا ناس ما تبيري العليل

بس كشرت البكاء والونين اضرمتناه

آه من قلب يشادي كما قلب الهليل

كلما قالوا تشالا تزايد في عناه

آه من حال تشادي كما حال العليل

كلما جاله طبيب تحير في دواه

آه من دمعٍ تجدر على صدري هميل
لو يحدر له على منهل زروع سقاه

آه من دابٍ فجعني على ظبي السليل
ليت منهو حاضر كان يقتله بعصاه

جعل شعب قرص فيه الحبيب ما يسيل
جعل رزونات السحايب تعدا من وراه

جعل دواي النجم يجعل جباء جمه سجيل
عسكرت فالجو ادق من طير السفاه

بعد ذلك قام والدها اللي هو عمه وحيد بن مسفر آل وحيد رحمه الله وقاله
أبشر بالعوض وحلف يمين ان يزوجه اختها اللي اصغر منها وفعلاً زوجه اياها
وهي موجودة الآن وهذه القصة لها الآن ما يقارب سبعين عام وسلامتكم ارجو
ما قدمته يحوز على رضاكم واعجابكم وإلى اللقاء مع السالفة التالية .



ابو ماجد وابنه

القصيدة هذي للشاعر علي بن عبدالرحمن أبو ماجد قالها في ولده ماجد وماله إلا هالولد، وفي وقتنا الحاضر بعض العيال يطلع من عند أهله ويروح مسافر لديرة مع أصدقاه او مع ربه وأبوه ما وده يضيق صدره ويقول لا تروح ويزعله لكن الولد ما يهتم لأهله ولا يهتم لأبوه ولا يدري أن وراه أبو وأم يعدون له متى يرجع ويجي وإلى بقي على جيته يومين اتصل على أهله وقال تراني في الديرة الفلانية وتراني ابجي طيب وري ما علمتهم من يوم وصلت لأنهم ينتظرونك ويحترون منك خبر، وغيرها بعض الشباب الصغار إلى جا في العطلة وصار ناجح قعد يأذي أهله اشتروا لي سيارة أبي سيارة ويحاولون أهلة يقنعونه إذا كبرت وصرت رجال وعرفت تسوق هذاك الوقت يشترون لك سيارة .

بس الولد ما يطيع ويضرب عن الأكل ويضيق صدر أهله وطول النهار وهو يحن عند أمه ويقول لها لو أنك قايلة لأبوي يشتري لي سيارة كان الحين اوديك للي تبين وييدي استعدادته إلى شروا له سيارة أنه يقضي مقاضي البيت ويودي أمه وخالته وأخواته أنتم بس اشروا لي سيارة وما نبي سواق أنا اللي ابوديكم، وإلى شروا له السيارة ما عاد شافوا رقعة وجهه يوم مع أصدقاه ويوم رايح لربع ثانين وأهله بس يتشفقون يشوفونه عسى ما جاه شيء، وإلى شروا لبعض الشباب سيارة وخاصة إلى صارت ونيت قام خفضه ونزله على الأرض وخلاه ما بينه وبين الأرض إلا اربعة اصابع وإلا يدلي يروح للبر ويطرد يمين ويسار ويدخل له في رمل، وواحد من هالشباب يحاولون فيه وهو ابد يقول ابكم تعلموني

السواعة ويحاولون اهله طيب ادرس يقول السواعة تعال كل وهو السواعة . .
 طيب اذا كبرت ان شاء الله وهو السواعة طيب ذاكر وما عنده إلا السواعة وكل ما
 قالوا له شيء قال السواعة ، الموضوع هذا ذكرني بسالفه أبو ماجد الله يرحمه هو
 وايا ولده ، ولده جذع وتوه ومتولع في السيارات وعاشين في الحجاز في مكة
 وهو من أهل عنيزة أساساً وإلى مايجي من الحجاز لنجد إلا سيارة وحده في
 الشهر اسمها لوري وإلى بغت تجي هالسيارة تلقاها مليانة ركاب وماجد يتحري
 بس متى يتعلم السواعة ومتى يصير حول السيارات دايماً عند هالسيارات كود تتيح
 له الفرصة يعلمونه لو يقولون له تعال في الليل الاظلم فك بنشر قال مستعد ، بس
 في سبيل أنه يتعلم السواعة .

وركب معهم وغاب عن أبوه وراح للرياض وقلق عليه أبوه لأنه توه صغير صح
 أنه طويل لكن ما بعد طلع شعر وجهه من أول يمنعون عيالهم لا يروحون يقولون لهم
 إلى منه طلع شعر وجهك وصرت رجال ودلا شعر وجهك يحماك عن كافة الأمور
 الرديه وعن الناس هاك الساعة تروح وتصير رجال هالحين مالك روجه ، فبعضهم ما
 يطيع الله يهديه ، أهلة ابخص بمصلحته ، ماجد راح وغاب عن أهلة وأبوه قلق بيبه
 يجي وأمه مثله بس مسيكية ما تقدر تحكي ولا تقدر ترد صوت ولا تقول شيء قام
 أبوه وكتب له خط أول مرة وارسله ولا رد الولد وارسل مرة ثانية أبوه خط ولا رد
 عليه ويكتب له خط ثالث ولا كتب فيه شيء روح ظرف فاضي وارسله للولد قال
 ابشوف هو يرد ويرجع وإلا لا . أبوه بيب يرد عليه لو وريقة فاضية صغيرة يتظمن
 عليه ، أبوه مرسل له وريقة فاضية بيبه يحمق وإلا بيبه يقول أنك ارسلت ورقة فاضية
 حتى هذي ما رد عليها قال أبو ماجد هالقصيدة :-

قالوا بكيت وقلت ضيق وحماقه
 ابكي وانادي بالبكا من غدالي
 ابكي شره وابكي محبة وفاقه
 وابكي هلع وابكي ولع من هبالي
 ابكي وخوذوا من ضميري غلاقه
 ماهو بودي بس طار طرى لي
 ابكي على حي صعيب فراقه
 الاول التالي شريدة عيالي
 ماجد ترى امك ماخذيته عشاقه
 اخذتها من شان تربة خوالي
 ابيك تعرف بالوفا والطلاقه
 تاقف قبال امك وتاقف قبالي
 ماجد تراك ادعيت قلبي حراقه
 وانا احسب انك بالوفا راس مالي
 خدعتني وانا لحمتي رفاقه
 ليتك كبير انساك لو انت غالي
 تركتني في هالظروف الدقاقه
 ماكن لك في مهبط الوحي والي
 ما يمكن ارضى انك تقص العلاقه
 قدام يظهر من شعرك الموالي

اخشى على عقلك بسن الرهاقه
 توك بسن ما ينفه حبالى
 حاربتنى من شان عشق السواقه
 يالله عسى حظك بها مثل مالى
 خف من جليل الملك ياها الشفاقه
 يكفين منك انى بمكه لحالى
 ارسلت لك خط والاخر لحاقه
 والثالث اللى جاك بالزرف خالى
 ابيك تزعل كان عندك حذاقه
 تكتب بدال الزرف خط الهلالى
 خط يجينى منك كبر البطاقه
 يسوى جميع اللى معى من حلالى
 ماجاك منى شى يضر الصداقه
 اسألك عن حالك وابلغك حالى
 هذا وانا يا بوك مانى بعاقه
 الحمد للمولى طوال حبالى
 لاشك ماودى تتم انفهاقه
 ماظن تلقى والد لك بدالى
 درع حصين موثقات حلاقه
 ياقف بصفك عند طامن وعالى

ان طعت شوري خل عندك لباقه
لامك تراها من بنات الرجالي
واعرف ترى حقه بمتنك وساقه
ولا ينطح الثقلات غير الجمالي
اكتب ردود الخط وابرق براقه
ترى الورق والحبر ماهو بغالي

هذي هي القصيدة اللي ارسلها أبو ماجد لولده بيبه يرد لكن ما رد وعقب
وقت طويل ادرك ماجد انه مخطي ، وحننا نستفيد من هالقصة أن دايم الولد غالي
عند ابوه وان المفروض يراعي ظروف ابوه ومثل هالحالة بيبه ابوه يصير بجانبه
الايمن وعنده وملاحظ له وحوله راح وخلاه الله يهديه بس عقب فترة عقب ما
جاه الخط هذا ولد الأسرة والحمولة الطيبين لا بد مهما شطح ولدهم لازم انه يرد
ويعقل ويصير رجال ويصير بجانب ابوه .

وفيه قصيدة لواحد من اصدقائي في الوقت الحالي عن غلا الابو لولده
للشاعر فهد بن عبدالعزيز الفايز شاعر معاصر وأبوه شاعر من النواصر من تميم
يقول فهد ويسند على ولده عزام يوم أنه نجح وجاب الشهادة يقول :

عزام جاب اليوم تقدير ممتاز
عساه دايم ناجح بامتيازي
وإلى كبر ليته يجي مثل بن باز
وإلا وزير وشاعر مثل غازي
وإن يسر الله نحتفل به إلى فاز
بأعلى شهادة ونحضر له جوازي

عسى السعد فاله لتحقيق الانجاز

وحظ يباري له بخط موازي

له صورة بأقصى الحشى وسط برواز

برواز قلب ما يجيه اهتزازي

فيه سالفة صغيرة طريفة، هذا واحد له ولد وجوا اصدقا ولده وقالوا لولده
حنا شفنا ابوك في المجلس الفلاني يكذب بعض الاحيان كذب ما يدخل العقل
وحنا خايفين ينقد عليه احد ودنا انك تقول لابوك وتشير عليه يخفف من
السوالف اللي فيها كذب كبار ما تدخل مع البيبان ان كان ولا بد كذبة صغيرة
خفيفة فيها مزحة، عاد جا الولد وقال لأبوه ترى اصدقاى ناقدين عليك بكذبك
وقال ابوه انا وش مريبك له ومخليك عندي الا ابيك تتبه لي هماي اقول لك
تعال معي للمجالس الى حضرنا مجلس، علشان تتبه لي وانا ابوك تعض برطم
تغمز بعين علشان اعرف، ويوم جا باكر ويروح الولد والابو عند واحد رفيق لهم
يجتمعون عنده ويوم دخلوا عليهم في المجلس والى هذولا جالسين اللي يتقهوى
واللي يلعب ورقة وهم قعدوا يسولفون قام واحد في المجلس وسأل ابو الولد .
يا أبو فلان وش صار على ارضك اللي عطوك الحكومة قال تعاني الارض اللي
في المكان الفلاني الواطية قال ايه قال ايه ارتفعت عليها الشوارع يمين ويسار
وغدت حفرة قال طيب ما سويت فيها شيء قال إلا كنك حاضر قال وش سويت
قال حطيت عليها لوحة وكتبت عليها (مسموح وضع التراب في هذه الارض)
قال زين اجل بيدفنونها لك ببلاش قال ايه اشوى دفنوها قال طيب يمكن يزيد
ثمنها قال لا لا انا يوم شفرتها انها تواست كتبت لوحة ممنوع وضع التراب في هذه

الارض وجاب الله المطر ورصها بالسيل وتواست قال له طيب حوطها علشان ما يجي احد يكب فيها شيء مرة ثانية قال الابو ككك حاضر حوطتها بسور وخطيت لها باب من شمال وباب وسيع من شرق تدخل معه السيارة قال اجل ناوي تسويها استراحة قال ككك حاضر ناوي اسويها استراحة قال له زين عساها كبيرة وتصلح قال الابو اي بالله تصلح مساحتها خمسين في عشرين متر وزرعتها ودخلت فيها الكهرب والماء والتلفون وسأله قال بنيت فيها شيء من داخل قال اي بالله ككك حاضر بنيت فيها خطيت فيها من الجهة اللي تدخل فيها السيارات مغاسل ودورة مياه وغرفة للحارس وغرفة خليناها مستودع قال اللي سأله الحين يبي لها بيت شعر قال الابو ككك حاضر حطينا فيها بيت شعر قال له عساه كبير كم مساحته قال عاد الابو مساحته مية متر في وقبل شوي قايل مساحة الارض خمسين في عشرين متر - يوم قال مية متر ويتنحج الولد وقال الابو في مترين ، هذا من الكذب اللي ما يتصدق وضحكوا الحاضرين وسولفوا ، هذي من الطرايف اللي حبيت اقولها لكم .

ودمتم سالمين .



صياح يتيم

كانوا الناس فالزمان السابق يعانون من القل في كل شي في السكن والمعيشة والكسوه وكل متطلبات الحياه ليست متوفره كما ينبغي والمرأه فالبيت تعتبر ساعد الرجل الأيمن على قضاء كل أكثر الحاجات من طبخ وغسيل وتدبير بعض الأمور حتى في غياب زوجها هذا بالإضافة إلى تدبير شؤون تربية الأولاد وغيرها وذات مرة حصل لمرت الشاعر/ مرشد بن سعد البذال مرض ألزمها الفراش ولم تتعفى منه وادخلت المستشفى وجلست حوالي عشرة أيام وهي مريضة ما تشعر باللي عندها من شدة المرض وكان من ضمن عيالها اللي راحت وخلته ورع صغير مره لا يحسن حتى الجلوس على حيله .

فكان اللي متولي رعياته في غيابه أمه أبوه مرشد وابوه رجال مشغول في عمله وتبعان من مراعاته لحاله أم الولد الصغير فتضايق من عدم معرفه لمراعاة حاله هالولد ما يعرف وشي يبي وش فتضايق من عدم معرفه لمراعاته الوالد ما يعرف وشي يبي وش يشتهي متى ينام وشلون يرضع ما غير شايه ويدور به الين يجيه النوم والى نام ما يديه يغفل الا وصاح ثاني مره وكان ساكنين في بيوت شعبيه متلاصه البيوت جنب بعضها غالبيتهم باديه ويوجد باسفل السوق اللي فيه بيت مرشد راعي دكان بقاله قريب .

الدكان مستقطع من أركان أحد البيوت يعني دكان شعبي فيه بقاله أوليه يعني ملعبات قديم ويبسي وصلصله وحليب أطفال بودر ابو ولد اللي قوطيه ارزق ودفاتر ونعال وبسكوت وقاز وشاي وزن وكل شي رخيص وبسيط الحاصل ان

مرشد شايل هالبزر على كتفه ويلهيه من البيت الى الدكان وما يتحمل أن يسمعه يصيح لأن صياحه يكسر القلب (صياح يتيم) وما غير يدور به يمين ويسار وكانت هذي حالة الولد لأنه مرض عقب ما فقد أمه لأنها هي اللي تعرف لدبرته وضعف يوم فقدها وغابت عنه فكان الولد جسمه منخشل وضاعف ومصفر لون وجهه وعيونه مغوره ومنتقطبه يعني ما يفتح كامل وبراطمه يابسه تخرفش ويابس ريقه المسكين ويطنه منتفخ وفيه غازات وعليه حراره تفككه شوي وتركب عليه وكل شي يوجعه بس ما يعبر الا بالصياح ولاهوب صياح قوي يالله تسمعه بس يكسر القلب ولا يستمر على شي متعب ابوه اللي يشيله وهو ماتعود ان ابطاء وهو نايم وان ابطاء وهو قاعد وان ابطاء وهو مشيول ما يعرف يخض له الحليب فإذا ما خض زين سبب له غازات مزعجة .

وابو ما غير يطلب الله ان الله يعافي أمه حتى تجي تولاه . وقال ابوه بحكم أنه شاعر جزل وحكيم قال قصيده يناجي فيها ولده ويذكر معاناته وما يعمله معه وإن ماله جلد على حملة وأن هذه دبرة الله فيه ويسند فيها على أخو الولد اللي أكبر منه اللي اسمه عبيد ويقول يا عبيد أن أمك ما فيها شدة له ولو هي طيبة إن كان تلقاني مستريح من عناءه لكن عساء الله يجيها تريحني منه لكن الشكوى لله أنه يفرج لنا وكذلك يذكر محاسن زوجته وصبرها وان ليست مثل كل الناس وانها هي تفرق عى نساء الفريق بصبرها وجلادتها وان ما عمرها أغظبتي ولا عمر الجيران شافوا منها أي عيب وليست بخيله على جماعتي وربعي أو ضيوفي اللي أعهمهم وليست كثيرت الطلعات من البيت وأنها دايم ثابتة ورزينة ولا كل يوم داخلت عند ناس ابدأ لها احترام وتقدير عند الكل ولو لا سمح الله راحت وين ابلقاء مثلها ويقول الشاعر/ مرشد :-

هذه القصيدة يناجي بها طفله أثناء مرض أمه :

الورع عيا لا يوافق على النوم
 قام يتهشم ويتزايد عويله
 ادوج به وسط الدكاكين وأحوم
 ادور اللي يشتهي واشتري له
 وإذا نشدته قال ما عندي علوم
 يقول أبي أمي والسوالف قليلة
 مالي على شيله جلاده وتعلوم
 مير الدهر خلاني اليوم اشيله
 يا عبيد لو أمك بها قوة عزوم
 الورع والله ما اعترض في سبيله
 انك لتلقاني مكفي ومحشوم
 وهي بشوفاته بصير دليله
 يا عبيد أنا يا بوك ضايق ومهموم
 اضحك وفي كبدي سوات المليله
 أضحك واوسع خاطري وابعد الحوم
 واطلب عسى تالي العواقب جميله
 شكواي للي يفرض الحج والصوم
 وإلا البشر يا عبيد ما ينشكى له

ما جور يا للي بالعلاج أمس واليوم
الله يجيرك جعل ما هي طويلة

يا صاحبي لو كان بالبيع والسوم
كان اشتريك وتشتريك القبيلة

لاشك ما دبّر على العبد مقسوم
حيل الله أقوى ما باليدين حيله

يا عبيد أنا يا بوك ماني بليوم
الغبن غبن منقضات الجديدة

بعض النساء يا عبيد تقنيهن القوم
واللي كسبها قال عندي حليله

لي صاحب في وقتنا اليوم معدوم
اليافقدته وين أبا ألقى مثيله

عذروب خلى شارة فيه مرسوم
يتبع غضب نفسه ويرضى قبيله

والجار يطي ما شطى منه مثلوم
ولا هي على رواد بيتي بخيله

ولا هي من اللي تطرق النزل وتحوم
دايم على الفرقان يومي شليله

وبالختام:

ارجو ان تنال هذه السالفه والقصيده اعجابكم ورضاكم وان يكون منها

انشاء الله متعة وتسليه وفائده للجميع والله الموفق.



Obeyikanda.com

العجيمي عند الديان

هالسالفة عن شاعر مغمور، انا دائما احرص على الشعراء المغمورين اللي محد يعرفهم ولا طبع لهم شي وماتوا بعضهم ماينعرف له الا قصيدة او قصيدتين في صدور بعض الرواة، ولهذا ضاع اكثر قصيدهم. بعض الشعراء اللي ماتوا وماكتب لهم شي، الرواة ماقصروا وكتبوا عنهم مثل الشيخ عبدالله ابن خميس والاستاذ/ أحمد الدامغ وفايز الحربي ومثل ناصر المسميري الف كتاب عنهم ومثل ابراهيم اليوسف ومثل بعض الاخوان في الخليج ومن منطقة الوشم شعرائها يوم جوا بيكتبون عنهم ولا اغلب الرواة اللي يحفظون الشعر كلهم ميتين يعني مالقوا لهم الا على قصيدتين او ثلاث والاخ سعود اليوسف ماقصّر جمع قصايد شعراء اشيقر وشعراء الوشم في كتاب، كذلك عبدالله الضويحي ايضاً الف عنهم، لكن فيه بعض الشعراء المغمورين اللي محد يعرف عنهم شي وهم اعلام ولهذا دائما اذا لقيت قصيدة لشاعر مهوب معروف ومحد يعرف عنه شي وهو بارز في وقته احاول اطلع له ولو قصيدة وحده مثل ابو دباس مايعرف عنه الا قصيدة وحده ومثل بداح العنقري مايعرف عنه الا قصيدة وحده وفيه كثير من الشعراء وخاصة شعراء نجد، كانوا الناس مايهتمون بالكتابه والرواية.

ومن الرواة المشهورين منول قبل لا تجي وسائل الاعلام: عبدالرحمن الزبيعي في عنيزه، كتب بخط يده ٢٤ مخطوطه حسب المعلومات اللي سمعتها من كبار السن اللي قبلي، ومعه كتاب ثاني كبر دليل الهاتف دايم يحطه في ابطه، هذا اذا بغى يسيّر لأحد يقرا منه لأن بعض الرواة مايحفظ لازم يقرا قرايه

وهاالمخطوط مهوب يعيره لأحد ومسميه المحرول يعني ماله رجلين ودايم في ابطه، واذا جا في المجاس وقالوا له يالله ياابو ابراهيم سمعنا، واكثر تسميعة الله يرحمه كان ديونه يعني يجيب القصيدة بلحن، والديونه لحن واحد عند اهل نجد لكل القصايد، يشيلها ويركبها على أي صوت ويسمعا للي في المجلس وهذي طريقتهم منول.

وفيه رواة ثانيين غير اللي كتبوا مثل ابراهيم الواصل وواحد يقاله غانم الفهد، لكن اللي ماله كتاب والا اللي مااهتموا عياله ضاع اكثر القصيد اللي رواه.

والشاعر اللي ابتكلم عنه اسمه محمد ابن عبدالعزیز العجيمي من شعراء مدينة القصب ديرة حميدان الشويعر الله يغفر له ويرحمه، انا هاك الحين صغير عند ابوي يمكن عمري ١٢ سنة وابوي يهتم بالشعر الشعبي ويهتم بالشعراء ويعزمهم فيوم جا مرة من المرات اذكرها انا حتى في القيص قال: ياابوي. قلت نعم، قال: رح صل في مسجد المعقليه واذا صليت العشاء في المسجد خللك مع الباب الشمالي بتلقى شايب اعمى معه عصا وعليه شماغ وبشت جبر، اسأله قل انت العجيمي؟ اذا قال ايه اقضب يده و جبه للبيت، تراه مايشوف، قلت ان شالله ياابوي، ورحت فعلا وجبته.

هاالكلام الله العالم في حدود عام ١٣٨٣ هـ وقلطناه فوق في ديوانيتنا، منول الروشن فوق وقهويناه انا اللي اصب ويوم تقهوى الرجال وشرب الشاهي، راح ابوي وجاب هاك المسجل الكبير وقال يالله ياابو عبدالعزیز سمعني القصيدة اللي قلت لي، والاه قاضب العصا بيده اليسرى وقاعد على رجله اليسرى وركبته اليمنى واقفه، وشال القصيده بلحن وكان يشكي فيها من الفقر ومن احوال الدنيا ومن الحظ اذا صار تعيس عاد هذا حظه يقول الشاعر:

ان جاد حظك باع لك واشترى لك
فوايد من كل الابواب تاتيک

فيشكي في القصيدة من حظه ومن الدنيا مسميها بقعا واقفة له دايم وانه
تطالب هو والدنيا والفقير.

وقال له ابوي شلها يا ابو عبدالعزيز بلحن على شان يحفظها محمد اللي هو
انا وحفظتها، فيقول في القصيدة:

قال القايل بأول قـيله
جواب عدل تفـصيله

اللي مـاياخذ من رايه
عند القاضي من يقضي له

واللي مـايقدح من زنده
قدحه من غيره فشيله

تري الدنيـا في زايل
تقصر ولو هي طويله

ياحظ اللي يزرع فيـها
زرع مفهموم حصيله

والحصيل اعمال زينة
اعمال توزن ثقيله

من سـوا المنكر ثم افكر
للتكبيره والتهايله

للتوبه باب مفتوح
مفتوح وعنده وكيله
والله في حكمه ومراده
في الدقيقه والجليله
ترى كل امر تعسر
في هالدنيا المستشيله
ماعلى الله شي كايد
اسرع من عسره تسهيله
الله ماحبي للخير
والشر الله مابغضي له
بقعا غثتني مغهته
كثر المغثه وشي له
يابقعا وش لك باكلافي
تصدير ببلا تبطيله
رذلتيني في شبابي
والتباب اكود ترذيله
لبستيني ثوب شين
ثوب مكروه تفصيله
يوم ان الفقير يطاوع لك
هو وشهو لك من قبيله

قالت هذا اكبر عيلاني
اللي يصغي لي واصني له
ترى هذا شوية حربي
اللي مدعيكم سحيله
وانا يمينه ويساره
وازيد الحمى مليه
يا بقعاه قوه لشرع الله
اللي للغاوي دليله
قالت لي روح يا جاهل
كم غرير وري له
يا بقعاه ماشفتي حظي
اللي قاويني بالحيله
خلاني في الريدا كني
تمبيل كمل بنزيله
الله ماهبلي هبله
ابي من بقعاه تشكي له
مثل اللي يزرع في الطايه
ما ردى منه الا عميله
بقعاه لاقتني في السوق
معها ملقوف تغضي له

قالت له قم طق ذراعاه
عن هرجه هذا تنكيله
قلت الله يقطع هالهرجة
من ذا جهيده واعزّي له
الله يا حيف في بقعاه
تري ماكل تصفي له
احد تركض له بالحيل
واحده بخطاهاتمشي له
واحده تجي له زحافه
واحده عنده مستحيله
كم غرغور مثل الغرسة
ما فيها ولا حسيله
مركوز عند الركبة
بين البركة والثيلة
ما يدري وشلون الدنيا
هي غبرا والا جميله
الدنيا فيها كيفات
الله اكبر يامن هي له
يالله ياللي نرجي منه
يا ابا العطايا الجزيله

ياما عند الله من خير
عنده خيرات فضيله
الله ياعود لاقواني
شد جرانني وش عندي له
يوم ان العود امتاوزني
مدري من هاللي يفتي له
والله ما عندي له عيش
ولا عندي له رميله
والكسوه مقطوع دسمال
هلب الخياط بتشليله
وبشيت من نوب عويدي
بجالال المشط يسدي له
قالوا هذا الفقير الكايد
بالك تجزع من تنليله
تعوذ منه وقل يالله
ياربي لاتجعدني له
واطلب ربك في صلاتك
في الفريضه والنفيله
بالك تقول مطاولني
تري الله يقدر يزيله

الياس بدخلك النار
 ترى الياس اكبر تضليله
 من سوا خير في الناس
 كل بالجنة يدعي له
 ومن سوا شر في الدنيا
 قالوا يانار اتسعي له
 ولا للناس الا الصالح
 والفساد له من يتكي له
 لاتاخذ علم من جاهل
 تجهل مثله في تجهيله
 دور لك رجال صاحي
 ماتلقى مثله في جيله
 أيا ورد الشط الجاري
 وأيا اللي يارد ثميله
 وراد الشط اللي ورده
 حدر بانهار تجري له
 والتميله من جا اليها
 والله مايملا صميله
 من هالدنيا واعزالي
 واللي مثلي واعزي له

انا وايا الفقرا اصحاب
هو ينزي لي وانا انزي له
والى منا تنازيننا
عند الديان افـنـخي له
اشكي والشكوى الى الله
نعم المولى يوم اشكي له
صلاة الله واسلم
على النبي اشرف جيله

هذي قصيدة العجيمي يشكي فيها الفقر وهذا حال الدنيا، الله سبحانه
وتعالى وزع الارزاق على العباد احد يخلق فقير وربما ان الفقر ازين له بعض
المرات واحد يصير غني وتلقاه بعض المرآت مستضر من غناته .

في وقتنا الحاضر بعض التجار والاغنياء مايشي الا وشنطة الادوية معه هذا
عن الضغط وهذا عن السكر وانه يتمنى الى مران حاله مثل هالعامل اللي يوم
يشغل ويومين يقعد مايلقى شغل .

ومحمد العجيمي رحمة الله عليه اخر ايامه وتالي وقته شفته انا، رحت في
زيارة للوشم ومريت عليه في ديرته واخذته بالسيارة وقعدنا نتمشى شوي
وجلسنا خارج المدينة وتقهوينا . قلت : وشلونك ياابو عبدالعزیز عساک طيب
وش علومك؟ قال : والله ياولدي تركت القصيد، القصيد ماحصلت منه خير
وانا يوم كبرت انصرفت للقران، فكانت ذاكرته جيدة في الحفظ فحفظ القران
وصار يقرا على الناس وصارت خاتمة خاتمة خير . الى أن توفي رحمه الله .

الأم وزوجة ابنها

القصة والقصيدة جرت على الشاعر ابراهيم ابن عبدالله ابن جعيثن رحمه الله ، ولد في مدينة التويم بأقليم سدير عام ١٢٦٠ هـ وتوفى في نفس المدينة عام ١٣٦٣ هـ، كان بالاضافة الى انه شاعر راوية لغيره وله ديوان مطبوع ويعتبر شاعر سدير الأول لأنه طرق كل ابواب الشعر المديح والغزل والحكمه والوصف وطلب الخير والسييل وقد قال قصيدة في جماعته يطلب لهم الغيث اللي مطلعها يقول :

ياالله بنو للرعـد به زلازـيل
ينشي من القبلة صدوق خياله
ينشي الضحى وهو اسود كنه الليل
البرق به مثل الضوي اشتعاله
يحدأ ركونه مثل زجر المحاحيل
وعياز مزنه مثل دامر حلاله
والى انتهض ساق السدى بالهماليل
مثل النعام اللي تزايد جفاله
من واحد ماهوب منان وبخيل
رب كريم وكل حي يساله
سيل يعم سدير من غير تفصيل
عقب اربعين الحول يذكر كماله

هذي قصيدة طويلة وله قصايد في عدة مناسبات ، وبالإضافة الى انه شاعر كان يروي لغيره ، فيسولف علي الراوي الكبير رحمة الله عليه محمد ابن عبدالرحمن ابن يحيى اللي ألف كتاب (لباب الافكار من غرائب الاشعار) ثمانية مجلدات مخطوطه لم يطبع منها شي ، ماتين منها على الساحة الا اثنين فقط فكان يعتبر من الرواة المعدودين وابراهيم ابن جعيشن هذا عاصر محمد بن عشبان من ابرز شعراء مدينة جلاجل ، لحق عليه ابن جعيشن وهو كبير في السن وابن عشبان معاصراً لحميدان الشويعر ، زايه ثلاث مرات في حياته ، زاره مرتين في القصب ومرة في اثيشيه ، ابن عشبان اخذ قصيد حميدان ونقله لابن جعيشن وابن جعيشن نقله لابن يحيى وجمعوا كتاب حميدان الشويعر ،

هذي نبذه بسيطه عن ابن جعيشن رحمة الله عليه ، شاعر معروف وله قصيد غزل جميل وله قصيدة منها يقول فيها :

لقت حي يجلي الهم بالزين
وانساح بالي يوم شميت ريحه
وهجيت باب الوصل بين المحبين
من طاح لابهده يسهل مطيحه
ياونة ونيتهها يوم الاثنين
ونة صويب معطب به جريحه
أو ونة اللي له بني مـزايين
شايب و ورثه دروب الفضيحه

وله قصيده يقول فيها :

البارحة ليلي عسى الله يعوده يازين وصل الليل من بين الاحباب

والآن هذي قصيده عاطفيه له ومناسبتها :

ان فيه واحد من اهل ديرته راح للخليج يدور العيشة ويوم يطلع من ديرته التويم ماكان في البيت الا أمه عجوز وابوه متوفي ، هالام بنت حلال اجوديه وراعية طاعه مالها حس من حبابتها وطيبتها الله يرحمها، وله زوجة في البيت وله اخو صغير ويمكن له وليد أو بنيّه لكن هذولي الاسرة الرئيسية في البيت .

هالولد اللي راح يشتغل في الخليج ويدور العيشه كل ماتم له فترة ومضى عليه مدة جمع له قريشات وروح لأهله صوغة ، ، والصوغة عبارة عن لفافه مثلا مندبل كبير يلف فيه شي او كيسة يروح فيها لاهله صوغة (لأمه وحرمته واخوه الصغير وعياله الموجودين) وهالرجال اذا كان موجود عندهم تظاهرت زوجته عنده انها تحب أمه وتغليها واذا صار مهوب فيه توريتها سوء العذاب وماتعطيها تقدير وقيمه، الحاصل ان هالولد صحيح مسكين اذا جا يرسل الصوغة يكتب عليها الى زوجتي العزيزة فلانه بنت فلان وتجيهم الصوغة ويوم جت هاك المرة والاه مروح الصوغة مع رجال، وها الرجال طق عليهم الباب وقال : سلام عليكم هذا بيت فلان قالت نعم قال هذي صوغة مروحها لكم ابوكم ، وعطاهم اياها ، وقومي بالمرّة وتفل الصوغة قدام أمه وهالام كن عيني تشوفها بنت حلال يدياتها ووجهها بيض من الطاعة ويديها فيها حنا ناعم ومعها مسواك، ويوم فكت الزوجة الصوغة^(١) وطلعت الى فيها والاه مروح لأمه كيسة حنا وغرشة طيب

(١) أحد يسميها صوغة واحد يسميها بقشه واحد يسميها طرد.

وجلال صلاة وكسوة للأم تتناسب مع عمرها ومعهن رسالة منه لأمه باسمها
 جدعته عليها مرته قالت خذي هذا خط من ولدك وقامت الأم وخطفته وحطته
 على وجهها وشمته وعلى قلبها وعيونها تدمع وتقول يا هلا بريحة ضناني وخلت
 واحد من عيال الجيران يقرأها عليها وكلما قرا سطر بكت الأم ما غير يتهشم
 صدرها بالبكاء وعيونها تهلهل .

وحاط هو في الجهة الثانية من الصوغة لمرته خماخم وزمام ومعاضد
 وقارورة طيب وكيسة لبان، من يوم فكت الصوغة اول مافاض عليها اللبان
 تاخذه وتعلك قدام امه تبي تحرها، وبالأضافه الى هذا كله مروّح لهم فلوس في
 صرار مصروف لهم وقامت المرة تقيس اللي ارسله لها رجلها وتفلل وتقول أي
 بالله يعرف مقاسي تبي تحر أمه، بيض الله وجهه وقالت الام: استحي على
 وجهك انا الكبيرة وانا الأم عطيني الدراهم انا اللي اصرف على البيت وعطيني
 الصوغة انا اللي اقسّم . . قالت: لا يا حبيبي انتي حرمته؟ شوفي وش هو كاتب
 على الصوغة الى زوجتي العزيزة، انتي زوجته؟ اقعدي هناك لين اعطيك انا،
 وبعد ايام راحت الأم لابن جعيثن لأنه كان من جماعتهم وساكن في سوقهم
 وقالت لمرت ابن جعيثن ابيه الله يجزاه خير يكتب على لساني قصيده رد على
 فعل ولدي اللي مسوي كذا كود انه ينتبه ويصير رجال ويعقل ولا يخلي مرته
 تشيخ عليّ أنا بأمه الى صار ما هوب عندنا وقام وكتب القصيدة وارسلتها له وهي
 تقول فيها ان خطه اللي جا منه اعتبر مثل قميص يوسف تعد وتمد متى يجي
 ويعود ولدها وتطلب له ان الله يرجعه .

ويقول الشاعر على لسان الام في القصيدة:

لفاني كتابك ياسراج نظير

والدمع من عيني عليه نثير

لفاني وحطيته على القلب فرحه

وبشرت من لي صاحب وعشير

كنه قميص ليوسف يوم جابه

لأبوه من بعد الفراق بشير

من يوم وصل بها البشير وشمه

فتّح وهو من قبل كان ضرير

خيار مابه كلمة سرنى بها

يقول حق الوالدين كبير

عساك تذكر حقهم يا وليدي

وياجعل خيرك مايزال كثير

حملتك تسعة اشهر في شواكلي

والبطن منى ماقع وجفير

حملت بك كره وكره وضعتك

وسعت لك حضني وصار سرير

ورضاعتك حولين من در مهجتي

ارعاك بعيوني عن الخطير

ابيك لعازات الليالي ذخيره
 ما بيك تشفع لي بيوم كبير
 حتى بلغت الرشد و ابصرت نفسك
 وقدري غدا عند الرجال حقيير
 قلّطت بنت الناس وانا نسيّتني
 و حطيت فوقى بالولاة امير
 خف الله ما قبلك حدن بعد امه
 وقلّط بنت الناس كيف يصير
 خف الله في امك لا تجيك العقوبة
 ولا تاامن الدنيا مداه قصير
 خف الله واذكر آيتين نسيّتهن
 وهن تراهن للبصير نذير
 ما قال الله لا تقل لهما اف
 واجعل لهم منك الولا يسيير
 و اخفض جناح الذل لهم برحمه
 وقل ربي ارحمهم ربيت صغير
 خف الله واذكر حفرة مدلهمه
 يحاسبك فيها منكر و نكير
 تراك لو غثيتني واغضبيتني
 دعيت بلساني عليك كثير

مهور بغض لك فلا شك شرهه
عليك والوالد عناه كبير
تراك لو حجيت بي فوق راسك
ثمانين حجه مابلغت عشير
ولاتجازيني عن الطلق ساعه
الى قام قلبي من حشاي يطير
وصدري يفرض بالسكاكين كنه
يهذب بسيف الباتع الشطير
ولاعاد في بطني ولاعاد في ظهري
ولاظنتي ارجي يعود صغير
الا انت واخو لك بزير صغير
مافيه لأمر الرجال بصير
مير انني ارجيه يحضى بكبرتي
واذوق نفعه قبل ازور حفير
وارجى الذي وداك يرجعك سالم
علي فان الله عليه قدير
ويرزقك رزق واسع ما حسبته
وترد يا بني والعدو حقيير
وصلوا على سيد البرايا محمد
ملاح برق وما حفر من بيير

والحقيقه شان الام كبير ويجب على الرجال انه يداري حق امه ويتفقد وضع زوجته مع امه من بعيد من غير مايدرون ويشوف معاملتها معها، والناس ولله الحمد لايزالون بخير وعيال فطره وناس اجواد لكن احيانا يوافق حريم ما يخافن من الله.

وهذي من القصايد اللي تعتبر مثل الدرس للزوجه والولد.



من تاب تاب الله عليه

السالفة التالية عن الشاعر محمد ابن عبدالعزيز العجيمي رحمة الله عليه ، من شعراء القصب البارزين ، شاعر رد ونظم ولكن توفي وماتبع له شي من الدواوين ولا جمع قصيده لأنه في اخر حياته انصرف الى حفظ القران الكريم ، والقصيدة اللي معنا الان فيها شي من الموعظه للناس والحكمه والموعظه دائماً يسمونها ضالة المؤمن يدورها لين يلقاها .

الرجل هذا حسب ماسمعت كان في بدايته يوم انه نشيط يشتغل في النخيل و من اللي يحفرون القلبان ويقال والله اعلم انهم وهم يحفرون قليب هو ومجموعة معه ثار عليهم ديناميت اثر على عيونهم وماعالج ولا شي لين كف بصره وصار ماعاد يشوف وتأخر في امور كثيرة ماتحصل عليها والفقير مثل مايقول الاولين الفقير يحدث في الرجال عيوب ، فقال قصيدة عجيبه فيها يوجد ويتمنى ان الله سبحانه وتعالى يرد له بصره وتمنى انه يشوف طويق وتمنى يشوف الفريده (مواقع حول الرشم) وفوق هذا كله يتمنى يحصل له لو يحجج وياطا برجله على المروه والصفاء ويطوف حول الكعبه ويحب البيت ويرجع لأنه كف بصره وكبر وشيب وهو مادي فريضة الحج فيقول في هالقصيده حسب ماسمعتها منه :

سلامي عد ما ناح الحمام

سلام الباهشين الفارحيني

ترحل يا نديبي فوق حرة

عليها الكور ريف المعتليني

عليها الدل يحا طبق اثرها
حلى ما يشغلون العامليني
تنحر واحد للعلم راسي
كما عدُّ رسا للوارديني
وانا في ضامري هرج مكني
واماري به جميع القايليني
تهلهل من صناديق الضماير
كما دبوا دنت للذايديني
بنينا بالشعر قصر تعلت
فروعه بالسما من غير طيني
حديد والحديد اقشر قساوة
حديد من حديد ما يليني
يرتب فيه تسعين الف نادر
من ابطال القروم الفارسيني
على خضر تحدر من سماها
على شوب العدا متخالفيني
انا نقلت هم لو تشييله
ضلوع طويق طارت كالطحيني
الا يا ونتي ونت محسر
كسير الساق بين الكاينيني

لا هوب اللي غدا والموت راحة
ولا سلف مع اللي سالفيني
والايا ونتي ونة ربيط
ربيط في حديد الحاكميني
تحري كل يوم يظهرونه
يقصونه بهندي سيني
والايا ونتي ونة معوثر
على فرش القصا جر الونيني
لا هوب اللي طوى ياس العوافي
ولا عوفي مع اللي طيبيني
ولا يا حزن قلبي حزن عذرا
لها ستة عيال ملتحنيني
وابوهم سابع قفى وراهم
جميع فالقبور مقبريني
والايا تل قلبي تل ملحها
عليها الغرب وقت مشربيني
وراها كالف قلت همومه
تقفاها واهلها مهتويني
على وقت الحميم قران خامس
عقبتها تناظرها رسيني

غدينا مثل سارين بغدرا
 عن اللي فيه خير تايهيني
 قرينا فالهوى عشرين عام
 والا ياليت الا به ما قريني
 وطاني فيه ذنب ويش لونه
 تحسرنا منه ثم عميني
 والا يا حمس قلبي حمس بن
 متى ما حرقوه الحامسيني
 والا يا هشم قلبي مثل هشمه
 على حيد بحيد مرتكيني
 والا يا الله يا محجي ومبري
 تعدينا صياح الغافليني
 انا من قبل هاللي حل مادري
 ولكن شفت هول الهايليني
 وانا بانصحك ياللي ما قرينا
 ترا الشيطان سيد الكافريني
 الى قراك قريات خبيثة
 تعوذ في مقام العايديني
 ترا من عمل سو ما له الا
 لهيب النار وانتم خابريني

ترا من عمل خير شاف خيره
ترا التقوى رياض الصالحيني
بها انهار تداعج مستتمة
على جيلانها خوخ وتيني
وفيها من جميعات المعاني
موسعها الولي للعابديني
والا يا وجد وجدني لو وجدني
يبي يصمل ولو ربع الثميني
كفاني عن جميع الوجد كله
توسدته بامان الخايفيني
انا لكن في ثومة فوادي
مهاشير تهجرع بالخيني
حسايف راحت الدنيا عليه
طفيح القلب مانيب الذهيني
الى منه نصحني صاحب لي
زعلت وقلت هذا مبتليني
الى منه نصحني صافط لي
وعيت وتوما عاض الكيني
والا يا الله يا عالم بحالي
انا ما مثل حالي هالحيني

تحملت العنا وازريت اشيله
 وانا وايا العنا متمالحيني
 طوال الليل ما نامت عيوني
 حسيير والخلايق ممرحيني
 انا ما نيب حي في طرابة
 ولا ميت مع اللي ميتيني
 انا من قبل هذا لي رفاقة
 رفيق كبر راسه ما يبيني
 تكبر والكبر لله جلاله
 ورا ما قال ما جاذا يجيني
 انا اللي فاتني هو قطع قلبي
 كما فوت السحور الناميني
 الى كل قرا واستر دينه
 عسى الله ما يعاقبني بديني
 الا ياليت من يفتح بعينه
 على طرق الهدى مدة سني
 والا ياليت من شاف الضواحي
 طعاميس زمت دون البطيني
 والا ياليت من شاف الفريدة
 وضلع طويق وبكار تبيني

والا ياليت من ياطا برجله
صفا داجو عليه التاييني
واسلم والسلام من البوادي
واشاهد والحجيج مشاهديني
والقط سبع تسبيع عدادي
واحذفهن على رجم اللعيني
واحب البيت وانطح به فوادي
واجي من عندها متوادعيني
واكرب فوق مامون معرب
خفيف الخف مربع سميني
انا دنياي غرتني مغرة
تعالى يا مليحة طالبيني
انا باحتج قبلك يا خيونة
ترا الله ما يعز الخاينيني
ضحكتي لي وضحكك بالثنايا
قضيتي لي فلا شك اذبحيني
الا يا ويش وجهي عند ربي
والا يا خد موجي وابلعيني

والحمد لله الله سبحانه وتعالى ان بلغه الحج لأن الحج متيسر في وقته الاخير وهو مامات الاقريب ، الله العالم انه حدود ١٤١٠ او ١٤١٢ هـ، نعمة البصر مالها ثمن ودايما الواحد يدعي في صلاته وفي قيامه وجلوسه .

(اللهم متعني في سمعي وبصري وقوتي ابدا ماحييتني) فهاالرجل يوم فقد بصره تحسّر وتأذى وتأسف على اللي فات عليه في شبابه واللي يتوب الله عليه يقول ان قضيت حياتي في الشعر والقصيد ولا انتبهت وكل من جاني ينصحني ماطعته وكل هذا مبينه في القصيده ، نقول ان الله يتوب عليه والحمد لله خاتمه خاتمة خير وكانت ذاكرته في الحفظ جيده في القصيده ويلقيها بطريقة مثل السجع .

وبشيله تسمى عند الاولين ديونه ، كل اكثر القصيد المهمل اللي مثلا مهوب على قافيه مرتبه في الصدر والعجز يشال في المجالس بشيلات تسمى الديونه ، وهذي طريقة العجيمي في اكثر قصايده رحمة الله عليه وهذي من القصايد اللي مادونت وانا سمعتها منه بصوته الله يغفر له ويرحمه وحييت انقلها لكم لعلها تنال على اعجابكم ورضاكم ويكون انشالله فيها فائده وعبره ان الانسان دائما يحمد الله على النعم اللي هو معطيه في الابصار والسمع وفي القوه وينظر للناس الثانين اللي فيهم عاهات ، المريض يتمنى انه يطيب ومايصير عاله على اهله ، فنشكر الله على نعمه ونحمده عليها .



الشاعر الغزلي محمد الفيحاني

في هالسالفه ابتكلم عن شاعر من الشعراء البارزين اللي انجبتهم دولة قطر وهو الشاعر محمد بن جاسم بن عبدالوهاب الفيحاني، علم معروف من ابرز الشعراء، له ديوان مطبوع، ماجمّع فيه الا بعض من قصائده، بعضها ضاع وبعضها في صدور ناس ماتوا وبعضها في اوراق متفرقة وهذا حسب المعلومات اللي قريتها واطلعت عليها. محمد الفيحاني رحمة الله عليه ولد في بلدة الفويرط شمال قطر عام ١٣٢٥هـ حسب ترجيحات اللي عاصروه، عاش فيها مرحلة صباه وشبابه وتولى تربيته والده جاسم رحمة الله عليه، ووالده بعث محمد الى مدرسة المباركية في الكويت وتعلم فيها القراءة والكتابة ولكن ماكمل دراسته لأن اسباب المعيشه في هاك الوقت صعبة وقاسية فاتجه للغوص واخذ خبرة في الغوص لين اصبح غواص ماهر من الغواصين المهرة اللي يشار لهم بالبنان، لأن مهنة الغوص مهيب بهاك السهولة والبساطة، تبي رجال صبور وفيه قوة وشجاعة واقدام فكانت كل هالصفات متوفرة فيه.

لكن مع تقدم السنين والحياة ترك الغوص وكان يوم يتوفى صغير عمره حول الـ ٥٠ سنة، وهو كان يقول الشعر من يوم انه صغير بس انه مهوب يعلم به الا المقربين من اصدقائه اللي حوله، بعد هذا رجع لبلدته وتولع في حب فتاة من نفس بلدته وحمولته وطبعا هو يرجع نسبه من الفياحين من قبيلة سبيع، ولكن يبدو ان شروط التحجير هاك الحين حالت بينه وبين البنت اللي عشقها والحب في هاك السنين كان حب عذري وعفيف وصادق ونقي، هذي من شيمات العرب

انه مايهوجس في ضميره انه يأتي بشي من الحرام، فهو نزيه عنها ولله الحمد، فما حصل له الزواج منها، وقد طرق ابواب الشعر كلها (المدح، والغزل والحب العذري والرثاء والهجاء والوصف والحكمه) . .

وكان غالبية قصيده يغلب عليه الشكوى والالين والحنين لأنه ماتوفق في اللي يتوسط بهم عند أهل البنت اللي عشقها، يبين في القصيدة اللي بقولها ان كل اللي وسطهم في الموضوع يعطونه كلام طيب لكن بعضه مهوب على حقيقتة، ربما انه يواجههم صعوبات من ناحية الجهة المقابلة اللي هم اهل البنت . .

ومن شدة ولعه وهيامه في هالبنت قام يقول قصيد الى ان أثر عليه القصيد واثر على حياته، صار كل قصيدة فيها شي من الالين والحزن . .

طبعاً هو مثل ما ذكرت يوم يتوفى رحمة الله عليه ما جمع اغلب قصيده، واحد من اصدقائه المقربين هو اللي جمع ما استطاع عليه من قصيده لكن كل ماتموا الناس فترة طلع له قصيدة واشتهر هو بأنه صاحب الحب العذري واللي مآثر عليه قصيد الحب، اثر عليه وعلى صحته عقب ماتعدى عمره فوق الاربعين ومرض وراح يعالج في دولة ثانيه برا وتوفى رحمه الله، ويقال انه من ضحايا الغرام يعني صابه مثل ما صاب الدجيما، ومسلم الوليعي او مجنون ليلي في الزمان السابق وتوفى في مستشفى خارج دولة قطر عام ١٣٥٣ هـ يعني يصير عمره تقريبا ٤٨ سنة .

قصيدته اللي هو قالها ماكانت موجودة في الديوان انما وجدها الاستاذ حمد بن محسن النعيمي ونشرها في احد صفحات الادب الشعبي اللي كان يشرف عليها .

والقصيدة يقول فيها الفيحاني وهي من النوع اللي يسمى الصخري :

فجاني من زماني مافجاني
 وقلبني على نار وكـوانني
 ولح الحال وابرى العظم كله
 وقوسني كما الطار وحناني
 وشرق بي وغرب بي معود
 بتعذيبي عقب مراح ثاني
 ولم جيوش غاراته و دوّن
 وصار بغير ضرب الهندواني
 اقله واحسب ان الدهر فاعل
 وكل الفعل هذا من اخواني
 ولولاهم بصحبتهم خذوني
 لكان الهم ماشفته بلاني
 يغروني بوجهي بالحكايا
 ومن تحت الحكي غش دفاني
 يواروني المودة لا لقيوني
 ومافي القلب ماهو في اللساني
 وكم من واحد ادبت حقه
 ومن حقي فلا ربعه عطاني

وكم من واحد واليت وده
 ومن ودي وليفي ماولاني
 وكم من واحد جيته بطيب
 وهو بالخبث والمكروه جاني
 وكم من واحد انذر لقربه
 وهو ينذر لبعدي واقلعاني
 مثل منهو يصك الباب دوني
 ويقمعني عقب ماجيت عاني
 يظن اني غتير فيه جاهل
 يقول الباب ذا صكه فلاني
 يحسب انه بهذا القول يعذر
 وانا ادري بين شكله عياني
 وتالي قام بيديه وحذفني
 بنشاب من الصد ورماني
 وعود كالجمل ياكل بدوده
 وكما العقفا تعود بعقفاني
 الا ياليت عن ودي تنزح
 قطع قلصه وخالني مكاني
 وياليتته ماذكرني في علومه
 وكف الشر بالخير وكفاني

هفا درب المراجل والمرؤه
ولاعينت للشيمه مكاني
بليت الناس بالتجريب حتى
تبين كل مامنهم خفاني
ولا عيئت في قومي وربعي
من اللي عاني والا شفاني
ولا خذت العهد من واحد الا
تمنيت البديل منه بثاني
هفا حظي وقصّر لا يحصل
صليح له على طول الزماني
يعاهدني على خيري وشري
وياخذ من ورا عهدي اماني
لك الله ماتغير عنه لا من
تلاقي بالحقب مس البطاني

وهذي قصيدته اللي هو قالها عن حبه والاشخاص اللي كان واثق انهم
بيساعدونه ويتوسطون له في الموضوع لعله ينحل لكن هذا حظه وهذا اللي الله
كتب له ويبدو ان السبب مثل ما ذكرت في السابق تقاليد التحجير، منول البنت
اذا حجرها عليها عيال العم ما حد يقدر ياخذها غيرهم، ولهذا محمد الفيحاني
اعتبروه اهل جيله من ضحايا الغرام وكثير اللي مثله يعتبرون ضحايا الغرام لكن
مهور شعراء ومن ضحايا الغرام المعروفين ووردت اسامهم في الشعر: مجنون
ليلي، و محمد ابن راشد ابن عمار راعي الالفه اللي يقول:

الف اولف من كلام نظيفي
ودموع عيني فوق خدي ذريفي

هذا من اهل ثادق وقعد فتره فيها يرقى الجبال، يقولون اخر مرة شافوه كان
في حايل، ومنهم دخيل الله الدجيما صاحب القصيدة المشهورة اللي يقول فيها:

يا جر قلب جر لدن الغصوني
غصون سدر جرها السيل جرا

على الذي مشيه تخطي بهوني
العصر من بين الفريقين مرا

يا ليتهم في الحب ماولعوني
كان ابعدوا عني بخير وشرا

والا انهم يوم انهم ولعوني
خلوني آخذ حاجتي واتدرا

وكذلك منهم الشاعر/ مسلم الوليعي الذي مات بسبب الغرام والعشق والله
اعلم اللي يقول:

يقول الوليعي والوليعي مَسْلَمٌ
من دامت أيام الصبباء له دام

وسوف نورد قصته أيضاً في هذا الكتاب وبالله التوفيق.



الزواج من أجنبية

هذه القصيدة للشاعر / مرشد بن سعد البذال الرشيدى الله يرحمه ، وهو من شعراء الكويت المعروفين ومن أبرز الشعراء وله خمسة دوواين مطبوعه ، مرشد قال قصيدة عالج فيها وضع اجتماعي يتكرر الصراحة في كل بلد، يعني موجود في كل دول الخليج، موجود في السعودية وفي كل مكان، وخاصة في دول الخليج، وهو بعض كبار السن هالشيبان الكبار الى من رزقه الله وصار عنده دراهم واجدة، يعني هو ما يهوجس بعمل الخير، مايقول اني انا كبير سن والله رزقني ابي اساعد في بناء مدرسة في قريتي اللي انا منها والا أبني مسجد . أول ما يهوجس فيه العرس ، وين يعرس ، وين يروح .

بعض ذا الشيبان يحس ان في نفسه شوي نشاط ، ولا يشاور ولا يعلم ودلى يختخت من مكان لمكان ما يدرى عنه أحد وأحيانا يروح ياطا السريح عناد، يروح مثلا يتزوج من ديرة برا، لا شاور حكومته . . ولا أخذ أذن، ويورط نفسه ويورط عايلته مثلا بعيال ويورط حتى دولته الي هو منها، ولو دورا في ديرته زوجة يمكن يلقا لكن يروح ويغره البياض ويغره التدلع ويتزوج من برا مشكلة، المهم انه يروح وياخذ له حرمة ولا يعلم أحد، ويجيب منها ولد وبنت، ثم أنشب عياله وأنشب اسرته بهالعيال وانشب حتى حكومته . . ، أبروح اجيب المرة . . جبت المرة، وإلى جاب المرة مايكفي جيبتها لحالها، بعد بيحيب من أقاربها، وييلها بيت وييلها شقة، ونشب في قصة طويلة عريضة ماتنتهي ، وحتى يمكن هو مافيه شدة.ولا نشاط، والى تم له سنة سنتين والاه ما عاد يقدر يقوم ألا على

لحيته من ضعف العزم، وبعضهم يأذي عياله، أنا أخير واحد أذى عياله، مرة
يوسوس، ومرة يجيبون له مطوع يقرا عليه، عاد هو عيار جاب له ولده مطوع
يقرا عليه، وحطه عند ذا الي ينفث عليه على صدره، عليه ذاك الثوب، ويقرا
عليه ذاك المطوع، وتقل أنه مهوب مقتنع، عاد يقول لولده: يا عبدالله وش ذا،
قال له الولد: جايه يقرا عليك عن ضيقة ذا الصدر والوساويس، قال: يعني
جايه ذا يتفل علي، وش أنا مسوي قال: هذا يقرا عليك من كلام الله . . كود
انك تطمئن . . كل يوم هواجيس وتهوش علينا.

الحاصل ان بعض هالشيبان الي عنده حلال وراح لديرة ثانية، وإذا راح ووصل
هاك الديرة، فيها ناس جوعانين يزبنون له الشين لين يصير زين، يفرشون له الأرض
ورد، ويا هلا وسهلا، لأنهم هلكين مساكين وجاب الله لهم هالشيبان، وأحياناً
تصير الواسطة لموضوع عرسه عجوز، من عفاريت، ابليس يجيها كل يوم ياخذ منها
درس ويعود، وتزين له الأرض، ناس طيبين وناس أجاويد، ويقولون المحل
محلك، ومناك يعلمون البنت، شوفي: اضحكي له وترقري له ترا مهوب راعي
طويلة معك، وامزحي معه، ولو يقول لك مثلاً دلة موتي من الضحك حتى لو هي
ما تضحك، لو يقول لك مدخنة اضحكي، خليه يستانس وينبسط، الين تقضي
قريشاته، وتراه مهوب راعي طويلة، عاد الحقيقة مرشد البذالي الله يرحمه مثل على
هالكلام هذا وجابه بقصيدة وهو شايف هالشوفة بعينه مدري عاد شايفها هو بديرتهم
أو شايفها برا، لكنه مية بالمية شايفها برا لأنه من خلال القصيدة بين، يقول:

لقت عود ماخذ له جميلة

مزبونة من نايفات العذارى

خد كما الكهرب وعنق وجديلة
ونهود دارتهن ثمرهن صغارا
لا صار عود مثل لون الجفيلة
وإلى مشى قامت عظامه تبارا
يلقى من الي فنهن يستوي له
ماله بمشكلة البنات الصغارا
إلى حطها في وسط بيته حليله
تراه لاكبر مشكلة بانتظارا
لو ان بعض الناس يدرك دليله
ان كان عن بعض الأمور استخارا
شي ما هو لك لا تعرض سبيله
مالك بصعبات الأمور العسارا
بعض العوادة صار فيهم وسيلة
ليا عطاء الله تشوش وطارا
كل ملا كيسه وروح يشيله
والفى بدار كل أهلها فقارى
والفقر باع البنت في قوت ليلة
الضعف هدام البيوت الكبارا
والعود بالشارع تزايد هذيله
يبي العمار ومرجعه للدمارا

روح ينشد وين منزل عميله
 والا يتلفت له يجي بالمطارا
 صله على ناس ضعوف هزيله
 بيون قوت للعيال الصغارا
 مع فقرهم فيهم شطارة وحيلة
 وبناتهم متعلمات شطارا
 والكل منهم يمدحه ويحبي له
 يبي يحوزه يم مرمى القرارا
 هو يحسبه غازي وهو ينغزي له
 هو طمعة الخيال يوم المثارا
 جابوا له الزوجة وهو شد حيله
 شاف البياض بخدها والحمارا
 قامت ترقرق له بعين كحيلة
 لعبت بعقل العود لعب القمارا
 معها مدربة الذليل الأصلية
 شيب من الخيلات فيها توارى
 قالت لها اخذي خاطره واضحكي له
 دوري معه يا بنت من حيث دارا
 تراه ماهو فيك راعي طويلة
 الموت في وجهه كتب له شعارا

وارجي لعل العود يومه يزيله
واخذي ثمينك واسحبي للسفارة
ماهوب من جيلك ولا انتي لجيله
مير اكسبي من مقفيات العمارا
عود ومره الله ينفد حصيله
لو عد روجه من كبار التجارا

هذي القصيدة الي قالها الشاعر مرشد البذال في مثل هالموضوع، لكن نقول الي
صحيح مثلا محتاج وفي حاجة وأم عياله متوفية، ويبي وحدة ترعى شؤونه، ولا
هوب يفكر بعيال، ولا لقي في ديرته، ممكن يروح، شاعر يقاله ابن عويس يقول:

والله فلا آخذ غير بنت بلادي
الي عليها بالعفاف وسام
لو كان سودا تلبس الطاقية
ما للشعر في جمجمتها رسام

يقول بنت بلدي عندي أحسن من أني أخذ وحدة ما أدري وش أصلها وش
فصلها، وبكرة ينشب بأطفال وعيال، لكن مثلا شخص كبير وشخص مثلا أم
عياله متوفية أو مريضه وهو ما زال فيه نشاط لاباس، لكن مثل هالامور هذي ما
ودك يتجرأ الواحد فيها ويكابرو ويحسبون على عياله ويقول: أنا اللي على حق وأنا
اللي على صواب، واجد ترا اللي من هالنمونة، وعيالهم بكرا وبناتهم يضيعون
في الخارج، الي منها جت وقعدت لها مثلا سنة ستين ولا جازت لها الديرة،
ورجعت وان كان عندها بنات صغار تاخذهم، مير الولد بكيفه يدبر عمره، لكن

البنث هي الي عليها الخطر وهي الي عليها العار وعليها الشرف، الحقيقة يعني هذي القصيدة فيها شي من التوجيه وفيها شي من العلاج للقضايا الاجتماعية الي مثل هذي، ويجب الحقيقة على كل واحد يشوف من النوع هذا، أنه ينصح وأنه يتوسط واسطة خير، أو حتى بعض الأخوان الي ماله لزوم مثلا الي يروح مسير له على ديرة، ما تدري ألا كل يوم مسافر، كل يوم جوازه معه، والي جا الله يستر في هالفنادق الي برا، ذكرت من القصيدة الي من شوي حقت سليمان العويس الي يذكر فيها: والله فلاأخذ غير بنت بلادي، يقول ان بعضهم هناك الي جا في الفنادق، وسط الفنادق الله يكافينا الشر، يختبر ويجرب، الي اختبرها وطلعت زينة يجيبها زوجة خلال أيام، بس وش يدريك يمكن تجيك وهي بشهرها الرابع،

وسط الفنادق يختبر ويجرب

بالعهر اللي وافيات اجسام

الي اختبرها ثم صارت زينة

يجيبها زوجة خلال ايام

يمكن تجيك وهي بشهرها الرابع

برميل أمانة به ملاحا قمام

من الجرائم عد فيها وأغلط

الجيب مليان صور وأرقام

هذا صديق من زمان غايب

تبي تجدد له غلاها العام

الا وبعد في كل حول زيارة
ستين الألف يروحن شمام

هذا لابوي وهذا لزوم لأمي
دخل الضعيف راح وصل الأرحام

والله فلا آخذ غير بنت بلادي
اللي عليها بالعفاف وسام

لو كان سودا تلسب الطاقية
ما للشعر في جمجمتها رسام

ولا نقول أنه مثلا كل الدول العربية الحمد لله بعض من الدول فيها عوايل
طيبة وفيها عوايل أصيلة .

لكن العوايل الطيبة والأصيلة أن كانك صادق رح لهم، بيون بناتهم لعيالهم
لأقاربهم، ما يفرطون بيناتهم ولا يفرطون بهم ويروحوونهم برا . خارج
بلدهم . هذا وبالله التوفيق .



قصة بداح العنقري

بداح العنقري من أهل ثرمداء ومعروف من أسرة العناقير من بني سعد من تميم ومعروف عنه الشجاعة والكرم والظفر والاقدام وشاعر غزل رقيق ولما كانت أقامته في بلده ثرمداء كان يقطن عنده البعض من امرء البادية في وقت الصيف وفي مرة من المرات اعجب باشتياق إلى بنت من بنات احد امرء البادية القاطنين عنده ولكن لم يبين لبوها ذلك مراعاة في ان والدها شريب له اي أنه جلس عنده وتبادل معه العشره والمجالسة والعيش والملح بينهم ولم يرغب في ان يبين له أنه يريد ابنته الجميلة حياً منه .

ولكن لما احوالوا الي الربيع بعدما لاحت بروق الوسم وشدوا من حويله لحق بهم واستضافهم وصار ضيف عندهم وكانت عادات العرب فالزمن القديم ما يسألون الضيف عن شي حتى يمضي في الضيافة ثلاثة أيام بعدها يسألونه وينشدونه عن سبب مجيئه وش يبي اذا له حاجه وبعد مضي ثلاثة أيام سأله المعزب وقال ما جيت يا بداح إلا لك لزوم وشهوا لزومك قال بداح نعم جاي يا بو فلان اطلب يد البنت . قال ابوها والله يا بن الحلال لو أنك بدوي كان عطيتك ايها فالحال لكن علشان أنك حضري وحناء بدو لازم نشاورها هي تبيك ولا لا يوم شاورها ابوها وايلها سبق وان لاحظت في مدة الثلاثة الايام التي امضاها عندهم في الضيافة اثناء لعب اخوانها هم وياه الضحى والعصر على الخيل كان يلحق اخوانها اثناء العرض على الخيل ويغلبهم ويحتضنهم هو الحاله . ويكون له في هذه الحاله تقديراً عن والدهم فقالت البنت أفاء يا بيه أغترت في

الحضري يوم أنه يلحق ربنا ويحضنهم هذا حيثنه لعب وعرض قدامنا والا لو هو هوش ما هاش ولا أقدم هذا خيال قرى زين تصفيح فقط اي أنه ما غير منظر فقط . فلما سمعها بداح زعل وتأثر فقال يا فلانة قولي آمين قالت آمين قال عساء الله ان يجيب اليوم اللي اوريك فعلي فيه وبين ويريد الله وتقبل دعوة بداح العنقري ويصبحونهم قبيلة الفضول ويكسرونهم ويأخذونهم وطول النهار وهم معهم في حرب وقتال ومقاومه وأخذوهم فلما جاء العصر ويرسل له امير القوم اللي معهم البنت ينخاه بالفزعة فقال بداح ما أفزع لين تجيني فلانه (يعني البنت) وتنخاني ثلاثين مرة وطلبوا منها أنها تنخاه ورفضت قالت أمس أنا هازبته واليوم أنخاه لا والله فسمعتها عجوز عندهم .

وقالت مشينا أنا واياك وجيت هي وياها وقالت تكفاء بالعنقري عشر ويتبعها عشرين هاذي ثلاثين . وفعلاً يفزع العنقري ويجي للقوم قال يا قوم اللي بيبي العافيه يبعد واللي بيبي الشريتين وعبوا وصاح فيهم بداح وفدع فيهم حتى شق صفوف الرجال وذبح منهم حتى انتصر عليهم وكلما انتصر على فارس أخذ عنان فرسه وجمع الأعه جميع وعطاهن البنت وقال خليهن عندك أمانه حتى اسألك عنها ويوم شبوا نار العز والانتصار قام الامير ينشدهم عن انتصاراتهم ووقعهم وكلن يقوله وش عمل اللي أنا سويت واللي يقول كذا فقالت البنت يا بيه الحكي ما ينفع اللي قالع فرس خله يجيب عنانها فقربت المجموعة الكبيرة من الأعه اللي عطاها بداح العنقري فقالت هذا اللي جاب بداح وترى الرجال يحرمون علي غيره ما أبي إلا هو للزواج فقال بداح تسمح لي يا أمير اسمعك هالايات فقال :-

وراك تزهد يا أريش العين فينا

وتقول خيال القرى زين تصفيح

تر الظفر ماهوب للضاعيننا
 مقسم بين الوجيه المفاليج
 البدو واللي بالقري ساكيننا
 كل عطاءه الله من هبة الريح
 الله لحد ياما غزيننا وجينا
 وياما ركبناهن عصير مراويح
 وياما غزيناهم ويا ماغزيننا
 بمصقالات في يدينا ذوابيح
 يوم الفضول بحلتك شارعينا
 والخيل باخوانك سوات الزنايح
 الي انكسر رمحي جذبت السنينا
 وخليت عنك الخيل صمّ مدابيح
 والصدق عندك ميرلا تجحدينا
 هيا عطينا الصدق يا زينه الريح
 هيا عطينا الصدق هيا عطينا
 واما عطيينه والله لا أصيح
 لا اصيح صيحة من غدى جنينا
 ولا خلوج ضيعوها السراريج
 لي صاحب نهده كما طلع تينا
 عنهن جديد الثوب غادي تشاليج

صخف بلطف باعتدال بلينا
لا مشم البصر ولا هن تفافيح
يا عود ريحان بجمال البطينا
ومنين ما هب الهواء بان له ريح

فلما كمل القصيده أمامهم وهم يسمعون جميعاً شامت نفسه عنها وقال لها
تراك تحرمين علي ما ابيك ويركل فرسه ويذهب وهي تلحق به حتى تاهت على
جرة الفرس وتدعشرت حالتها ايام ثم ماتت ثم مضيت أيام وجاءت أخت البنت
اللي ماتت الي والدها فقالت هلي ذبح أختي ابذبحه لكونها أجمل من أختها
فقال ابوها أنت أمراه ما تذبحين الرجال قالت ولو حطني في قصر قدام قصره
وحط لها ابوها قصر قدام قصره وكلما طلع بداح ولا تبين هبلت بالوجه والعيون
والمبسم والجسم والجمال (كنها نجفه) المهم أنه يوم غلق حوالي السنه او اقل ويلاه
ما يقدم ولا يواخر متأثر فعلاً من حبه لها وصار عنده مرض اقعه فجاء واحد من
جماعته يبي يعالجه ولم يجد له علاج قالوا وش مرضه قالوا هذا مرض اسمه
(الوثاب) شيلوه ودوه عند طبيب في قرية ثانية يكوي رجليه علشان يطلب من
المرض واللي متولي علاجه صديق له اسمه علي ولما جاء به علي عند اللي يكون
وحموا المخاطر حقت الكوي قال هو لعلي وشي له هالمخاطر قال نبي نكوي
رجليك عن الوثاب قال من يقوله قال الطيب قال هو لا تكويني يا علي أسمع .

فقال هذه الأبيات :

يا علي هذا الموت ما هوب وثاب
مير الله الله بالكفن والرهاء به

والى حملتوني على اللوح والباب
بالك تحرمن وقفه عن بابه

والى تهايق زين وضاح الأنياب
قله توفى العنقري يا سفاء به

لي صاحب ما هو لغيري بعجاب
لا شافني قامت تلاعج عذابه

ولا شاف احد غيري تلهمم بالاسلاب
ولا شافني من فوق رأسه رماء به

ثم بعد ذلك توفي رحمه الله ولما شالوه على النعش وعلي خويه معه يقول
للناس صلوا عليه . مروا به من عند البيت اللي فيه البنت فلما طلت عليهم
وسألت علي من هو الميت قال لها بداح العنقري يطلبك الحل قالت اصبر شوي
وتطل ثانية قالت قل والله ان هذا بداح قالت قل غيره قال ابد وتقطع ثم تطيح من
السطح ميتة . وتدفن بجانبه وترى هذه السالفة سمعتها من الشاعر والراوي
صالح بن محمد الريس راعي الرس ولا أجزم على صحتها هذا اللي سمعت
والله أعلم .



من قصائد الغزل الجميلة

هذي ثلاث قصايد غزلية جميلة لشعراء معاصرين بس القصايد أعجبتني بقوتها لجمالها مع أن أبياتها قليلة لكنها قوية والا أنا أكثر ميولي للشعر القديم، لكن إلى منه تهيأ قصايد مثل هذي زينة وورقة وموضوعها زين، تصلح تتسولف إن جالها مجال والا طاري والقصايد الجميلة يعني يستفيد منها الشخص، اسم او كلمة او عبارة تطري عليه تذكره شي من هالنوع هالقصايد.

هذا واحد من الشعراء انا ابقول اسمه الى انتهت القصيدة، هذا واحد شاعر مرة من المرات، مودي زوجته لعيادة والعيادة هذي صايرة في عمارة تحتها دكاكين، تحتها محلات، سوق مجمع والعيادة نسائية ما يجيها رجال، دخلت زوجته في العيادة وماسكت سرا ما وصلهما الدور فمل هو من القعود في العيادة وقال اذا خلصوا بينزلون، قال لولده الصغير الى خلصت امك تراي تحت انتظر علمني لان العيادة، فالسوق مثل ما تقول يتجه شرق، وفيه دكاكين يمين ويسار منوعة مثل ماتقول محلات نفوتيه، ملابس نساء وملابس أطفال ومحل مواعين ومحل مثل هالأشياء، ساعات وأغراض مكتبية، ومحلات ابو ربالين وأبو ثلاثة ربال، المهم انه سوق عامر، وأكثر رواد هالوسق نساء، والى مدخل السوق هذا متواسي مبلط لكن الى جا تقريبا في نص السوق فيه له زليفة مهيب رفيعة بالخليل يمكن يجي لها في حدود العشرة سائتي، من عقب هذي يرتفع السوق، انا محلها قلت يمكن راعي العمارة أنه رفع البلاط على شان مواصير الدينمو اللي رايحة للخزان يمكن ييها تتغطي، لكن صارت هالزليفة مايفطنون لها الحرير الي

يجون متغطين، وقبل يعثرن فيها ويطيح فيها ناس، هو قاعد مثل ما تقول على كراسي أو محل للانتظار، ويشوف هالحريم، حريم جاين وحريم رايعين وأطفال وهذي حرمة معها شغالة شايلة لها كيستين مقاضي، وهذي توها جاية، وهو قاعد، ودايما ترا الشاعر دقاق نظر الشاعر نظره مثل الكاميرا، بس بدال ما تطلع صورة تطلع أبيات، فيلاحظ وهو دقيق الملاحظة عاد شاعرنا هذا نبيه ودبق لبق، يقول هو ان فيه زحمة الحريم، والى فيه واحد مقابله مهوب راعي دكان هذا هندي يصلح ساعات مثل هالي عندهم دويلبات هندي يصلح ساعات.

وراعي الساعات ما ياخذ حيز واجد، له محل مثل الكبينة قاعد عندها يصلح ساعات، يقول ما درا الا وهالعجيز مسيكية تمشي ما فطنت للزلفة، عليها هالعبيّة وترا بعض الحريم العجز الأولات، الي فيهن دين تستر وتغمر روحها بالعباة والخطوة حتو لو هي في قيض، وجت هاك العجيز عليها هاك العباة الجبرة والناس في قيض، ومتغطية ومتلفلفة، ومعها كيسة زرقاء فيها ليمون وبقدونس، جاية تمشي مافطنت للزلفة هذي، بس من يوم عدت راعي الساعات المسيكية التوت رجلها وعثرت وطاحت وتطيح هاك العجيز طيحة كايدة.

وطاحت مسيكية على وجهها، وعلى كتفها حاطة لزقة، مثل ذا اللزقات الي تمحط على الظهر، وطاحت مسيكية، والله مافطن لها أحد الا الهندي جزاه الله خير، سلامات يا ماما و سلامات يا ماما، ويقوم ويرفعها والى الهندي هالي يصلح ساعات عنده باقي قاروة ماء، ويجي يعطيها اياها قالت جزاك الله خير، والى المسيكية تورمت ركبها، وانغثت وبعد يمكنها منفلقة بس ماتعلم، يمكن جايها بعد مثل الصعرور بالجبهة يبي من يفركه، قعدت تسمي وتورد على

نفسها، وأعتقدت انها منظولة، وتقرأ على روحها، ما فطن لها أحد غير هالرجال الهندي، ويمكن حرمة عجلة سلمت عليها وتشافت لها ومشت، هذا منظر.

وافطنوا للمنظر الثاني وشلون يقول الشاعر طبعاً هو ما يقدر يجيها يلمسها، صحيح انه يقول سلامات ياخاله ما تشوفين شر وعود لمكانه ينتظر اهله يجون وعينه تناظر الريح والجاي كنه مروحة قعادية وهو ينتظر اهله ويطالع جهة الغرب وإلى مجموعة هكا الحرير جابين أغلبهم بنات وإلى الزين بين كل يكشفه حتى لو من بعيد المهم البنات جابين ويمكن انهم طالعين مثلاً من تدریب كمبيوتر او مثل هالنوع، وإلى وحدة منهن صايرة في النص طويلة وكل شوي تصلح شيلتها ومتسترة ويبدو هذي البنت من ممشاها أنها يمكن اول سنة بادية تطلع من البيت ما بعد ركدت في ممشاها، البنت إذا صارت طلعتها للسوق أول مرة ما تعرف تمشي ساعة تعثر في العباة وساعة تكلم اللي جنبها وساعة تفشل وساعة تكرر من الضحك.

المهم وهم مارين البنات واقبلوا على مكان الزلفة ما فطنت البنت نفس الشيء مثل العجوز يمكن كانت تكلم اللي جنبها ولا فطنت وتطيح هذيك الطيحة اللي ما امداها حتى تظف العباة وطاحت على جنبها الايسر وانفتشت شيلتها شوي بس غطتها اللي جنبها بسرعة ويقول الشاعر انه لمحها وطاحت الين جاء جهة خدها على الأرض وتملت تراب وتساعدنا اللي جنبها وتلملم روحها واللي في السوق كلهم صاحوا سلامات وما تشوفين شر حتى الاجانب اما يوم تطيح العجوز ما فطن لها احد يمكن انها الى هالخين تون مسكينه وهذي البنت من يوم طاحت كل اللي في السوق سموا عليها، بلسان واحد سلامات سلامات لجه كنه داخل هدف. فعاد الشاعر وصف هالمنظر بالاييات هذي:

شفتها تمشي بدل واختيال
 فارعة بالطول من هو قدها
 الحيا والطيب مع زود الجمال
 والعيون السود يقتل حدها
 لكن الاقدار ما عنها محال
 لو تقوم الخلق تاوقف ضدها
 فز قلبي يوم شفت الزين مال
 وعبرت دمعة تعبت بصددها
 وعثرت وسط الملا بنت الحلال
 واتضح صوت الخجل في ردها
 وانكسر في عثرته سيف الدلال
 وانحنى غصن الفرخ في يدها
 قمت الوم الارض نهر الشوق سال
 كيف طاحت ما قويتي ردها
 قالت بنشوة وردت باعتدال
 الوله والشوق يمي شدها
 ما قصدت السو في جسم الغزال
 مقصدي كله اقبل خدها

والقصيدة هذي للشاعر محمد السليمان الضالع من أهل بريدة . سمعتها منه

الله يذكره بالخير .

وفيه قصيدة ثانية غزلية رقيقة لشاعر معاصر اسمه خالد البقمي فيها وصف جميل ومناسبة القصيدة انه كان يمشي في السوق العصر ووقت العصر وقت انطلاقة الشوف واللي يناظر من جهة الغرب للشرق تكشف له كل شيء يقول يوم جو بنات مسابير متقدمتهن ذيك الوحدة عليها عباة وبابن من اللمعة أن الراس مكدود وتمشي وتحرك يديها بدلال كنها شايلة طفل فقال هالابيات هذي يقول:

تحت العباة اللي سوات المخيلة

تضفي ويفضحها من الحسن براق

جتني تجر الزين عنقا طويلة

طرقا تغريف من طويلات الاعناق

يلمع شعاع الشمس فوق الجديلة

عصير يوم اني صدفته بالاوفاق

كن الترف طفل يديها تشيله

ام الحنان اللي من الرمش دفاق

وكن البحر موج العيون الكحيلة

وغر المزون البيض في سود الاحداق

ومنين ما لديت فيها جميلة

مثل الذي باذهانكم ياهل الاذواق

حديثها ذكرى القمر كل ليلة

واحساسها مثل الندى فوق الاوراق

ما للفضاد الى انجذب فيه حيلة
 تثير مجنون العواطف والاشواق
 حاولت الاطف خاطره واستميله
 يوم انها جتني وانا جيت عشاق
 قلت الحياة ايام قالت قليلة
 ما ينبغي حب يجي بعده افراق
 تقبلت علمي وردت بديله
 وما استر صدري من جوابه ولا ضاق
 غنج الغواني في وقار الفضيلة
 هذا الجمال اللي تتوجه الاخلاق
 وراحت وانا ما ادري من اية قبيلة
 الا انها نجدية تسبي الاعماق

هذي قصيدة خالد البقمي وصف ولا بين او فضح بالبنت وهذا ترى من
 الاصول ومن الستر ومن المناهج اللي يمسون عليها الشعراء العاقلين مثل ما قال
 شاعرنا في بيته الاخير وقفت وانا مدري من اية قبيلة الا انها نجدية تسبي
 الاعمى ، وهالبيت هذا يذكرنا بشاعر من شعراء الاولين يقال له عبدالوهاب بن
 عبدالعزيز الفياض -رحمة الله عليه- وقال ابيات جميلة دايمة يغنونها اهل
 السامري يقول فيها :

امس في سوق مدري عارضتني غزالي
 في فريق ما عرفه وان عرفته نسيت

ما اقدر اسميه من خوفي يجي له مجالي
مغدي المقرد لا يدلون بيته

التقينا بلا ميعاد والسوق خالي
سمت منه الوصال وباعني واشتريته

يا خليفة هلي لا يا بعد من غدالي
ارحم اللي بحبك عاف حيه وميته

الهوى بالهوى ما فيه ذلك وذالي
حاجته لا بدت لو ما طلبني عطيته

هذي من القصايد الجميلة واللي ما تين الاسم ولا في أي مكان وهذا يعتبر
من الستر في مواضيع الغزل العفيف .



الجار ولو جار

السالفة التالية عن الجيران ، ومعروف أن الجار له حق على جاره ومع الأسف في الايام هذي والسنين التالية صاروا الجيران ما يعرفون بعضهم بعض ، من اول يوم انهم في بيوت صغار ومتقاربين وهم احسن حال كنهم عايلة وحدة الى غاب الواحد عن اهله والى جاره يسد مكانه كأنه ما سافر ولا غاب من حسن الجوار ، اما الحين الله يكافينا الشر غدوا الناس اكثرهم في هالحارات الجديدة كنهم جيران مقبرة ما يعرف بعضهم بعض وبعد الصلة بين النسوان والحريم اكثر من الرجال ويحطن في الحارة دورية بيناتهم اللي جاية بريق النعناع والثانية جاية زمزية شاهي والثالثة جاية مثل ما تقول اكل .

بعض الحريم دبقه لبقه في الطبخ وخاصة اكالات الشتاء ولو يطيعون شوري البنات اللي في هالوقت كان يتركون عنهم التدبير المنزلي والطبخة ١١٣ والطبخة ثمانين كلها خرابيط . تعلموا من العجز الموجودين عندكم قبل يموتن وتمنون تصلحون مثلهم القرصان وخبز الرقاق والمرقوق والجريش بعض العجز الى صلحوا الجريش وجابوه في الماعون والى كنه نيفيا حتى زين للمشق من زينه خابر من اول عندنا عجوز الله يرحمها الى صلحت الصبيب تصب بالملقعة على المقرصة وجنبها بنت ثانية تقشع يسمونه صبيب ويهدون معه بصل صغير ويطلع وش زينه لاهو ني مرة ولا هو مستوي بالحليل هالاكالات انفع من بعض الوجبات السريعة اللي قامت تخلف امراض ، نرجع لموضوع الجيران فيه سالفة يقولهالي محمد السبيل اللي جده الشاعر عبدالله بن سبيل ، يقول أني جيت للرياض من

ديرتة نفي معزوم عند نسيبنا ابتغدى عنده وبكرا عازمني رجال ثاني فيقول محمد
 البسيل سالت نسيبنا وكان مستأجر في حارة وقلت له انا معزوم عند فلان وعلى
 وصفه انه حولكم مهوب بعيد عنكم قال له والله ما ادري وين بيته كل يوم ينزل
 واحد ويروح واحد بيوت اجار ومن كل بلد ولد والمدينة مهيب مثل القرية بس
 اتصل عليه وواعده في مكان يجي ياخذك قال له اجل ودني لم مكان معروف
 وحطه في مكان واتصل على اللي هو عازمه وقال له تعال خذني انا في المكان
 الفلاني ونسيبه راح المهم يوم جا واخذه اللي عازمه وما دريت الا يوم نزلني والاه
 حول بيت نسيبنا ما بينهم الا يمكن اربعة بيوت ويقول ما علمته ان بيت نسيبنا اللي
 جاي من عنده انه هذا هو وسكت ، وعقب الغداء قام بيوديه قال محمد بن سبيل
 لا انا ادل وابروح له فيوم وصل لبيت نسيبه قال له تدري وين انا كنت معزوم قال
 وين قال شفه رابع بيت كيف ما تعرف جيرانك قال له والله ما ادري انا اول شيء
 توني نازل ولا ادري عن الجيران كل شوي ينزل واحد .

فقال الشاعر/ محمد بن سبيل بهذه المناسبة الأبيات التالية :

كيف بعض الناس ما يدري بجاره
 ما يعرف اسمه ولا يذكر وصفه
 رحت قبل أمس معزوم وسط حاره
 شفت راعي بيت وفرحت لوقوفه
 قلت بيت فلان وينه باعتباره
 ساكن حولك وحنًا من ضيوفه
 قال ما يوجد ولا راعي عماره
 عندنا واسمه فلان ولا نشوفه

وقبل يكمل صاحب البيت العبارة

جاء معز بنا وكثر في حلوفه

يا عرب ويلا جداره في جداره

كل منهم يشتكي قسوة ظروفه

فارجع واقول أن الجار الرسول اللهم صلي وسلم عليه وصي على سابع جار، وايضا في الحديث قال الرسول صلى الله عليه وسلم (ما زال جبريل يوصيني بالجار حتى ظننت انه سيورثه)، واتذكر سالفة مبطية قالوا فلان باع بيته على واحد وقال له انا بعت لك البيت بس فيه شيء ما بعتك اياه اللي هو مجورة جارنا اللي حنا واياه من عشرين سنة هذي هي اللي ما تباع ولا لها ثمن ولا صك، والجيران من أول في الحارات القديمة كان بينهم كل ليلة دايرة مرة عند فلان ومرة عند ثاني ولا فيها تكلف احيانا تكون بين المغرب والعشاء قهوة وشاهي وسوالف ويسألون عن اخبار فلان وان كان فيه واحد مريض راحوا يزورونه ويسلمون عليه او فلان ثاني ولده صاير عليه حادث لا سمح الله ويزورونه أما الحين اعوذ بالله الجار ما يعرف جاره ولا يدري من هو وبعض المرات تصير سرقات في البيوت ولا يدرون، يقولون واحد مسروق بيته وجاين ناس داخلين البيت ولا اكتشف جاره ان هذولاء غرباء لان ما بينه وبينه صلة ويمكن بعضهم ما يسلمون وان كانه جيد حرك يده وقال له مسيك بالخير، وبصير بعض المرات مع للأسف مشاحنات بين الجيران اما عند موقف سيارة والا عند ماء طالع ومثل هالامور ما ودك تصير بين الجيران او مثل واحد من البزران طق واحد بزر ثاني وتكبر لان اول ما تبدأ بين العيال الصغار ثم تبدأ مع الحریم ثم توصل عاد للكبار هذي كلها امور مهيب طيبة، فارجع ونقول الجار ما زال له حق المفروض تزور جارك وتبادل الهدايا وتراعي ظروفه ولا تضايقه وان كان عندك

سواق لا تخلية واقف عند باب الجيران يضايقهم ما يعرفون الحرم يدخلون او
 بعض الناس يحط له مجلس في عاير ولا يعرفون النسوان يدخلون او يطلعون
 قبال باب الجيران، فيه قصيدة جيدة في الموضع للشاعر بدر بن عواد الحويفي
 شاعر من شعراء قبيلة حرب المعروفين يقول:

حنا بدور شفت فيه الغياره
 تغيرت بعض الطبايع والأفكار
 يا ناس حق الجار يعطى جواره
 ما هوب حق الجار ما ياصل الجار
 الجار يمضي عام ما زار جاره
 لو المسافة بينهم خمسة أمتار
 وياجب علينا للمريض الزياره
 ياللي عن الواجب تسوون الأعذار
 وأنا ماعم الناس وجهت أشاره
 وجهه نظر و الناس كل له أنظار
 وياما من أهل الخير في كل حاره
 اللي لهم بالجود مارد ومصدار
 ما الهتهم الدنيا وجمع التجاره
 دنيا ودين وكل شي بمقدار
 لومي على اللي فيه كبر وجباره
 مغرور غافل و المنايا بالأعمار

بالربح لو يدري ومر الخساره
 بالماقف اللي فيه تشخيص الأبصار
 يوم الحساب اللي رهيب انتظاره
 تشهد جوارحنا على كشف الأسرار
 ماقف نصف وحساب ما به شطاره
 عسى لنا من ساعة الضيق مظهر
 ولا بد لا مد السراط انحشاره
 يفقد بها العاصي كيانه وينهار
 وأعمارنا وأموالنا مستعاره
 وقدامنا جنة وقدامنا نار
 واللي سكن بعشاش و اللي عماره
 يفنى ويبقى اللي على الخلق قهار
 اللي خلق خلقه وقرر قراره
 ونفذ بهم حكمه بتحكيم و أقدار
 سبحانه عزال الدجي من نهاره
 اللي حمل موسى على موج الأبحار
 وجار النبي لو كان موذيه زاره
 ما واخذه لو كان من قوم كفار
 والجار ما ينظر بعين الحقاره
 عند الرجال اللي لهم بالفخر كار

الجار له قيمة وواجب وقاره
 و الحاجز اللي بيتنا ساس وجدار
 خوذوا حديث المصطفى باعتباره
 باللي غمركم بالجهل موج تيار
 من ميزة المسلم وخيرة مساره
 ياخذ من السنة دلائل و تعبار
 انصح وكل منهجه باختياريه
 عسى لها تأثير بنفوس الأحرار
 و اخير من طول المجال اختصاره
 تمت وصلى الله على سيد الأبرار

هذي قصيدة الشاعر بدر الحويفي وتعتبر من القصائد النادرة في حق الجار وتعتبر
 مثل الدرس تذكر فيها حقوق الجار من زيارته ومهما اخطأ عليك ما تواخذه ولا
 تعاسره مهوب مثل هالايام في أيام القيض الى صار عند احد الجيران شجرة تظلل
 قبال الباب للسيارة ويجي واحد من عيال الجيران البعيدين ويوقف تحت الشجرة
 وهذا ما يصلح وعيب يعني تعرف أن هالمكان لموقف سيارة جاركم وعند بابيه ومحله
 والشجرة هذي ما حطها عبث واكيد حاطها ظلال لسيارته ، والا بعض الناس يجيب
 سيارته ويحطها قبال باب جاره ويدري ان هالباب يدخل معه نسوان والا مقاضي او
 باب كراج يدخل سيارته داخل البيت واصلا معروف ان باب الكراج ما يبي من يكتب
 عليه ممنوع الوقوف واضح انه ممنوع الوقوف . هذا والله الموفق والسلام .



تمر الصوام

كان في زمان مضاء قبل حوالي المائة سنة وفي بلد جنوبيه سدير يوجد الشيخ / علي بن سند رحمه الله تعالى أمام لمسجد الجنوبية وكان رحمه رجل زاهد عفيف ورع عطوف على الفقراء والمعوزين وصاحب أمانه وخلق عظيم وله عند جماعته وقار وهيبه ورجل دين محبوب يحبه الجميع لنزاهة أخلاقه وسلوكه وكانوا الناس من أهل الخير والفلايح يودعون عنده تمر الصوام لشهر رمضان المبارك من أجل توزيعه عليهم كل يوم من أيام الصوم (كل يوم بيومه بالتساوي) فحصل في إحدى السنوات على البلد جفاف عظيم أصاب معظم نخيل البلد حتى أنها غارت بعض الآبار التي تسقي النخيل وكان من ضمن ممن أصيب نخلهم ومزرعتهم بالجفاف المدعو / إبراهيم البقعي الذي يبدو والله أعلم أن نخله ومزرعته في طرف البلاد وهو صاحب عائلة كبيرة فيهم الشيبان والنساء والأطفال ولم يجد ما يعيشهم لا من تمر ولا عيش ومعدوم ذات اليد فضاقت به الخيل ولا يدري كيف يتصرف .

فجاء إلى ابن سند وطلب منه تمر ينقذ به العائلة الذين يعولهم وعطاه بعض الشي لسد حاجتهم فقط مره مرتين ثلاث ولما طاول عليه الأمر امتنع ابن سند من اعطائه وقال له هذا تمر الصوام ما اقدر اعطيك كل مرة وكأنه تشدد عليه فغضب البقعي وكاد ان يتصرف تصرف اهوج وعزم على بيع ملكه من النخل وقال اجل الى صرت منتب معطين تمر انقذ به عيلاني حرج على النخل تراي ابا ابيعه باللي هو يسوى .

بشخصين في الروضة تقدم له الأمام اللي هو ابن سند وقاله يا ابراهيم دوك هالطبخه من القهوة رح أحمسها وزين القهوة الين أجي ملك في البيت ابمر بيتي واجي اتقهوى عندك . فعلاً راح البقعي وصلح القهوة وشب الضو وتزهب لجية ابن سند وابن سند مر بيته وجاب معه ورقة مبايعة النخل والورقة اللي فيها مصاريفه على النخل يوم دخل عند البقعي في القهوة وجلسوا حول الوجود قال ابن سند وراك يا ابراهيم ما صرمت النخل قال الله يهديك يا مطوع تهزاء بي ذاك يومه على حظي هالحين الله يبارك لك فيه ماعد هوب لي قال ابن سند لا بالله إلى هالحين وهو لك أنا كل هالسنين اللي مضت حفاظ لك يالبقعي الملك ما هوب يباع لكن أنا خفت عليك ذيك الأيام تبيعه مع العجلة على واحد ما يرده لك ولذا شريته منك بتمر من تمر الصوام وهالحين هذي ورقة البيع شفها فالضو وهذي ملكيتك الأصلية لك وهذا المبلغ اللي أنا خسرتة على تجهيزه في اللقاح والتركيب وغيره وهالحين نخلك لك .

وفي ذيك اللحظة تجهش صدر البقعي وبكاء من الفرحة عقب يومه فقير صار غني وتشكر من فعل ابن سند الطيب وصبره عليه وعدم طمعه قال ابن سند أنا يوم اشريه منك ناوي أرده لك لأن الملك ما يباع لوك بايعه على غيري ما رده أحمد الله على ما حصلك من فعل الخير الله سبحانه ما يضيع خلقه وخاصته اللي مثلك يكد على عايله فيهم الصغار والمسنين والعجزة من النساء والأطفال وهذا في الحقيقة شأن الطيبين والأخيار الله يكثرمهم .

وبهذه المناسبة قال الشاعر المعاصر لا حداث هذه القصة الشاعر/ صالح بن عبدالعزيز المنقور هذه القصيدة التي تبرز عمل ابن سند وتثني على فعله الجميل أثناه الله ورحم الله الجميع يقول المنقور:

يا بن سند يا عشير الناس
 يا طيب الجاه والسيـره
 عنيت لك يا صليب الراس
 يوم النخل نشفت بيـره
 وحملت همٍ بغير قياس
 ويا لله عساء فالأمر خيره
 والناس يا مسندي بالناس
 والرجل يعرف بتقديره
 وابن سند قـالي لا باس
 أشريه وأنقل مخاسيره
 وتم المبايع على القـرطاس
 وشهـودنا من هل الديره
 وابن سند كنه القـرناس
 لآمن كلٍ نهـمّ طيـره
 صافي الذهب ما يصير نحاس
 والبـيشله ما تجي نيره
 وابن سند متعب المحماس
 فالقلّ تكثر مساييره
 عقب العصر نجمع جلاس
 نسمع حديثه وتفسيـره

أن جيت ابفطر لقيت اجناس
صوام تفر على خيرره
عشرين عام خلت يباس
بأحكام ربي وتدبيره
يا ناس لا تقطعون الياس
الغيث بانت بواشيره
هلت على نخيل كل الناس
كلن يوسع معايره
وجاب الوثيقة قوي الباس
وردّ النخل طيب السيره
الله يثيبه رفيع الساس
ويعوضه ربا بغيره
والى لقاء آخر مع سالفه وقصيدة أخرى .



القهوة

القصة او السالفة التالية عن القهوة، الحقيقة القهوة شأنها عظيم كونها تمثل الضيافة العربية، اول مايجي الضيف يقلط على القهوة ودايماً الناس يقولون تفضل عندنا على القهوة، فمنول الناس اذا بغوا يبنون البيوت يهتمون بشأن المجلس لأنه هو واجهة البيت ويسمى القهوة لأن القهوة تصلح فيه، والقهوة واقصد المجلس يكبرونها عشان تستوعب الرجال، وفي السابق مرة ماكان عند كل الناس معاميل للقهوه، كان فيه في القرايا قهوة يسمونها (قهوة الجماعة) يجتمعون فيها كلهم اذا عزموا ضيف، وألف عن القهوة كتب عديده، ومن خلال قراءاتي في الكتب اللي عن القهوة والاشربة اللي سمعتها ومن افواه الشعار استنتجت في نظري ان فيه خمسة اشخاص اشتهروا بموضوع القهوة وورد في شأنهم قصيد:

١ - دغيم ابن بشير الظلماوي، مات رحمة الله عليه عام ١٣٢٤هـ وسموه (راعي الوالمة) لأن قهوته جاهزة دايماً، قهوته وديوانيته وضوءه ودلاله كنه اسعاف ٢٤ ساعه شغال، أي ضيف يجي يلقي القهوة جاهزة، في أي وقت.

٢ - زيد الخوير من الخوره من قفار من حائل، اشتهر بتصليحه للقهوة، يتقنها بالحيل، واستشهدوا به الشعار في كثير من قصايدهم، وله قصيدة عن القهوة، معروفة.

٣ - علوش ابن ظويهر اشتهر في معرفة طعم القهوة، يعرف طعمها لو يخالطها أي شي يعرفه.

٤ - محمد ابن عبدالله القاضي اشتهر هذا في المقادير اللي تحط مع القهوة من الهيل والزعفران والمسمار والشمطري و العنبر ومتى تحمس وشلون حمستها يعني طريقة تصليحها او اعدادها .

٥ - شاعر معاصر الآن موجود واللي هو الشاعر عبدالله بن علي بن صقيه التميمي ، الحقيقة هذا وضّح في قصيدة من قصايدہ قال خمسة اشخاص الى من القهوة جهزت تبديهم بالفنجال قبل وخمسة تخليهم اخر شي ، وذكرهم منهم الظفر والشجاع والكريم واللي يفك الديات ، عدهم وعد الباقيين . .

لكن بالنسبه لدغيم الظلماوي ذاع صيته في وقت امير حايل محمد ابن رشيد هاك الحين يمكن في حدود عام ١٢٨٠-١٢٩٠ هـ ، واشتهرت قصيدة له يسند فيها على ولد اخوه ، واسمه كليب وهو اللي عنده في القهوة كنه ولده ، حسب الروايه اللي سمعتها ويسند على ولد اخوه ويقول :

يا كليب شب النار يا كليب شبه
عليك شبه والخطب لك يجابي
علي انا يا كليب هيله وحبّه
وعليك تقليط الدلال العذابي
ادغث لها يا كليب من سمر جبّه
وشبه الى منه غفا كل هابي
باغي الى شبيت ثم قبّه
تجلب لنا ربعن سرات غيابي

بنسرية ياكليب صلف مهبّه
 لا هب نسناسه تقل سم دابسي
 سراة بليل وناطحين مهبّه
 متكتفين وسوقهم بالعقابسي
 الوالمة ياكليب عجل بصبّه
 والرزق عند اللي ينشي السحابي
 وصبه لمنعور الى جاه نبّه
 يرخص بعمره والدخن له ضبابي
 وصبه لقرم صرفته ماحسبّه
 يوم البخيل مكنهف الوجه هابي
 وعده عن اللي مايداري المسبّه
 اللي يدور بالقصير الغيابسي
 لاباطن الهلباج خطو الجلبّه
 يازين خبط عصيهم بالركابسي
 اظمر لهم وابدي سلام المحبّه
 لا دبر الهين متين العلابسي
 سلام احلى من شخاليل جبّه
 واحلى من السمن الجديد العرابي
 مع كبش مصالح لراسه نجبّه
 من مذبح السكين حن الركابسي

خطوا الولد يوم الملقى نكبّه

ياتي علينا من حساب الزهابي

حتى ايش لو يلبس زبون وجبّه

معيرة على غضير الشبابي

انا لقيت الصبر ياحلو غبّه

يرقيق روس مشمرخات الهضابي

ومن لاصبرياكليب في حكم ربه

هذاك يوم البعث ماله ثوابي

يقولها اللي ماحكى بالمسبّه

ولا عرقل الاجواد بكثر الهلابي

هذا هوى بالي وهذا مطبّه

من قبل لا يكتح علينا الترابي

هذي قصيدة دغيم اللي قالها واشتهرت في وقتها وصار لها شان وتناقلوها

الناس، وبشرح بعض الكلام الغامض في القصيدة واللي مهوب معروف،

يوم يقول دغيم:

الوالمة ياكليب عجل بصبّه

والرزق عند اللي ينش السحابي

لين قال:

سلام احلى من شخاليل جبّه

واحلى من السمن الجديد العرابي

جبه مدينة من مدن حایل ويقصد بشخاليلها القلات اللي في علو الجبال يصير فيها ماء حلو وينزل منه مثل الشخاليل مطر فيتلقوته ويسوون منه القهوة، والسمن الجديد العرابي اللي توه جاي من البر .

مع كبش مصلاح لراسه نجبه

من مذبح السكين حن الركابي

الطلي اللي نذبحه للضيف، و من مذبح السكين حنا ركابي كانت عادات العرب في السابق اذا جاهم الضيف وذبحوا له ذبيحة يقوم راعي البيت ويحط يده في الدم ثم يحطها على رقبة ناقة الضيف تصير مثل ختم الوارد في رقبة ذلوله اللي هو جاي عليها، علشان اذا راح هالضيف لناس ثانين يدرون انه يستحق ذبيحة ويستاهل الاكرام وانهم قد كرموه الفلان قبل .

خطو الولد يوم الملاقى نكبته

ياتي علينا من حساب الزهابي

يقول خطوا الولد أي بعض العيال اذا جا وقت المغزى وراح معنا نعتبره كنه من العفش لأنه مهوب ظفر وشجاع .

اما بقية القصيدة تقريبا واضح ومعروف .

بعض الحكام والامراء في هاك الوقت ينغاض ويغار مايبي غيره من عامة الناس يصير هو المشهور بالكرم وله صيت بينهم، وده انه هو الكريم والمعروف، فعقب ما اشتهرت القصيدة وانتشرت وصار لها شان، وصلت لامير حایل محمد ابن رشيد، وابن رشيد ما يعرف دغيم ولا يعرف قهوته وماقد جاه، فقال لبعض اخوياه الخاصين نبي نروح نشوف هالشمري اللي يقول يا كليب يا كليب .

الوالمة ياكليب عجل بصبّه ، هو صدق والمة عنده والا لا! فخصص على بعض
من ربهه القريبين وراحوا له في وقت مايتوقع ان احد يجيه فيه

مثل ماتقول في ليلة شتاء طويل ، المهم يوم نوخوا عنده ودخلوا في البيت
والا والله ان الضوحية عامرة والدلة زاهية وهو اللي يقوم ويصب لهم من الوالمة
اللي عنده ويوم ناظرهم والا والله هذا محمد ابن رشيد الامير ، ولا يوم استحي
دغيم وحسن ان فيه شي وخاف وش سنع هالمسيار!

ويوم انه زاد حطب وزادت النار اشتعال طالع وشاف وجه الامير كن عليه
اثر غضب و مهوب راضي ، فالتفت الامير عليه وقال له :

يادغيم . قال : خير؟ قال : يوم انك تقو صد ياكليب ياكليب ، وش عندك به؟
فعرف دغيم ان الامير زعلان ومايبي احد يصير له صيت اكبر من صيته وارتجل
وقام له وسلم عليه وفي سلامه عليه قال له ابيات ارتجلها ومعنى الابيات : لولا
وجودك امير لنا وانك انت اللي حنا في حمايتك كان ماشبيننا الضو ولاقلت
ياكليب شب ، وكل هذا بوجودك وعزك . .

والايات تقول :

مده رهن لولاك ماقلت ياكليب

ولا قلت شب النار صر موقداً له

في ليلة تجدع سواة المشاهيب

نسريرة تلصق خليل بخله

من كل فج ياصلنك مناجيب

ما هو غلاء بالظيغمي مير ذلة

نظعن بعزك يا حصان الاطاليب
لعل جامع حزمك مايفلّه
بالجوهر الناريز يالمسك يالطيب
ياعبر من جربّه مايملّه
تملا محاليب وتكفي محاليب
وكبد تيسسها وكبد تبلّه
ياطير شلوى مالقي بك عذاريب
لو تستحي ماتجمع الطيب كلّه
يابو الارامل واليتامى ومن عيب
وابو لمن كان العصا ثالث له
وابو المحرول والعمى والمحاديب
ومن ضامته بقعا نصير ولد له
ان كان هرجي به عليكم عذاريب
سامح عسى اللي عقبك لالف حلّه

ويوم سمع ابن الرشيد هالايات والمدح زال غضبه ورضى عنه وقال له بيض
الله وجهك على هالقصيدة والكرم، فتقهوى عنده وقال له وهو طالع: تشوف
يادغيم؟ قال: ايه. قال: تراك من خاصيتنا ومن القريبين عندنا وكل ماينوبك من
القهوة والدلال ابشر انه على حسابنا لين تموت، قال: الله يطول بعمرك ودعا
له، والحقيقه هذا شان حكام الجزيرة العربية كلهم الى الان وحتى سكان الخليج
والعرب عموما يحبون الشخص الكريم واللي سمعته طيبة ويكرمونه.

كل شخص له صيت طيب يا في كرم او في انه ينفق امواله في سبيل الخير
تحتضنه الدولة دائما وتكرمه وتسهل مهماته ، هذا شان الحكام كلهم وهو يستاهل
هالتكريم .

ولكن العجبه في بيتين من قصيدته في ابن الرشيد يوم يقول :

يا ابو الارامل واليتامى ومن عيب
وابو لمن كان العصا ثالث له
وابو المحرول والعمى والمحاديب
ومن ضامته بقعا تصير ولد له
جمع ثمانية اشخاص اللي تحل لهم الزكاة .

اشتهرت هالقصيدتين لدغيم حتى بعد وفاته ، مات في عام ١٣٢٤ بينا وبينه
حوالي ١٠٣ سنين .

وزيد الخوير اشتهر بتصليح القهوة وصار معروف بهالشي وقاموا يستشهدون
به الشعراء الى حد ان فيه واحد من شعّار عينزه يمدح جماعة من اهل الزلفي
زايرهم ويقول لشاعرهم يرد عليه ويقول :

مشكور ولا عليكم زود بالحصن المغاوير
ياللي توفر بكم مع هبة الريح النعاره
رجالهم من حبور رجال اهل نجد المشاهير
حتى لو الوقت ضعضع قوّته بقي اعتباره

حماسة الصاع لدلال حوال النار مقطير

من صنع رسلان الاول جد كنعان ابو شاره

البن من سوق ظهران اليمن يجلب قناطير

وبهارها طرانثيب مورد من قندهاره

وفنجالها ختته يجذب لراعيها المسابير

كن الخوير متولي حمسته والابهاره

هذا الشطر الاخير اثبت ان الخوير شاطر في عمل القهوه .

هذه الأبيات من قصيدة للشاعر/ علي ابن ابراهيم القرني رحمه الله وإلى

لقاء آخر .



بوادر الشيب

السالفة التالية من السوالف اللي اعرف واحفظ ومعها شاهد ابيات والسالفة اجزم انها صحيحة واما القصيدة فانا أخذها من مصدرها لكن السالفة احيان تزيد وتنقص حسب اللي يرويها .

وموضوع السالفة عن غلا الزوج عند زوجته ، دايماً الزوجة تغار على رجلها وماتبي يصير له لفتات ونظرات ثانيه حتى لو هي كبيرة في السن ، من يوم يجي تلقاه في البيت ، لكن بعضهن توفق مع الرجل في الكلام الطيب وتستقبله وترقه عنه وتداري خاطره وتشوف وش حاجته اللي هو يبي وكل ماحاول يسأل عن اللي ناقص قالت عسى الله يسلمك ما قصرش كلش تام والخير واجد وعسانا بس ناكل اللي عندنا حتى لو انه في شي ناقص ، وبعضهن اعوذ بالله توذيه بالصياح من يوم يدخل جاي من شغله تعبان وهي ملاطفته ملاطف مثل الجنني بالطلبات نبي كذا وهذا ناقصه كذا ووراك ماجبته ، كلش تخليه في وجهه ، واذا بغى يطلع جابوا له فاتورة وش كبرها كاتين فيها الطلبات كنها فاتورة مغسلة وبعضها كلها متكرر ماله الا اسبوعين من يوم جابهن . .

يجب على الحرمة العاقله المدبرة في البيت تراعي ظروف رجلها وراتبه ولا تفرض عليه فروض فوق طاقته ، بعضهن توذيه وتفرض عليه يتدين علسانها تخاف انه يجمع فلوس وباكر يعرس عليها ، هذا واحد من اللي اعرفهم مدرس والمدرسين محظوظين خاصة مدرسين الابتدائي لأنهم يروحون مبكرين قبل الناس ويرجعون مبكرين ، وواحد من هالمدرسين مستاجر له دور ارضي في فله ،

يمكن له سنه - سنة ونص متزوج وجايب زوجته ومسكنها في الدور، والمره نظيفه ومرتب، من اول ما تدخل مع باب الرجال تشوف هذي مزهرية محطوطة هنا وهذا المجلس مصكوك وعليه مفتاحه ومطيّب علشان اذا جو الرجال والا ريحته زينه، وكل شي مرتب في البيت وحريصه على شغلها وبيتها ماتخلي شي طايح او منكسر ولا تتكل على الشغالة، وتدرن اذا صارت هي اللي تقوم وتشتغل في بيتها انها تخفّ وتزين صحتها وتعود اما اللي تنام الى الضحى، تصير متينه الحاصل ان هالرجال يجي بعض المرات الظهر لأنهم يطلعون مبكرين وخاصة في ايام الشتاء يطلع احيانا قبل اذان الظهر بشوي واذا جا البيت لقي حرمة فارشة زولية متر ونص في مترين في البرنדה (البلكونه) اللي تطل على الحديقة وحاطة عليها مركا وجايبه ذيك الطوفرية وعليها دلة فيها ليفة جديدة ومغطاة بفوطة زرقاء وعندها فنجالين وفنجال ثالث محطوط احتياط والا الفنجالين واحد لها والثاني لرجلها، وصحن تمر نظيف انكانه وقت رطب والاه هذا هو كن عليه الغبير وجنبه مويعين ثاني للماء يغط يده، مرتبة كل شغلها مضبوط والثلاجه مولة فيها علبه روب او حليب، دارية انه بيجي الساعه ١١ وربع-١١ ونص، معودها على هالحزة.

وجا يوم من الايام على حد جيته من الشغل وحوسة هالبزران في المدرسة خاصة طلاب الابتدائي غيثين من الاولى الى الرابعه بيي لهم مدارى هذا يصيح وهذا منشقة مخباته وهذا ضاعت طاقيته وكل شوي ياستاذ ويااستاذ، الله يعينه عليهم، المهم يوم انه وصل وتقهورى معها قالت له: تبي اجيب لك لبن والا حليب؟ قال: اياهن ازين؟ قالت: اللي تبي، قال: تدرين. حليب، وتجب هاك

الحليب البارد وتعطيه اياه ويشربه والاه معلق عقاله في حديد البرنده، وغترته رافعها، عاد راسه زين واسود شعره ماشالله فعادي بي ينسبح شوي لأن الشمس في وقت الشتاء تكون لذيده وجر المركا وخط رجليه عليه وقال لها وين بتروحين؟ قالت: عاد ابروح، قال: لا اقعدني هنا شوي، اقربي وش عندكم اليوم من الحكوي. قالت: ابد والله زهمت علينا اختك فلانه وانها تعزمننا وتقول مبطين ماجيتونا ولا سيرتوا. قال: ايه ان شالله اخر الاسبوع. نبي نجمعهم جميع وناخذ استراحة والا طلعتنا بهم للبر، قالت: زين وزهمت مرة جيرانا تسأل تقول: شغالتكم من وين جبتوها عن طريق أي مكتب؟ وقلت لها والله مدري وتعلمه باللي اتصلوا اليوم، قال: زين تراي ابنسبح شوي ربع ساعه غفوة واقربي شوي وهي تقرب ويحط راسه على فخذها وقامت تفلفل في راسه باصابعها وماشالله رقبته جبره مصتصح ومتعافي، المهم انها وهي تقلب في خصيل شعر راسه والشمس ساطعة على راسه ولا والله يوم لمحت هاك البياض من شعر راسه وهو توه صغير وتلمح البياض منا وتلمح بياض منا! قالت: يافلان كن الشيب غزاك مبكر، اشوفه هذا هو بيرق، قال لا والله قالت: الا جاك هذا هو غازيك تولم:

فتمثل في ابيات ماعلم بها الاعقب ما طاف فترة وسنح الابيات على موجب
هاجلسة:

قالت جواهر لي وانا كنت سرحان

اشوف برق الشيب شعشع وناضي

قام وغزاك وصار يجمع له اعوان
واحتل منك الراس دون اعتراض

وانته صغير السن بالعقل رجحان
وسيفك على كل المعادين ماضي

وهذا عدو لك وتعطيه الامان
كنك بغزو الشيب للراس راضي

قلت البياض يزيدني بر واحسان
يعطي وقار وحكمة وانتهاضي

قالت وقارك ثابت طول الازمان
ماحتاج في قدرك الى حكم قاضي

قلت البياض يخلي الرجل له شان
قالت ترى الليي قلت ذا هرج فاضي

قلت البني لاشافت الشيب تنسان
وتمحل عقب فرقاه ذيك الفياضي

قالت بعد ماضمتن وسط الاحضان
الله يكثر في شعرك البياضي

(ضمتن) بلهجته لأنه هو من اهل بريده، قالت الله يكثر في شعرك البياضي
لأنها عرفت ان الشيب يطرد عنه البنات .

وهالشاعر اسمه محمد السلیمان الضالع من اهل بريده . وسلامتكم .

وأذكر بعد بيت للشاعر فهد بن عبد العزيز الفايز من أهل الفرعة من النواصر
من تميم يقول كنت مرة أحلق بأخر شبابي واطالع وجهي بالمنظرة وقد مسحت
معجون الحلاقة وفيه بياض بسيط اشوفه وانا اقوم وامسحه زود بيدي وعيا يروح
ويقول البيت التالي ولا ادري وش باقي القصيدة يقول فهد:

لاح البياض بعارضي قلت صابون

واثره بياض الشيب يرعى السواوي

ويقول الشاعر فهد الفايز أيضا بقصيدة ثانية يوم بداه الكبر يقول:

لا والله الا تعدتنا سنين الشباب

وجتنا على هونها تمشي سنين المشيب

سنين مرت علينا مثل مر السحاب

وأخذت ما كتب لي في هالعمر من نصيب

يوم ان شمس العمر من فوق روس الهضاب

واليوم انا اشوف شمسي حدرت للمغيب

وان كان تنشد عن المعنى فهالك الجواب

انشد مجرب ولا تنصى عيادة طبيب

الشيب مقدور تغييره بلون الخضاب

مير البلا ما حد غير قضيب بقضيب

واذكر بعد ابيات مثل هذي بس الرجال اللي قالها شايب بعكس اللي قبل .

شايب كبير والى جا والاه يخاف من مرته او انها مروعته، لكن يقول في الابيات:

لاضاق صدري نحرث انثاي
 ربيع قلبي مشاهدها
 لاجيتها صلحت لي شاي
 ولي مرقد جنب مرقدها
 تمشي على غايتي ورضاي
 لعلي يوم مافقهدها
 وان شفتها صممت بالراي
 يا عنك ماني معاندها
 اخاف كف على علباي
 لاناوشتني قفايدها

فبعضهم مطيع ويخاف انها تهاوشه والا تقول شي مثل هالشاعر ، فالحقيقه الكبار دايمًا يحصل بينهم طرايف مثل هالنوع ، اذكر سالفه صغيره مثل النكته ، يقولون فيه رجال متزوج له حرمه ، وام عياله كبيرة ويقدرها ويعطيها الشئ الكثير من الاحترام والتقدير ولا يقول لها شي ، قام وتزوج له بنت صغيرة والبنت هذي بعد صايرة لبقه وحببية ونازلين سوا في بيت واحد وهالبنت عادة نفسها بنت للزوجه الاولى ، اذا امرتها قالت لها ان شالله ياخالتي وابشري في السمع والطاعة ولو انها زوجته ، جا يوم من الايام والاهم قاعدين على جال الوجار في الشتاء شاينين ضو والحرمه الاولى قاعده ولها وقارها بس عينها له تناظره هو يناظر البنت والا لا والى منه ناظر حرمته التاليه زعلت وتكدر خاطرها ولو انها ما حكت ودها تهوش ، وبالصدفه تمر هكالخنفسه الله يكرمكم من وري الدلال

وياخذ الملقاط ويقضبها وقال للبنت : تعالي يابنت خذيها واجدعيها برا، محشم الكبيرة عن القومه بس انها زعلت وقالت : اييه تعرف من تهدي وتعطي . . قال : وش انا معطي ! معطيها طقم الماس؟ معطيها خنفسه تجدعها، قالت ولو . وتدور أي سبب يحرضها على الهوش . وهذي من الغيرة اللي تصير بين الزوجات الجارات .

لكن يجب على الحرمة العاقلة اذا صارت كبيرة في السن وزوجها خذ عليها حرمة ثانية ازين له واستر وان كان انك ماتبينها عندك في بيتك يحطها في بيت لحالها وكلن رزقه بياخذه، انتي رزقك بتاخذينه انتي وعيالك واللي غيرك بياخذ رزقه ويجب على الحرمة تعالج نفسها بالصبر والقران والاتكال على الله وتروح عند عيالها وماتخلي ابليس يلعب عليها بالهواجيس والافكار ويجيها الضغط والسكر بسبة ضيقة الصدر، الرجال معه علمه يبي يعرس سواء أخذ ثنتين والا ثلاث والا اربع . . الله سبحانه وتعالى محلل له ذلك والله الموفق .



يا ناس خلوا كل واد ومجراه

جرت أحداث هذي القصة على الشاعر المعروف عبدالله بن حمود بن سبيل من أهل نفي من قبيلة باهلة، شاعر غزل رقيق ويصف البادية ونزولهم وروحهم هذا الشاعر توفي رحمة الله عليه عام ١٣٥٧ هـ، والسالفة اللي ابذكرها من أحد أحفاده فيقول اللي قال لي السالفة .

في سنة من السنين وقت ما كان بن سبيل أمير نفي في عالية نجد وفي نفس الوقت كبير العائلة فحصل يوم من الأيام مشاجرة عادية في مزرعتهم بين أحد العيال يمكن من أحفاد بن سبيل لأن عيال بن سبيل ثلاثة أكبرهم سعد ويحي عقبه عبدالعزيز وعقبه ناصر متزوج حرمتين وقتها، يمكن أحد عيال سعد أو يكون جده بن سبيل من ناحية الأم المهم جذعان واحد أكبر من الثاني تهاوشوا في النخل يقول قام واحد منهم ويومي بالمسحاة يبي يرمي بها الثاني ويمكن يوم أنه يرمي بالمسحاة على باله الى وصلته بيصد عنها والا يبعد عنها وما حصل هالشيء المسحاة انطلقت ودلت في الهواء تدور تدور تلف وتطقه على راسه فطاح الولد ونزف دمه ومات (قدر الله وما شاء فعل) وتصير مشكلة ومصيبة .

الولد هذا اللي رمى المسحاة ارتاع المسكين ولا تصور أنها بتاצל الى هالحد وركب ساقه ونحاش من نفي الى الشعراء إالي تبعد مسافة الذلول يوم كامل تقريبا، وتلوذ هناك ويتصدد في الجبال وبين النخيل ويغاب عن أهله حول السنة، ويوم درى بن سبيل وينجن ويغضب على هالولد اللي فيه ما فيه السفية ويحلف بالطلاق من حرمة الغالية من حريمه يا أن شافته عيني لاقتله، ويدلون

يهادونه الجماعة قعد فترة وضاق صدره عقب ها الحادثة وبدى يضعف جسمه وكثرة هوا جيسه، وفيه كثير من قرايبه الكبار اللي يجلسون معه في المجلس يعذلون عليه ويقولون يا أبو سعد ما يصير تحلف اليمين أنك تقتله غير اللي مات تبي تموت واحد ثاني . . ! إلا خله واسمح له والحرمة بدالها حرمة ثانية وماش ما طاع ابد ويقعدون مدة يعذلون عليه إلين الله جاء واحد له كلمة مؤثرة وكلامه له معنى ومؤثر وقال يا ابن الحلال تعوذ من الشيطان وأنت الحين راحت حياتك هوا جيس وأفكار علسان هالولد والولد مهوب قصده الشيء هذا ومهيب نيته يقتله لكن هذا اللي صار انذبح واحد وتبي تذبح الثاني بعد، وبالله وافق بن سبيل وقال خلوه يجي الولد سمحت له .

وجا الولد يوم دراي أن جده سمح له بعد فترة طويلة حول السنة، وعاد بن سبيل قد طلق المرة على حلفه، ويوم طلق المرة وجا عقب فترة ويضيق صدره بالحيل على المرة لأنه يغليها مرة ومالها ذنب المسكينة تحسف بها، عاد جماعته يحاولون أنهم يهدون من روعه ويعذربون المرة في نظره حتى أنها ترخص في عينه وينساها، عاد واحد منهم وهو قاعد عنده ويقول له يا ابو سعد يا رجال اشوا انك طلقته الحمد لله اللي الله فكك منها دقاقة عصلا عراقيبها صفر ويرد عليه بن سبيل أدري أنها دقاقة ولا أبي إلا هي ليتها تحصل ويحاول مرة ثانية ويقول دقاقة عصلا تروع لو تناديك في عاير ارتعت قال ولو ما ابي الا هي، وقالوا له قضن الحرير!! ندور ونخطب لك غيرها قال لو تجيبون ايش ما تجيبون ما ابي الا هي، قالوا الحين هي مهيب من أقاربك بعيدة من أقصى الناس قال أدري انها من أقصى الناس أيها ولو، قالوا تراها بعض المرات تروح للجيران ولا هي تشاورك بس قصدهم يعذربونها ويشينونها بخاطره

والا هي والحمد لله شريفة عفيفة مطيعة ما تطلع من داره قال ابد ما عمرها راحت ولا
تعدت إلا هي مشاورتي ، قالوا أنها مريضة وعليلة قال ابد ما اخبر فيها الا العافية ،
فكل ما حاولوا يعذربونها وهو يعيي ما يبني إلا هي مصمم على رايه لأنه ضعف عقبها
فعلاً عقب ما فقدها قال القصيدة هذي :

يا لله ياللي تسجد الناس لرضاه
يا وامرٍ خلقه على حج بيته
تفرج لمن سده على الناس ما ابداه
راضي على مقسومك اللي عطيته
من شي يسل الحال والجسم يبراه
والناس ما يشفونه ان ما شفيته
قلت آه واجرحاه من خلتي آه
وان حملوني حمل غي قوته
قالوا سفا بالحال ويش اللي اغواه
قلت آه ويش المنكر اللي وطيته
قالوا جهلت وبان علمك لنهاه
قلت آه علمي يا ملا ما كميته
قالوا طلبنا لك من الله معافاه
قلت آه وحدته وعفوه رجيته
قالوا اهله واحباب عينه نصحناه
قلت آه هذا وارد ما بغيته

قالوا ندور لك من البيض حلياه
 قلت آه لو غيره بكفي رميته
 قالوا نشاش الحال وش لك بلاماه
 قلت آه عود الموز بيدي لوبته
 قالوا تزوج كود تدله وتنساه
 قلت آه لو خذت اربع ما نسيته
 قالوا من اقصى الناس وين انت واياه
 قلت آه ما آنسى يوم جاني وجيته
 قالوا نشوفه عند هذا وهذا
 قلت آه ماعمره عقب حجر بينه
 قالوا عليل ناقل داه برداه
 قلت آه باقراي وروحي فديته
 قالوا نشير ولا نفع ما حكيناه
 قلت آه هراج النمايم عصيته
 قالوا كثر شيبك وقلبك بعمياه
 قلت آه لو قلبي غرير نهيته
 مطاوع قلبي بعجفاه وقداه
 والى عطى منهاج درب عطيته
 ياناس خلوا كل وادي ومجراه
 قلتوا كثير وقولكم ما لقيته

هذي القصيدة اللي قالها بن سبيل وهو صادق ، الله سبحانه وتعالى يقول
 " بل الانسان على نفسه بصيرة " فنصايحهم كلها ما دخلت مخه وعيا يوافق على
 كلامهم فيقول مطاوع قلبي يعني ابخص بنفسي ، والبيت الاخير اصبح مضرب
 مثل في المواقف اللي مثل هذي مثل الى جا واحد يشير على واحد وهو ماهوب
 مطيع قال يا ناس قلتوا كثير وقولكم ما لقيته .

والخلو في القصيدة مطلعها ، دايم الاولين في الشعر إلى بغوا بيدون في
 قصيدة بيدونها بتمجيد الله وبذكره ويختمونها دايم بختمة طيبة بالصلاة على
 النبي وتصير القصيدة متماسكه مثل هالقصيدة هذي لو يفرط منها بيت باين محله
 هذا اللي خلى القصيدة تصير خالده .

وإلى لقاء آخر .



حسن الوفا

جرت هذي القصة على الشاعر حاضر بن حضير العازمي هذا الشاعر كان في آخر حياته كفيف البصر هذا اللي أنا سمعت عنه ، وكانوا أهلة رحل يشدون وينزلون وسكنوا في حوطة سدير وقبل لا تحي السيارات كانوا يجون للمدن الكبيرة على رجليهم وقليل اللي يجي على دابة ، وهالشاعر كان رجال فقير وضعيف الحال وعادة الناس اللي يجون إلى المدن الكبيرة يروحون يسلمون على الشيوخ ويقصدونهم وخاصة الشعراء يجون للأمرء ويسلمون عليهم ويكرمونهم ويشرهنهم ويعطونهم ، فهو يوم جا ودخل القصر كان وقتها الملك سعود ولي العهد وحاول أنه يدخل مع اللي يجون يسلمون على الملك سعود وما حصل له وقعد عند الباب ، وهو رث الهيئة ومسكين وضعيف وقليل شوف والأجنبي دائما مكسور الجناح مهوب كل يتلقاه خاصة إن كان رث الهيئة ومهوب معروف ، وجا هو مع الناس اللي يسلمون ولا حصل له أول يوم ولا ثاني يوم ولا الثالث وعجز وبالله عقب عشرة أيام حصل له يدخل ويوم دخل كان هو جايب قصيدة بيلقيها على الشيوخ فلكن قال قصيدة عند الباب ويوم مثل قدام الملك وسلم قال وش عندك قال عندي أبيات قايلها وقال :

عنيت لك من باطن سدير يا سعود

ودي بقربك يا ربيع الضعافي

بالليث يا الضرغام يا منقع الجود

يا مهدي اصعاب العرب بالعسافي

لا جيت يمنعي عن الباب راصود
والصدر ضاق ولا على الله خافي
لعل حظي فيك ماهوب مقرود
واللي عطاك من الوهايب جزافي
تعطي جواد الخيل بارسانها قود
زود على العيرات حم الشعافي
يا ابو فهد ما لي بغير انت مقصود
يوم انهن عضن في الضلافي
ارخص لي اواجه من القل مضهود
رجلي ما يضي عليهن لحافي

واكرموه من ضمن اللي هم يشرهنهم وعطوه حقه اللي الله كتب له وقعد
في الرياض فترة يروح هنا وهناك ويسير على فلان ويتقهوى عند الاسر والحمائل
يوم انه مضى عليه فترة وهو قاعد يمكن حول الشهرين والقريشات معه رابطها
وحاطها في مخباته وما ينام إلا وهو متوسدها ويتلمسها، من يحصل أول
الخرجية، ووده يرسل من هاالخرجية صوغة لأهله وما كان فيه سيارات يالله عقب
١٥ يوم أو ٢٠ يوم تروح سيارة جهة المجمععة، الحاصل وهو في السوق والافيه
واحد من خيرة الرجال وطيب وكريم اسمه محمد بن صالح من الاسر المعروفة
في مدينة عشيرة في سدير كان بن صالح مستأجر لوري ويشيل ركاب يترزق الله
فيها، والسيارة هذي بتمشي بكرا او بعده لوري أحمر والناس يجمعون عفشهم
اللي معه شنطة واللي معه شنطة وفراش واللي معه برمبل فيه قاز والثاني معه باب

خشب واللي معه شبك ومكينة خياطة مشكلين الناس ، أما حاضر دخل السوق بوسط الديرة يسمونه سوق الحساوية اسفله ناس يخيطنون ثياب وجنوبية يبيعون قهوة وهيل واغراض ويجي هو يتلمس ويتحسس ويقعد عند راعي دكان ويشتري منه واول ما فيه كيس تحط فيه الاغراض بس الحريم يجمعون من الثياب المستعملة ويقصصونها ويصلحونها كيس ويبيعونها على اللي يبيعون القهوة والهيل والدارسين فجأ حاضر عند راعي الدكان وقال ابي قياصة سكر يجي لها ١٠ كيلو وقال ابي نص وزنة هيل ما بعد جت الكيلوات ويحط له هيل وقال ابي لومي ويحطها له في كيسة من هاخرق وياخذ شوي دارسين وزنجبيل وفناجيل من ذيك الملونة وبيالات المهم تقضى واخذ له اغراض واجد وشافها والى والله واجدة ولقى واحد يبيع كنادر رامي صندوق خشب ما يبيه واخذ اغراضه وحطها في هالصندوق واخذ حصاة وسمر عليها وقال خلها عندك الى بغى بن صالح يمشي ابروحوه معه قال زين .

وفعلاً يوم جا بيمشي بن صالح قال له الله لا يهينك هالصندوق ابيك تجدعه لأهلي إلى وصلت أهله يدري عنهم ساكنين حولهم ، ويوم انه حط الصندوق في اسفل السيارة وركبوا الركاب وتجمعوا اللي على السلة واللي في الصندوق واقفين اللي متلطم واللي يحكي مع خوية ودايم الغمارة يحجزونها للمعارييس أو اللي يبي والدته يحجز الغمارة اللي قدام المهم أخذوا صندوقه ومشوا ويوم وصلوا الديرة بعد يومين أو ثلاثة أيام لأنهم يواجههم تغريز وحفر ودفن وأحياناً ينزلون العفش علشان يدفون السيارة يغتثون مرة هالكلام قبل لا تتزفلت الخطوط فيوم وصلوا للديرة وبغوا ينزلون الصندوق ما لقوه تخالفت فيه يدين وضاع .

فضاع صندوق حاضر ولا يدري وين راح ويوم جا عقب شهر ورجع حاضر
 لأهله وسلم عليهم على باله أنهم مسفهلين ومستانين واصلتهم المقاضي
 والأغراض ويسألهم عن أخبارهم وأحوالهم ويقولون الحمد لله بخير بس ما
 روحت لنا شيء في روحك، قال وشو . . ! استغرب حاضر قال روحت لكم
 صندوق فيه أغراض فيه هيل وقهوة وزنجبيل ودارسين وكسوه لكم وين راحت
 قالوا ابد ما وصلنا شيء قال ارسلتها مع بن صالح قالوا ابد ما جانا منه شيء،
 وراح حاضر لبن صالح في مزرعته وسلم عليه ويسأله قال يا ابو محمد
 الصندوق اللي روحته معك ما وصل لأهلي قال دور تأكد يمكن واحد من
 الركاب نزله ولا يدري من هو له، فدور على الصندوق وما لقاه ورجع لبن
 صالح ويقول الأبيات هذي :

يا خوي انا اخترتك على كل مخلوق
 وارسلت معك من المقاضي علاقة
 بلاك خير واجودي وماثوق
 وشرواك مع حملة يشيل الوساعة
 يا ابو محمد يا هوى لابس الطوق
 ما هوب حق اشناك عقب الصداقة
 عندك غدالي يا ابن الاجواد صندوق
 وانا حشا ما الحقك تهمة سراقه
 لكن تبلس واطهر الطاق مطبوق
 وان اعتقل ما الحقت راعيه ساقه

والا اغرمه لي يا ابن صالح من السوق
 موجب من العازة ولاش أنفهاقة
 الى قلطت بحق مانيب مفهوق
 حقي هو القادم وادور لحاقه
 على المناصي لي معالم وحقوق
 وجيش ومخاريج وكساوي رقاقة
 وارد على الأخيار مع كل طاروق
 واقلط بدم الوجه قبل اندفاقة
 الكذب نقع صباح همج ومطروق
 والصدق قرهود قراح مذاقه

القي هالقصيدة على بن صالح وقال يا حاضر والله يا ابن الحلال ما أدري وين
 صندوقك وحنالو محناب محل ثقة ما روحت معنا صندوقك من الأساس قال
 حاضر اي بالله محل ثقة إلى الحين لكن تخبر أنا رجال ضعيف وهذا محصولي وأبيه
 لأهلي قال بن صالح والله ما لقيناه بس يا حاضر صندوقك كم تقدر قيمة اللي فيه
 قال مهوب غالي من الميتين وفيها وإلى ذلك الوقت يوم يجيهم وقت صرام التمر وكان
 عند بن صالح نخل يسمى المظل وكان في النخل اخو بن صالح ويقوم يكتب لأخوه
 ناصر أنه ياصلكم حاضر تعطونه ثلاثمية وزنة تمر بدال صندوقة ياكل منها ويبيع اللي
 يبي وعطاه الورقة تشكر منه حاضر والحقيقة هذي العادات الطيبة ، وهذا هو
 الشاعر ثبت كرم أسرة بن صالح بالقصيدة هذي اللي ذكرها . وإلى لقاء .



من ضحايا الغرام

سمعت هذه القصة من الشيخ منديل الفهيد رحمه الله ، ويذكر في القصة أنها جرت على واحد اسمه مسلم الوليعي من جهينة يقول أن مسلم كان يرعى البيل في جهة بلدان عنزة في الشمال وطول ما هو راعي عند معازيه مرتاح منهم ومرتاحين منه واثناء جلوسه عندهم شغله في الرعي كنه جازت له وحدة من البنات وكنه حس منها ودّ له ومحبة ويتلاقون كل يومين أو ثلاثة ويشوفها ، هو مال قلبه لها وحبها وكنه حس منها بمحبة ودائما عفة الرجل العربي تبعده عن المحارم والعمل الردي مع النساء .

وطول فترة وعيشتة عندهم يتلاقى مع هالبت في المكان الفلاني يوم في الشعيب ويوم في المكان الفلاني وحاس منها بالود وبت جميلة بالحيل بس ما بعد تأكد من حبها له وهل هي تبادل نفس المشاعر فحب يتأكد منها وراح لمّ عجوز لها محل معروف تجلس فيه من هالعجز المحكحكات اللي تقبل ربيانة قد مر عليها من السوالف والعلوم إلى قبل ، ودائم يقعد عندها ويروح لها ويتعير عليها وتتعير عليه المهم قال لها يا خالة انا والله ميت على فلانة واحبها وودي اعرف هي صدق تحبني وإلا لا . . ؟ ، قالت إلى جا باكر علمتك عادي صايرة مثل العراف اللي معروض عليه قضية قعدت تدرسها من كافة الجوانب وقالت له من بكر إلى جا يوم من الأيام وعودت للمراح طح وصح وإدّع أنك مقروص في رجلك وطح وتألّم وبين أنك متألّم ومقروص وتشوف من اللي بيفزع معك منهم ، وفعلاً يوم جا ليلة من الليالي ويطيح ذيك الطيحة اللي كنه طايح من

حادث ويقعد يتألم ويتلوى قدام ربعه ويصيح واللي في الفريق يصايحون مقروص مقروص مع اصبعه من يبي يمص السم ويطلعه - من أول الى قرص أحد يجي واحد عصامي ويتبرع ويمص السم ويتفله لأن فيه خطورة - ويصايحون من يمص السم ومحد تقدم يشوفونه ويتألمون لألمه بس ما احد حاول يمص السم، شوي ولاهذي البنت سمعت بالخبر وجت متألمه بالحيل وش فيه قالوا مقروص ولازم واحد يمص السم وناظرت وما لقت واحد يمسه فقالت أنا أمص السم وهو يصيح ويشوفها وهي تصيح ودمعوها تهل من عيونها وتجي البنت تجلس عند رجله ولمست ساقه، وقرت عليه بصوت خافت ومن يوم هي يوم لمست ساقه وهو باديته العافية .

المهم من خلال الموقف هذا عرف أنها فعلاً توده وتجبه عاجوه ذيك الليلة ومعروف اللي يعالج أول كبار السن والعجائز عطوه سعوط وبخروه، ويمكن هو بعد طاق اصبعه بحصاة مخليها تارم ونام على باقي ألمه علشان ما يبين وينكشف، وعقب يومين وهو متعافي ويلاقيها في المقلى ويقول لها تراني اودك وأحبك وأنا والله ودي اتقدم واخطبك وسكتت البنت ويجي عقب يومين ويلاقيها بعد في مكان ثاني قريب من مكانهم ويهرج عليها مثل الهرج الاول، وإلى لها البنت أخت صغيرة تسمع الكلام من بعيد وهو يقول لها أني ودي اخطبك وتقول ما يخالف بس عيال عمي مهمب مطيعين ومهمب مخليني وحتى لو عرضوا علي ما أبي إلا أنت ما أبي غيرك أحد والبنت الصغيرة سمعت هالكلام ونقلته كنها فاكس وعلمت أبوها - ويقول المثل خذ علوم القوم من سفهاها - .

فقلت له أن أختي قعدت معه وأناي اسمعهم يقولون كذا وكذا فعاد اضطرب أبوها ودار حكي بين أبوها واخوانها وكن البنت حست بعدين أنهم ناوين لهم نية مهيب زينة أما ضرب أو قتل وإلا غيرها، وراحت وعلمته أنهم كذا وكذا وهو ياخذ ذيك الذلول ويروح عليها في ليلتها ويرجع لدياره الأصلية يجلس عند أخوه ماله إلا هالأخو اللي أكبر منه بس ويسكن عنده في جهة المدينة المنورة المهم جلس فترة عند أخوه وإلى والله كل ماله يضعف وتكثر هواجيسه ولا طاع يبي شغل ولا عيشه يا ما طلع من البيت وجلس يخطط في الأرض عند عاير ويهوجس وكل ماللهواجيس تكثر حتى عيونه متفرقة إلى جيت تناظره ما تدري وين بيروح معه من التفكير، ومعروف الهواجيس تلعب في الواحد لعب ومثل ما قال بن لعبون:

لا دك به هاجوس ما يسمع الطوب

واليا انتبه ماجابت الورق جابه

الحاصل أن الرجال بدا يضعف مثل المريض وإلى هو مربى جدائل جميلة عليه، المهم شافه أخوه أنه مريض ولا عرف علتة ولا يدري وش فيه ويقولون له ناس لا ينهبل أخوك وإلا يجيه شيء شف وش علتة أو مصيبتة، ويوديه لم عجوز تعالجه وتحاول فيه تعرف وش علتة تطالعه وتشوفه والولد ما علمهم بشيء ولا بين لهم حاجة، ويوم بغوا يطلعون تجي العجوز تنادي أخوه وتقول له أنا ما أدري وش فيه يمكن أنه عاشق وإلا فيه شيء بس وده أنت لم جبل رضوى رح أنت واياه اكشتوا وقله نبي نروح نقنص وخله يرقى الجبل وإلى طقه الهواء يبي يبين منه علم، المهم جا بعد كم يوم وقال له يا أخوي ودنا نروح نقنص ونصيد أنا

واياك ونوسع الصدر وياخذة على الذلول ويروحون لم جبل رضوى ويوم
وصلوا جلسوا فيه وشبوا الضو ويصلح القهوة وصاد له طير وشواه له المهم قعد
الولد على حصة والى رجليه تومي متدليه وإلى رضوى هذي مكان رفيع
ويشوف مسافة تحته مد نظره، وقال له اخوه اقعده خل الهواء والبراد يطقك وتراني انا
منيب بعيد عنك ابروح اتصيد وراح اخوه يتصيد لكن باله معه ويشوفه من مكان ما
يدري عنه : وبعد شوي بدا مسلم يغني بصوت جميل لأنه يشوف المنظر اللي تحته
من بعيد في شجره طلحة كبيره وبعيده وتحتها خضار وموقع مثل اللي كان يقابل
فيه البنت اللي هو عشق فقال هذه الأبيات .

يقول الوليعي والوليعي مسلم

من دامت أيام الصبا له دام

لو إن عجات الصبا يجبرنه

كما يجبر الجابر كسير عظام

ليال الهوى مثل الربيع الى زها

وش حيلتي ما للربيع مقام

قار قراني يوم قرصت بهامي

غرو صغير ماعليه لثام

قراني وهو يسفح من الدمع ناظره

ليته قراني والعيون نيام

الى قرى عليّ وارخا لثامه

قلبي تزايد علة وهيام

رقيت في رضوى ورضوى منيفه
واخيل في عيني جنوب وشام
واخيل بعيني طلحة^(١) ناعمية
سلام يادار الحبيب سلام
أنا جيتكم من راس رضوى عشيه
كما شن غرب باد منه وذام

يوم سمعه اخوه يقول كذا عرف أنه بيطيح ويجي يركض ويحاول يسكه ولا مسك إلا عباته والولد طاح من الجبل وعرف أخوه أنه مات فقام وشال اغراضه ونزل تحت الجبل ويجي عند اخوه والى هذا اخوه ميت ويقوم يقصص جدائله ويروح ومعه العباة ويوم تم له يومين ثلاثة ويروح لم العرب اللي جا منهم اللي عندهم البنات، ويوم وصل وينشد عنهم ولقاهم وعرفهم بوسم الابل وجايهم بصفة أنه كنه دوار ويدور على ذهب والتفوا حوله الناس وإلاه قايم على جدائيل أخوه وحاطهن على الشداد والعباة جنبهن وما يدري الاخو الا يوم انطلقت من بين البيوت بنية جميلة وتجي تقرب من عنده وتشوف الجدائيل والعباة عرفت عبائة وجدائيلة وتسأل وتقول له أسألك بمسير قدمك ومجري نسمك وعالم علمك راعي هالجدائيل والعباة هو وينه ويقول ابد هذا تعاشق له مع بنت ولا حصلت له ويجي يوم ويعدي على راس رضوى ويطيح ويموت ولا ادركنا منه الا العبابة وجدائيلة ويوم سمعت هالكلام وتشهق ذيك الشهقة وتطيح وتموت .

(١) طلحة: شجر الطلح الكبيره.

طالعتها اخوه قال اثره ما ينلام وخاف يعشق ويصير له مثل ما صار لاخوه وقال

بيتين هو:

والله فلا الوم الوليعي ولو طاح
من راس رضوى والعوض به عباته
مير افطنولي عند هبات الأرياح
لا اذب عمري ثم اسوي سواته

وبالختام: هذا والله أعلم وإلى لقاء آخر.



مغيب القمر

جرت هالسالفة على الشاعر المعروف سليمان بن شريم من بني زيد ويعتبر من أبرز الشعراء في الجزيرة العربية في الرد والنظم وتوفي عام ١٣٦٣هـ، وطرق أغلب انواع الشعر في الوصف والحكمة والغزل العفيف والرثاء، فالسالفة هذي يقولون أنه توه متزوج في الوشم ولا أمدها يتهنى من العرس ويمضي فترة مع زوجته إلا ويجونه مجموعة من الأصدقاء كان هو يرقبهم من زمان أنهم يحدرون من نجد إلى الخليج لتجارة لأن من أول إلى بغوا يروحون كانوا يروحون مجموعة ما يقدر يسافر الواحد بروحه لما فيها من أخطار، فراح مع هالمجموعة من اللي يعزهم ووصلوا الكويت ومعروف الواحد ما يحس بلوعة الفراق عن أهلة والمكان اللي جاي منه إلا إلى قعد يوم يومين، وسليمان فعلاً قعد له شهر وهو لا يزال قلبه متعلق في ديرته اللي جا منها فمضى الشهر ومضى خمسة أشهر والرجال ماش ما تنام عينه يهوجس بالمكان اللي جاء منه وطلع في الليل في وقت قمرا وطبيعي اللي في بيت ومع ناس وهم عزابية ونائمين وتجزى عينه من النوم يطلع في الشارع أو يطلع للسوق يتنفه أو يمشي في البر لحاله يرفه عن نفسه شوي ويحكى على نفسه والأولين إلى شافوا واحد قاعد مثل كذا قالوا له هاه يا فلان وراك مصومع لحالك المهم طلع ذيك الليلة وإلى الهوى جاي من جهة الشرق من يم نجد وقام وتمثل بالأبيات هذي يقول:

يا الله يا مجر القمر من مغيبه

يامرجعه للشرق من عقب تغريب

تفرج لعين من وجعها مريبه

عيا يفيد بها الدوا والتطايب

هذا لها خامس شهر مستصيبه
 بين الرجا والياس والخبث والطيب
 على الذي من دونه أرض تعيبه
 ماياصلنه متعبات المناجيب
 ليت الهبوب اللي تجيني تجيبه
 لا شرقت من نجد من غير تجيب
 لين أني أقضب مقدمه والتوي به
 عقب التفرق والبطا والتغارب
 يقرأ المضموني وأنا أقرأ لغيبه
 سراير تكشف بليا مكاتيب
 اللي علي فراق شوفه صعيبه
 نهار قفينا على الفطر الشيب
 المترف اللي ما يمتع صويبه
 جربت منه وكل شي بتجريب
 أدعج غنج كنه عيون الريبه
 شيهانة تفرس بكل المخاليب
 والراس ذيل اللي يشعشع سبيبه
 يسبق إذا جن السبايا جناديب

واخذ قنديل الدجا ينسري به
 عليه من شغل النصارى كواليب
 عوده كما البردي ليان رطيبه
 تومي به النسناس بين النبانيب
 وملاس ما نشت منها لبيبه
 ألين من الديباج دمث المقاضيب
 ريحه كما ربح النفل في شعيبه
 في وادي عله من الوبل تشعيب
 مطور أمس ومسي ما وطيبه
 واليوم شمس وفاح طيب على طيب
 لواهني الذيب يرفع قنيبه
 وأنا قنيبي بالخفا شقت الحبيب
 ما والله أصخي به وأنا خاطري به
 لو غترت سود العوارض من الشيب
 يا أهل الهوى سود الليالي صعيبه
 يا ما سعن بفراقهم عقب تقريب
 خط بسجلي ما لغيري قري به
 عطف بلطف واجتماع وترحيب
 صلوا على سيد البرايا طيبه
 ما افتر دولاب الهوى بالدواليب

هذي قصيدة سليمان بن شريم واللي اشتهرت وعرفت عند أهل الشعر الشعبي يمكن لأن ما احد سبقه في المعنى يوم يقول ريحه كما ريح النفل في شعبيه ، وله قصايد كثيرة منها القصيدة اللي قالها بعد فترة يوم كبر وحاول أنه يتقدم لخطبة مرة مخليها زوجها وجا بيبها من اخوانها واثنين من اخوانها وافقوا وواحد عيا وكل ما جا سير عليهم في نخلهم والا مار يسمع صوت البنت تون تتعب من الشغل وتدري هي انه جاي يخطبها ويبها وودها ان اخوانها يوافقون فقال هالقصيدة هذي :

يا ونتاه اللي برت جسم حالي
بري الدبا ننبوب غصن تغشلاه
على وليف بالموده صفالي
ازريت انوش حماه وانا اتمثناه
غرو جبينه مثل خط الهالالي
سبحان رب صوره لين سواه
وحياة رب كمله بالجمالي
من مفرق الهامة الى حد مطاه
انه منول وامس واليوم غالي
واتلى زمانه بالغلا مثل مبداه
ماله وزين الامودة عيالي
اصغر عيالي بالغلا كنه اياه

لابطيت ما شفته وهو ما عنا لي
عفت المكان اللي يغيضه ويجفاه

هبي بريحه يا هبوب الشمالي
كود الجنوب ومطلع الشمس تنصاه

هذا من قصيد سليمان بن شريم رحمة الله عليه ومن قصيد الغزل الرقيق،
اللي إلى الحين باقي ومحفوظ من قوته واللي عليه الكلام اللي تمضي السنين وهو
ما يسمل دايماً متجدد واضح المعنى وقوي، ولذا صار هو القاعدة الشعرية وإلا
كيف وصلت اخبارهم واشتهروا وصاروا معروفين مثل بن شريم وبن سبيل
والقاضي وبن ربيعة ومحسن الهزاني وفيه غيرهم في الخليج فيه في الاحساء/
محمد بن مسلم سليم بن عبدالحى والمغلوث ومن أهل قطر المعروفين الشاعر
محمد بن عبد الوهاب الفيحاني مثل هالشعراء البارزين اللي انتشر قصيدهم
وتناقلوه الرواة.

هذا وباللله التوفيق .



حرص الآباء على الأبناء

في هالقصة نبي نتحدث عن الأبناء، والأبناء شأنهم عظيم وخاصة في مثل هالأيام، يجب على الرجل العاقل اللي عنده عيال أنه يحرص عليهم وخاصة الولد الكبير لأن غالباً إذا صلح الولد الكبير اقتبس منه الولد اللي اصغر منه وصار يقتدي به ويقلده ويصير إن شاء الله مثله ودائماً تخبرون الاولين عندهم دعوة دايماً يرددونها في المجالس الى منهم شافوا الولد هب ريح وتبدو عليه المرحلة قالوا يالله اصلحه يالله جعله اطيب من ابوه يدعون له، لأن الولد الى صار صالح استمرار صلاحه من صلاح ابوه الأبوالى صاروا عياله صالحين وش يبي احسن من هذا، والعيال الصالحين او الولد الصالح نعمة فيه حديث ان ابن آدم اذا مات انقطع عمله الا من ثلاث علم نافع يتتفع به او صدقة جارية او ولد صالح يدعوه له صلاح الآباء يدرك الأبناء .

له، فدائماً الولد الصالح يحبونه الناس ويضربون به المثل وفي مثل هالايام يا اخواني كثير من الناس وخاصة بعض الاسر رجالهم يطلع ياخذ سيارته ويروح مع ربه يمين ويسار ويترك عياله وانا خابر هاك الحين يوم انا صغيرين اذا جا الرجال للعزيمة والى هذولا عياله معه حتى الصغير مره يلبسونه غترة وعقال ويعلمونه المرحلة ويخلونه يروح معهم ويتعلم الصغير من اللي اكبر منه لان الحقيقة فيه اداب وفيه شيء يجب على الآباء انهم يربون عيالهم عليها لان مهوب كل شيء يدرسونه في المدارس ويتعلمونه فيها، فيه آداب وسلوك وعادات تكتسب من الخبرة والمران في المجلس مع الرجال الى بغى يروح واخذ عياله معه

اول شيء يعودهم الولد الجذع اللي عمره من اربعتعش سنة وخمستعش عيب انه يروح يرتز في راس المجلس في مكان الشيبان الكبار لا ما يصير مهوب محله، محله يصير في طرف المجلس ويصير صامت وساكت ولا يحكي، لين يسأل .

الرجال اللي جاي معزوم هو وعياله وجوا قلطو وسلموا العيال سلام مصافح بعض العيال الصغار الى شاف رجال طويل تعلق في رقبتة وحاس شماغه وبهذله، سلم سلام مصافح واقعد في طرف المجلس ويتعلمون كيف ياخذ الفنجان وكيف ياخذ البيالة يتابع البيالات اللي في المجلس ما يخلي البيالة على جنب ويحب راس الشايب ويتحفي به يعني اشياء تكتسب من خلال المجالس مهوب مع الأسف الحين الله يهدينا واياهم بعض هالشباب اعتب عليهم الى بغوا يروحون للعروس والعزائم يلبس كبوس هذا مهوب لبس الزي العربي اللي الله اكرمك فيه وحتى يبين لك هيبه ووقار، ولا يكثر البربرة والكلام مع اللي جنبه يقعد ويصير عينه على ابوه متى ما قام ابوهم يمشون معه يتقدم ابوهم للسيارة يفتحون الباب لابوهم واخذوا البشت من ابوهم هذولا العيال الصالحين، والا جو عند ابوهم رجال ما يرحون يمين ويسار ويلوذون عنه الى صار عند ابوهم رجال ضيف جو وجابوا القهوة والقدوع وصبوا وصار واحد في طرف المجلس الى قال له ابوه جب المدخنه وأنا أبوك جابها هذي من الاشياء تكتسب من المجالس .

صحيح انها مهيب تدرس لكن تكتسب كذلك في المسجد الى بغيتوا تروحون تصلون الله يقول خذوا زينتكم عند كل مسجد وعند كل صلاة، فإذا بغيت تروح تصلي البس ثوب زين وتكشخ واحضر الصلاة من أولها علشان الله سبحانه وتعالى يوفقك في الدراسة بكره الى شافوك في هالسلوك الطيب الجيران

والاقرباء اقتدوا بك وقالوا ما شاء الله على ولد فلان الله من العقل الله من
المرجلة هذا اللي بيونه الناس هذا اللي يفتخر به أبوه حتى اذا صار بهالسلوك هذا
شرط ان ابوك مهوب قايل لك لا اللي تبنيه بيبي يحصل بس هاه التوسعه والروحه
يمين ويسار ومع أصدقاء السوء وإلا الى بغى يروح ما يشاوره وش يضرك الى
بغيت تروح تقول يا أبوي ترا اباصل صديقي في المكان الفلاني وتراني ابرجع في
الساعة الفلانية والى تأخرت اكلم اذا وصلت اخلي اهلي يطمثنون أما انه يروح
كل الليل ما يدرون وين هو فيه . . ! هذه مشكلة .

ابوك وامك يرجفون الين تجي هذي الحقيقة من القلب نصيحة لأبناءنا وإن
شاء الله أنهم متصحين لكن هذي من شيء في القلب ومن محبتي لهم أنهم إن
شاء الله يطلعون عيال صالحين وفيه واحد من الشعراء الاولين اسمه علي بن
رشيد العازمي - رحمه الله عليه - عاش في قرية نفي في هاك السنين الاولة قبل
التمدن ويطلع الكهرب والسيارات تو الناس يمكن هالكلام قبل ستين سنة في
هالحدود لكن هاك الحين ثياب الصغيرين كانت تخيط وتباع بالكورجة كل
عشرين ثوب يسمونها كورجة تباع سوا، وعلي بن رشيد هذا له ولد كبير اسمه
رشيد ولا عاش عندهم يمكن انه يوم كبر وصار رجال راح اشتغل في المدن وطلع
وبعد يمكن جا عقبه عيال وبنات وراحو وتفرقوا وهو على كبر سنة الله العالم انه
في السبعين رزقه الله بوليد وسماه محمد وصار هو القعدة يروح به معه ويجي به
ويخشه في البشت الى صار برد ذاك اليوم عن الهوا من محبته لولده والى بغى
يروح يصلي راح به والى صار فيه عزيمة راح به الله العالم انه ست سنين في
الحدود والى جا الشتاء ينومه معه في البشت ويغطيه أنا ما أدري أمه موجودة وإلا

لا لكن ما حن عليه بالحنان هذا الا يمكن ان امه مهيب موجوده ما ادري لكن يروح به والى جا في عزيمة يقطع له لحمه ويعطيه والا يعطيه تمره، والوليد هذا حليل ونبيه وذكي فيوم جا يوم العيد قام ابوه شرا ذاك الثوب الازرق ثوب تقدر تقول رقبته وسيعه شوي والثوب على قده كنه مغسول عليه وهو واقف ازرق ويمكن هاك الحين يتقصون الناس في الخياط والا في اللون والشكل يمكن بعض الثياب الكم هذا والكم الثاني صاير افتح من الثاني بشوي مهوب يخالف كل شيء يمشي او يصير اسفله ضيق وبعض المرات اذا صار طويل مره يرفعونه مع الوسط والى غسلوه وكمش فتقوا الرفاع وغدا مكانه أبيض كل هذا مهوب يخالف وشارين للوليد طاقيه ذيك الطواقي اللي يكتب عليها مكة المدينة طواقي قبل طواقي شالكي .

المهم يوم شروا له الطاقيه كان باقي على العيد يوم او يومين وقالت وحده من اخواته وراكم لبستوه الطاقيه قبل لا نحلقه ودوه يحلق يا ابوي حتى نغسل راسه ويزين وجهه قاموا وحلقوا الوليد المهم يوم حلقوه استاسعت الطاقيه عليه صارت وسيعة عقب الحلاقة فقاموا وكفتوها من ورا تكفت الطاقيه من وري ووترفع وتصير واقفة مهوب يخالف في القرى المهم الوليد في يوم العيد يدور مع العيلان ويطققون البيوت ابي عيدي عادت عليكم في حال زينة ويصيرون العيال من العشرة وفيها عدددهم، ويصير مع العيلان اذا صارو عشرة تسعة لازم يصير واحد فيهم اكبر منهم بشوي يصير بعض المرات عبث ولعاب وهو اللي يفتن بينهم يخليهم يتهاوشون ويتطاقون بيناتهم، فيطقون على البيوت وكل ما طقوا لهم باب ابي عيدي عادت عليكم وتفيض عليهم من ها الحريم والا العجز اللي تحط له شوي

حب واللي يعطونه بيض والا قريض فولد بن رشيد معه طاسه صغيرة معه قريض ويدور مع العيلان عليه الطاقية المنقشة بحمر وخضر وعليه ذاك الثوب الازرق ويدور، ولد بن رشيد ذكي ونبيه لاحظ العيال الباقين كلهم أغلبهم عليهم غتر الا هو عليه طاقية بس والغتره من اول تباع بريال ذيك اللي مخططه باصفر ولاحظ بعد هو ما عليه غتره والى ذا الولد الكبير تقدر تقول شيطاني وغثيث قام جمع العيلان اللي اغلبهم عليهم غتر قام وخلاهم يصيحون على ولد بن رشيد مسيكين ما عليه غتره مسيكين صاح صاح هذا هو صاح وخلوه يبكي صدق وصاح قام وخذ الغضارة وراح لأبوه والى ابوه في الديوانية، ابوه في بيتهم له ديوانية فوق لها دريشة تطل على الديرة وابوه كان عازم الجيران عازمهم على العيد ومسوي القهوة ومعه الدلال وشاب الجمر ويطقق بالملقاط ويشتغل والاهم مولين لهم بادية جريش يبي يقلطوهم ما درى الا حس الوليد مع الدرجة جاي يصيح والى الولد وهو يرقى مع الدرجة مثل ما تقول الحريم البارح فارشين لهم حصير جديد بمناسبة ان اليوم العيد والحصير بالعادة يكون مطوي وتوه جديد ما بعد لبق صاير طرفه ملتف .

والولد وهو يرقى الدرجة مع الصياح والشهاق تعثر في طرف الحصير، وهالحين بعض العيال الى قام يصيح ما تهتم بصياحه بيتل يصيح تقول بكيفه ولو يسكت يمكن تقوم تطقه حتى يصيح زود لأنك تحس أنه كذوب وبعضهم صياحه يكسر القلب ويحزن اللي ما فيه حزن كنه صياح يتيم المهم يوم رقى ولد بن رشيد والاه يكسر هاك العبرات ويشاهق وفيه ناتور من الصياح ويوم عثر في الفراش وينكب القريض اللي معه في الغضارة وقال أبوه بسم الله عليك ولدي ولدي محمد اقرب اقرب وراك تصيح وانا ابوك وش هاللقريض وحطه في الغضارة وقعه في حجر ابوه وقال وراك وانا ابوك تصيح . . ؟ افا عليك وش بلاك تصيح يوم ناظره والى عيونه مغورقه بالدموع ويقوم ابوه وياخذ اسفل

الثوب ويمسح عيونه ووجهه ويخليه يركد لكن توه ما بعد ركد يشاهق سأله قال
 وش فيك قال وهو يصايح ال ال ال العيلان قال وش فيهم قال كلهم يصيحون
 علي ما عليك غترة قال يعني تبي غترة وأنا أبوك قال ايه أبي غ غ غ غترة، والى
 الريال وين اول من يحصل الريال قام الابو تسلف من واحد من الجيران اللي
 عنده ريال والى مار راعي الدكان معهم حاضر في العزيمة اصلا الديرة كلها
 مافيها الا دكانين قال له حول افتح الدكان والله ما نخلي محمد يصيح وركض
 وفتح الدكان ويشقون غترة من الطاقة ويجيبها ويلبسونها عليه بنشاهها توها ما بعد
 لبقت بالحليل ويحزمونها على راسه يوم ركد الوليد وهجد عن الصياح وناظره
 والاه راكد قال هاه استانست وانا ابوك قال ايه عاد رأسه والغترة عليه جديدة كنه
 صندوق شاهي مصندق ما بعد لبقت الغترة عليه زين قال ابوه هالقصيدة:

لا يا محمد دمعتك لا تحيري

اللي تبي جنبناه سمح به البال

ارضيك يوم انك غرير صغيري

ايك ترضيني اذا صرت رجال

لا اجل انك اغلى من سواده نظيري

جنبنا لك الغترة من السوق بريال

عساك تسلم لي واخوك الكبير

اعمالي انتم كان ما جالي اعمال

اما لي منه تدانا مسيري

والا ليا مني تشاويت الاعمال

يا رب تقبل توبة في ضميري
واغفر لي الزلات عن ماض الافعال

وان تجعل الفردوس غاية مصيري
امين يا منزل تبارك والانفال

الله يعفوا عنا وعنه ويرحمه وإن شاء الله الولد طلع طيب ويدعي
لأبوه، والحقيقة هذي من العادات الطيبة اللي دايم يحرصون الناس في سبيل
يصيرون عيالهم صالحين. إن شاء الله، وفق الله الجميع للخير وإلى لقاء.



غربة دباس

السالفة هذي عن الشاعر/ راشد بن عبدالله الدباس قصيدة أبو دباس المعروف، وهو من أهل عودة سدير من الوداعين الدواسر، وردت القصيدة في عدد من الكتب وكذلك رد ولده عليه ولكن مع الأسف ما يعرف عن هالشاعر العلم إلا هالقصيدة هذي بس، يمكن أن قصيده ضاع أو ما دون وكذلك اللي فهتمت من بعض الرواة من أقاربه أنه توفي في عام ١١٦٣ هـ، رحمه الله.

وأبو دباس مثل ما ذكرت لكم من أهل العودة اللي هي تقريبا من أقدم قرايا سدير صايرة في جهة الشرق في سدير بالنسبة للي رايح مع طريق القصيم أول ما يوافيه العودة ويجي عقب العودة العطار ويجي عقبها عشيرة ثم الخطامة ثم الجنوبية والجنيفي ثم الحوطة وروضة سدير والتويم اللي هي ديرة الشاعر/ محمد بن لعبون، والشاعر/ إبراهيم بن جعيثن، هذي القرايا اللي تقريبا في سدير وأقدمها العودة والحصون والتويم والدليل على قدم العودة موجود فيها بقية آثار قصر غيلان ذي الرمة الشاعر العربي المعروف، الحاصل أن الشاعر/ راشد الدباس غاب عنه ولده دباس راح يدور العيشة ويركب الغوص ويتسبب في طلب الرزق على سواحل الخليج العربي وطولت رحلته أكثر من ثمان سنين فكان أبوه يرسل له وما يدرى الرسايل هي تاصل وإلا لا وحتى هو في مدة غيابة كان يرسل لأبوه مثل ما تقول هدايا ويواصله وأبوه ما تهمة الهدية.

الحاصل أنه يوم ابطى طبعاً انزعج الوالد وكبر في السن كان ولده من اول يوم انه يروح وهو صغير الولد يمكن عمره دون العشرين وخايف عليه ابوه ومن أول كانت اسباب المعيشة كلها تعتمد على الله ثم على الحرف والمهن اللي يقوم

بها أرباب البيوت والعوايل على قول المثل (من زندك وإلا مت) كل الناس
 يشتغلون بالحرف كل يشتغل بالمهنة اللي هو يجيدها، الولد يوم طول في غيابه بدا
 الابو يضعف شوفه ويقل حيله وحس ان لا بد من وجود ولده عنده وبعد اللي
 ضيق صدره زياده وخلاه يكتب القصيدة ان من اول كانت النخيل ما يجيها السيل
 الى جا مطر ما ياصل النخيل الا بالتعب والغثى وبعضه بالقوة يتطاقون عند
 مفارق السيول وعند مدخال السيل دائما يصير مشاكل ومع الأسف اقاربه او
 ربعة واللي حوله يوم كبر وشيب ولا صار فيه حيل بدوا يضيّقون مجرى السيل
 حق نخله لين ما صار يجيه شي فكتب القصيدة يشكي الحال على ولده ويتألم من
 الوضع اللي هو فيه ويوم يروح الولد وهو صغير وابوه يخاف عليه ينحرف يروح
 منا وإلا منا لا سيما وأنه سنة قابل للانحراف لا سمح الله وفي ديرة غربه فقال
 أبوه هالقصيدة هذي اللي مطلعها يقول:

يا ونة ونيتها من خوا الراس

من لاهب بالكبد مثل السعيرة

ونين من رجله غدت تقل مقواس

يون تالي الليل يشكي الجبيرة

وياحمس قلبي حمس بن بمحماس

ويا هشم حالي هشمها بالنقيرة

ويا وجد حالي يا ملا وجد غراس

يوم اثمرت واشفى صفا عنه بيره

على ثمر قلبي سرا هجعة الناس
متنحر درب عسى فيه خيرة
الله يفكه من بلا سو الاتعاس
ومن شر عبثات الليالي يجيره
في ديرة تقطعت عنه الارماس
سبعين يوم للركايب مسيره
لا والله الليي حال من دونه الياس
حط البحر والبر دون الجزيرة
عقب لسلوان وري العين وطاس
وقلبي على فرقاه تسمع فريره
يالله يا الليي رد من عقب ما ياس
يوسف على يعقوب وابصر نظيره
ترجع علي دباس يا محصي الناس
يا عالم ما بالخفا والسريرة
يا دباس انا ابوصيك عن درب الادناس
تري الذي مثلك يناظر مسيره
اوصيك بالتقوى ترى العز يا دباس
في طاعة الليي ما ينجيك غيره
هذي ثمان سنين من رحى يا دباس
لا رسالة جتني ولا من بريرة

يا دباس من عقبك ترى البال محتاس
وعليك دمع العين حرق نظيره
وعليك كني في دجى الليل حراس
اصبح على حيلي وعيني سهيرة

وكني اتخيله ابو دباس وهو قاعد يهوجس الى جا في هالليل جته الوساويس
وجاه ابليس دلا يلعب عليه ولذك راح منا ولذك انحرف ، ويهوجس بعد في
امور عايلته وهالصغار يقول لا سمح الله لو تزل بي قدم واروح من يبي يرعاهم
ومن يرعى ظروفهم ولو رحت عنهم ادوره واغاب قالوا راح عن عياله بس فك
عمره ولا عليه الا من نفسه ويكمل ابو دباس :

اصبح وانا ما بين طاري وهو جاس
وطواري تطري علينا كثيرة
مثل الوحش قلبي على كف حباس
يكفخ كما طير سبق القصيرة

متحير من عيلة البيت يا دباس
ارجي ثواب الله واخاف المعيرة
اخاف من حكي العدا ثم الانجاس
اهل الحكايا الطايلة والقصيرة
ويقال خلا عيلة عنز^(١) الراس
اقفى وخلا عيلة له صغيرة

(١) عنز: أي زين نفسه ولا عليه من أحد.

والا فاننا يا ابوك قطاع الارماس
 منيب مثبور ورجلي قصيرة
 أصلك لو دونك نبا حمر الاطعاس
 الصلب والصمان دروب عسيرة
 مهالك مدارك مابها اوناس
 الا الثعل والبوم تسمع صفييره
 لاركب على وجناً من الهجن عرماس
 فجا النحر يا دباس حمراً ظهيرة
 متروسة الفخذين مزبورة الراس
 كن الخلاص عيونها يوم اديره
 والا كما ربدا تخفق للاوناس
 وان رفعت جناحها مستذيرة
 تنشر من العودة على وقت الانفاس
 عند العصر والليل مقفٍ مريره
 والعصر بالصمان تسمع لها اضراس
 حبل الرسن خاطر تبتر جريرة
 نهار ثالث بين حما والارواس
 وآره يمينك جعل لها لك سفيرة
 ثم ارتحل ساجية تقلب الراس
 تمشي باهلها فبالبحور الغزيرة

لمسكة الفيحاء بها الخير محتاس
 لولا البدع والبعد يا وي ديرة
 فيها الطبخ وراهي الخبز يا دباس
 يقعد خوي الراس خنة خميره
 هي ديرة اللي باغي كيفية الراس
 ولا له حد همه من الناس غيره
 هيس ولد هيس للاصحاف لحاس
 يفرح الي نيدي لذبح النخيرة
 وذا ماقف يادباس مافيه نوماس
 يصلح لقن مهنته طق زيره
 ترى الفداوي دون وانت انشد الناس
 راعيه ما يذكر بخير وغيره
 ماله سوا حذو الحنك منه والياس
 واليا انقطع خرجه فللاه ذخيرة
 طلب المعيشة بالحرارة والاجناس
 والمشتري والبيع يوصف وغيره
 قم وانهض العيرات مع كل فراس
 يا دباس دور خير تستشيريه
 جدك وعمانك هل العزم والباس
 اهل المكارم مكملين القصيرة

يا دباس ما يصبر على البق والحاس
 الا الذي ماله بنجد عشيرة
 واليوم يامروي شبا كل عباس
 يا مسندي لطام وجه المغيرة
 عشرين عام كلها ارجيك يادباس
 مثل الغرير الي تولع بطيره
 عدل المناكب هيلع فرخ قرناس
 يميناه في لطم الحباري شطيرة
 عاتق خلوج^(١) روحت عقب مرواس
 وقت العصير لييضها مستذيرة
 والليل جاه وحال من دونه الياس
 وروحه على فرقاه فرت فريرة
 يا دباس انا يا ابوك مانيب بلاس
 ميران عيلات الرفافة كثيرة
 جنبت وسط السوق وامشي مع الساس
 واخذ شوي الحق واترك كثيرة
 يا دباس لو روحت لي دحب الاكياس
 مختلفة ما بين زر ونيرة
 مالي بها يا جعلها بالف قباس
 يا جعلها تذهب ولو هي كثيرة

(١) الخلوج: هنا الحبارى الخائفة.

يا دباس قلبي كل ما هب نسناس
 شرقية هبت بقلبي سعيرة
 والحال يا فرز الوغا مسها الباس
 عليك يا ناطح وجيه المغيرة
 وغصون قلبي يا فتى الجود بباس
 غادي انا يا ابوك كني هشييرة
 من شافني يقول ذا فيه لساس
 واللي برا حالي الهي خبييره
 لا وعلى من قبل غوال الانفاس
 ومفارق الدنيا يجينا بشيره
 عسى يطق الباب والناس غطاس
 يا والي القدرة عليك تعبيره
 صلاة ربي عد ما هب نسناس
 على النبي عدة هبوب المثيرة

هذي هي القصيدة بالكامل اللي قالها الشاعر / راشد بن عبدالله دباس
 ارسلها لولده دباس في الغربة ، ويوم وصلت له تأسف غاية الاسف وتحسف على
 تفريطه من ناحية أبوه وهو يعرف انه ماله الا هو وغايب ثمان سنين عنه ، فتألم
 الولد وعزم يرجع وارسل قبل لا يرجع بعض الهدايا تخفف شوي من المعاناة
 وتمتص غضبه ، لكن الأب وطاحت به الامور وشيَّب جالس في هالديوانية شايب
 كبير ببشته وعنده البنات يراكضون حوله لكن ماش اذا جا السيل ما ياصل

لنخله ، الحاصل يوم وصلت القصيدة عند دباس رد دباس على طول قال
القصيدة وارسلها لابوه يقول فيها :

حي الجواب اللي لفانا من الراس
جابه غلام ما توانا مسيره
اهلا هلا به عد ما حبك قرطاس
او ما كتب به من بيوت شطيرة
جواب من هولتي مود من الناس
ابوي ما يوصف حلي لغيره
فرز الوغا كنه على الوكر جلاس
قروم ربعه كلها تستشيره
مهف الغنم لاهل الركائب والافراس
الى لفوا بيته عليهم قصيرة
راعي معاميل بها العبد جلاس
للبن يشري بالسنين العسيرة
هذي مراكبها وهذي بمحماس
وهذي يصبه للوجيه السفيرة
وخلاف ذا يا راكب فوق عرماس
مامونة من نقوة الهجن عيرة
حمرا وهي في سنها وقم الاسداس
بيضا ولا فاطر ولاهي صغيرة

ما هي لحوح راكبه بالعصا قاس
 حرم عليها غير شيل النجيرة
 والخرج هو بيوت جيل بقرطاس
 مع مزهب ايام ماهي بالكثيرة
 فوقه غلام منوته قطع الارماس
 لو هو بليل ما تغير نظيره
 والى وصلت الدار فاجهر بالاحساس
 وبلغ سلامي كل ذيك العشيرة
 واختص ابوي اللي نفل جملة الناس
 وخصه بعلم وقل تراني بشيرة
 لا يا نقي العرض يا ابوي لا باس
 ان كان تشكي الضيم فانا اسيره
 وان سايلك عني تراني بنوماس
 وانا احمد اللي ما توسلت غيره
 المدح لو يشرى شريناه باكياس
 وباموالنا نرخص ندور الستيرة
 مطرق فرنجي مضاربه الراس
 ومصلبخ جبته عساني ذخيرة
 ابغيه للي حادينك على الساس
 اهل النمايم والحكايا الكثيرة

ربع نووا فيك الردا والتخساس
 مهبول ياللي قال غايب عشيرة
 علي نذر لاودع الجمع ينحاس
 لين العشير يقوم يشتم عشيره
 يا ابوي انا ما رحمت ابي كيفه الراس
 مع ذا ولاني في سفاه وغيره
 اما سكنا الدار من غير هوجاس
 والا نعاف الدار وندور غيره
 كله لعين كلمة قلت يا دباس
 تشكي وانا دوني بحور غزيرة
 خذ لك يمين الشرع قطاع الانفاس
 انه فلا جتني علوم بصيرة
 لا مرسل جاني بحبر وقرطاس
 ايضا ولا جتني علوم سفيرة
 ان كان تشكي الضميم يا ابوي لا باس
 جاك الفرغ يا ابوي هو والبريرة
 والا فاننا يا ابوي قطاع الارماس
 اصبر على الشدة ولو هي عسيرة
 يا مسندي يا ابوي شوف اوكد الناس
 ثم انشده قل ويش هو في مسيره

ان كان ما يفرح صديقك بنوماس
 تحرم علينا اللي نهوده صغيرة
 مجمول مدلول زها زين الالباس
 هي بنت من يثني خلاف الكسيرة
 طار يقول اظهر وطار بجلاس
 قمت اشرب التباك واثره نكيرة
 ارجي عسى لي يبرد القلب يا ناس
 من لاهب هبت بقلبي سعيرة
 ومن كان له غايب فلا يقطع الياس
 ان يسر الله جاب علمه بشيره
 في ساعة اللي قلت والناس غطاس
 يا والي الدنيا عليك تعبيره
 وجدني عليكم وجد من باللقا قاس
 خلي طريح قدم وجه المغيرة
 او وجد من شوح لبلده ولا قاس
 بتيلهم بان الخلل في مسيرة
 صلاة ربي عدم ما هب نسناس
 على النبي عدة هبوب المثيرة

هذا رد الولد وعقب ما ارسل الرد مشى الولد ويقولون انه وصلهم في ليل
 ويوم وصل في الليل سبحان الله أبوه توقع انه بيجي ودايم الأبو يستحس ، ويوم

وصلهم والى والله طوارفه من اقاربه رادين السيل عن نخل ابوه وبدا يشتغل
الولد علشان يوصل السيل للنخل وصارت هوشه عند مدخل السيل للنخل
انتصر فيها دباس ودخل السيل على نخل ابوه وراحت وحدة من بنات الابو
تنادي ابوها ييه بيه السيل دخل علينا، لان ريحة السيل يوم جا شال قشاش
العشب والائل وبانت ريحة المطر وياخذون السراج ويوم طلع الى والله السيل
داخل عليهم، ويقول لبنته ناظري السيل يا بنتي قالت فيه اثر دم قال بس هذا
دباس وصل والى فعلا دباس جا. وهذا اللي سمعت يجوز يكون فيها خطأ او
نقص اوزود هذه الرواية هي اللي سمعتها من كبار السن من أهل ديرته
والله أعلم. والى لقاء آخر.



الصقر الجريح

السالفة الأخيرة في هذا الكتاب سالفة قصيدة للشاعر فهد بن عبد العزيز الفايز، جا يوم من الأيام سير على قريب له مبط ما شافه ويوم جا للبيت فتح الباب احد العيال قال وين ابوك قال رايح ويبي يجي هالحين تفضل ادخل تقهوه الين يجي حياك الله، والى منول ما فيه جوالات تسهل الاتصال قبل يسير الواحد ويشوف ظروف رفيقه تسمح بالزيارة والا لا او نه موجود والا طالع لأنه اليوم والحمد لله اللي سخر لنا الهاتف وخاصة الجوال ما يكلفك شي تتصل وتسال عن رفيقك، لأن بعض الناس الله يهديهم ما تدري الا وهو طاب عليك هو فاضي والى طرى له قال ابسير على فلان، طيب انت ماتدري عن رفيقك وظروفه يمكن انه في حال ما يبي يشوف احد اما وده ينام او مشغول بالبيت جدا ولا يبي احد يقطعه عن شغله او ان عنده احد الرجال اللي هو واياه عندهم سالفة خاصة وما اشبه ذلك، الحاصل ان الشاعر فهد الفايز دخل والى بالمجلس ولد الرجال رفيقه اكبر العيال متزوج وله ولد اسمه فهد، ابو فهد هذا قاعد يعالج له فرخ قرناس وفهد يشوف الدم يسيل من جناح الصقر، هاه قال خير يا ابو فهد سلامات وشبهه هالطير الزين وش حاصل له قال ابد والله رحنا انا وربيع لي نترمي رحنا لمكان بعيد بالحيل جبال شاهقة وهي محل طيور وشفنا لنا هالطير ورميته بالبندق وصوبته وانا اعالجه هالحين مثل ما تشوف .

هاه فهد الفايز رجال شاعر ويعرف ان الصقر ما يصاد بالبندق انما يشبك او بطريقة

ثانية اهل الطيور يعرفونها، هالمنظر والقصة هيضت الشاعر وقال القصيدة التالية:

الا يالله عليك الاتكالي
 وذكرك بادي في كل حالي
 ابجيب القلم بالحال واكتب
 واهيض من ضميري ما طرالي
 الا يا بو فهد جاوب وعجل
 الى مني نشدتك عن سوالي
 وش اللي صار للضيف المبرقع
 صويب طاح ما ينساه بالي
 حبس البيت من عقب الشواهي
 رماه اللي يثور ما يبالي
 رماه بندقه والله حسيبه
 يحسب انه على قربه قحالي
 والى دمه على الريش متثر
 عسى ما هوب فال لك وفالي
 عطيب الجرح ما ينهض جناحه
 يا كيف الحر يرمى بالمفالي
 يبي يكفخ ولكن ماش قو
 ولا له مقدرية واحتيايالي
 تذكر كل يوم فيه رفر
 يحوم ويدرج بين الحبالي

وجاه اللي رماه وصاح صيدة
 وجابه صوغه للبيت تالي
 وقعد في مريضه يسحب جناحه
 على شوف الهوا ياهملاي
 الا يا بو فهد عطنا الصراحة
 وعمر الحي اخيره للزوالي
 لنا مدة طويلة ما سمعنا
 عن اخباره ولا جاله مجالي
 اخاف انك شويته ما تعرفه
 على ما قيل بامثال الرجالي
 افدنا بالسنافي هات علمك
 ولا تزعل علينا وانت غالي
 ترا المقصد نبي نضحك ونمزح
 معك والا انت اعدك من عيالي
 وصلاة الله مني والسلام
 على الهاد البشير اول وتالي

هذي سالفه الصقر الجريح اللي صورها الشاعر فهد الفايز اجمل تصوير
 وعرفت بعدين ان الطير مات وارتاح الصايد والمصيود .

وللشاعر فهد الفايز كثير من القصايد الهزلية منها انه مرة راح هو وولده
 يدورون سيارة يبي يشتريها وكل ما دخل معرض او مشى بين المعارض شاف

صورته وهو كن بطنه شوي كبير زايد وزنه ولا جاز له منظر بطنه وده انه اصغر شوي وهو قد عاهد نفسه انه يسوي حمية و تمارين لكن يمكن انه ما استمر على الرياضة والحمية ، وهو قد شاف بالتليفزيون مطربة مشهورة يسمونها ننسي عجرم اظن والا انا مالي بهالسوالف لكن نشدته وش ننسي هذي وعلمني انها مطربة يقول ان لها خصر دقاق وسع قفل السيكل مالها بطن ، وبعد قد مر على عمارة الفيصلية ومعجبه زينها وتصميمها ماهوب سهل ، الحاصل عاد يوم انه شاف صورته بالقزازه قال الايات التالية :

وانا امشي شفت بطني بالمرآية
 وفجعتني منظر زودّ عنايه
 الى جيت اصفة لاقول وصفه
 مثل بالون حقين الدعاية
 ومثل حامل جنين بتسعة اشهر
 يبين ولا تخفيه العباية
 لو انه بالذهب مليان كله
 شريت الفيصلية من غنايه
 ولكنه واكرم كل سامع
 والسبب
 تعبت ولا قدرت اقضي عليه
 الا يا ناس وين القى دوايه

الا يا ناس من يفرزع الحالي
 ترا صبري وصل حد النهاية
 الى قيل امش واهتم برياضة
 مشيت الفين لكن ماش غاية
 والى قالوا قليل الاكل يكفي
 اذوق من الغدا واترك عشايه
 الا ياليت بطني مثل ننسي
 لها خصر كما راع الرواية
 بعد ما شاف ما خلاه يدعي
 الا يا عقاب هذا من بلايه
 يعنك ان التمني ما يفيد
 ومن ذي عساته زراع طاية
 الا يا صاحبي بشكي عليك
 ودقق يا الخوي باصل الحكاية
 حيث انك لمشكلتي طبيب
 وسمعت من البداية للنهاية



احد عشاہ القرص ومفتح الحيل

كان الشاعر/ رشيد بن زيد الكثيري رحمه الله عايش في نخله في بلده (الحريق) وهو أحد اعيان قبيلة الكثران ورجل شهم وكريم وشجاع وراعي فضل على الآخرين وكان في نخله المسمى الرقيصيه له مضيف يكرم العاني والضيف والطرقي والجار وصاحب الحاجه ومعروف بين أهل ديرته وعلم من اعلام زمانه رحمه الله .

ولكن بعض المرات تمر على الانسان ظروف صعبه ما يقدر يكيف نفسه معها الحاصل أنه مرت عليه فتره شح الزمان وغربله الدهر فتقطعت معاويده اي أبله التي يصدر عليها في نخله (الرقيصيه) وقل الماء واجدبت قلبان النخل عموم والثمره في ذلك الوقت مقبلت على غايتها الحاصل انها ضعفت سوانيه وقل الماء ولا عاد يستطيع الصدر على السانیه . فضاقت صدره بالحيل وهو من الرجال المتعطفين اللي ما يببي احد يدري عنه إذا حل به أمر مثل هذا يكتم في صدره ولا بين عليه للناس شي كنه غني كما أنه له نفس عالية لا يرضى بالخنوع او الشحذه أو يمد يده للناس مهما كانت ظروفه . وفي احد الليالي الصيف وهو في سطح بيته اللي في وسط النخل دايم البيت اللي يصير في وسط نخل يسمونه الاولين قصر . سمع صوت بعض السواني من النخيل اللي حول نخله في الحريق يسنون ما عندهم خلاف - يعني عندهم ماء في نخيلهم وهو ما عنده فتأثر من وضعه اللي هو فيه . ويتعجب من تدبير الله سبحانه في خلقه وارزاقهم ويقول قصيده يطلب الله سبحانه فيها الغيث لبلاده الحريق وان تحيا الغروس والنخيل المضاليل

التي زرعوها أهلها من أجل الجار والضيف العاني الذين اذا تاهوا فالصحاري
وأفوا علينا نبذل لهم الموجود عندنا مما نتعب عليه ونكد من اجله من محصولنا
من التمر والعيش والذي لا نبخل به عليهم ابدأ وكذلك مما نشترى لهم من القهوة
والهيل وغيره ونقوم بتحضيره لهم في معاميل القهوة التي هي رمز الرجولة أمام
الضيوف الهاشليين يعني اللي يلفون عليهم بعض المرات في ليالي الشتاء القارصة .

كما يذكر في معنى القصيدة أننا نصبر على مرّ الدهر وحلوه اذا بلينا ولكن
لله في ذلك شؤون فيطلب من الله سبحانه بان يعدلها عن الضلع والميل لأن
الناس ما هوب واحد في مستواهم المعيشي فيقول أحد عشا قرص البر اللذيذ مع
مفاتيح اللحم الحيل واحد لا عصيده فقط (الذره مع الدخن) الذي يحر الكبد
ولا بد من شرب الماء بكثره وراه واحد يلاعب زوجته الفتاة الصغيرة واحد ما
عنده الا عجوز يابسه يذوق منها الويل يقول في القصيدة رحمه الله .

أرجيك ربي صادقات المخايل

نعم شعبان الحريق ومجره

تسقي لنا هذب الغروس المضاليل

اللي بها للجار حق ومبره

فالليل لا جونا ضيوف مهاشيل

نبذل لهم مجهودنا لونا نظره

ندق نجر بين سمر المعاميل

لو كان ما بالجيب مثقال ذره

نصبر على ضيم الدهر والغرايل
الى تبلنا كـفـالـله شره
الله يعدلها عن الضلع والميل
ولا يميلها على الناس مره
احد عشاها القرص ومفتح الحيل
واحد عصيد يلعط الكبد حره
واحد يلاعب لابسات الخلايل
وأنا عجوز ذقت منها المضره

هذه هي سالت رشيد بن زيد الكثيري رحمه الله وقد رواها لي الأخ الكريم
الفاضل ابن عمه العمده في حي السويدى بالرياض راشد بن محمد الكثيري في
٢٨ / ٩ / ١٤٢٦ هـ.

حيث اوضح القصيدة لان فيها تداخل في القافية مع قصيدة لشاعر من اهل
الشمال اسمه / خضير الصعيليك الشمري اللي مطلعها:

البارحه يا شعيل يا حيل ابا حيل
النوم عن عين المخاليق فره
وسلامة الجميع .



الغويش اليتاما

الشاعر/ محمد بن مسلم اصله من أهل حوطة بني تميم عاش في الإحساء ومات فيها عام ١٢٨٠هـ رحمه الله تزوج في شبابه بامرأة عاقله رزينه ساعدته على مشاق الحياة وصبرت واحتسبت وهي تتقاسم معه شقاء العيش عاشت معه أربعة عشر عام كأنها عنده أربعة عشر يوم من عمق محبة لها وعمق انسجامها معه وتوافق طبيعتهما انجبت له أبناء وبنات متتالين في أعمارهم حيث كانوا مثل الغوش (الغوش في المفهوم الشعبي) الأبناء الصغار السن الذين يكون عددهم عادة أقل من الستة في العدد.

زوجته توفاهها الله سبحانه بعد مرض عضال في ثاني أيام رمضان وقد كان رحمه الله لم يذخر في سبيل علاجها شي ولكن قدره الله سبحانه فوق كل شيء فحزن لفراقها حزن شديد وكثر انينه وسالت دموعه مرات عديدة فنظم قصيدة عصماء في رثائها أخذت ترددها الرواة والمهتمين لقوتها ومصداقيتها ولما ما فيها من المعاناة التي تحملها الشاعر ابن مسلم في فراق زوجته وشريكة حياة طوال ١٤ عام تطرق في القصيدة لسيرتها الحسنة وذكر ما حسن به من الفراق والآلام وكثر الدعاء لها بالرحمة والمغفرة من الله سبحانه ودعاء بان ينبت على قبرها بعد المطر الزهور من البختري والنفل والخزما وبين بان جيرانها في البيوت حزنوا لفقدتها وذكر معاناته إذا أبنائها اليتاما وهم يبكون وخوفه عليهم من يتيهون في السكة والامكان من الهيام عليها.

وان مشكلة التي يعاني منها بعد وفاتها هو أنها أصعب من لو كان يريد الزواج وهو شاب فالآن أصبحت أعظم لأنه عارف أنه يتعب ما راح يلقي الزوجه

التي تصبر على ابنائه الصغار الآن بعد وفاة والدتهم من يقبل بهم وتربيتهم وملاحظتهم وهم كلهم صغار سن ويخشى أيضاً أن يتزوج بواحدة تكون أمامه صالحة وفي غيابه طالحة فلما يقولون له ربه تزوج الحرمة بدالها حرمة ما يطيع يقول أبي حرمة فيها خوف من الله تلاحظ عيالي قبل ما تلاحظني أنا يخاف من وحده تزجر عياله بالهوش وهو تجرعه الغيظ والمركلها هذه الصفات ذكر في قصيدة التي رثاء بها زوجته .

والتي طبعت في أولكتاب ظهر في نجد عام ١٣٧١هـ (خيار ما يلتقط من شعر النبط) لمؤلفه عبدالله بن خالد الحاتم وقد ذكر في هذا الإصدار اثني عشر قصيدة لمحمد بن مسلم رحمه الله وكذلك ذكرت في المخطوطات القديمة التي بعضها لم يطبع وهي معروفة لدى الكثير من الرواة الثقات .

وقد أخطاء من نسبها للشاعر / نمر ابن عدوان لكون نمر عاش في البلقاء ديرة بني صخر فالشام وقد توفي عام ١٣٠٠هـ وقد رثاء زوجته وضحاء السبيله التي قتلها هو بالخطاء وهي تربط الفرس ورثاها بحوالي ستة عشر قصيدة ليس هو في حاجة أن يأخذ قصيدة ابن مسلم وقد طبع عن نمر ، الاستاذ/ روكس العزيري كتاب عن حياته واشعاره ولم يذكر هذه القصيدة فيه وكذلك واحد آخر من العدوان لم يذكر أيضاً ثم أن اللهجة تختلف والطبيعة هذا طبيعة بدوية وابن مسلم عايش بين الحضرم في مدينة الاحساء لأنه يقول في أحد البيوت والله يالولاءها لبزور اليتاما واخش من (السكه عليهم يضيعون) يعني ان عيالها كثيرين ويخشاء عليهم أما زوجة الشاعر / نمر بن عدوان لم تأت إلا بعقاب وسلطان وذاكرهم هو في أحد قصايدده اللي قالها في رثاء وضحاء السبيله :-

أما الشاعر/ محمد بن مسلم فقد قال في رثاء زوجته :

البارحه يوم الخلاق نياما
 بيحت من كثر البكأ كل مكنون
 قمت اتوجد وانثر الما على ما
 من موق عيني دمعها كان مخزون
 لي وبتن من سمعها ما يناما
 كنى صويب بين الاضلاع مطعون
 والا كما ونت كسير السلاما (١)
 خلوه ربعه للمعادين مديون
 في ساعتِ قل الرجا والمحاما
 فيما يطالع يومهم عنه يجفون
 والا فونت راعي الحماما
 غاد ذكرها والقوانين يرمون
 تسمع لها بين الجريد انحطاما
 من نوحها تدعى الحمائم ينوحون
 والا خلوج سايفه للهياما
 على حوار ضايح في ضحا الكون
 والا حوار نشقوا له اشماما
 وهي تطالع يوم جروه بعيون

(١) السلاما: عظام اليد.

يردون مثله والظوامي احياما
 ترزموا معها وقاموا يحنون
 والا رضيع جزعوه الفطاما
 أمه غدت قبل اربعينه يتمون
 عليك ياللي شرب كاس الحماما
 صرف بتقدير من الله مازون
 جاه القضا من بعد شهر الصياما
 صافي الجبين ابثاني العيد مدفون
 حطوا عليه من الخرق ثوب خاما
 وقاموا عليه من الترايب يهلون
 راحوا بها حروة صلاة اليماما
 عند الدفن دعا لها الله ويدعون
 برضاه ولجنة وحسن الختاما
 وادموع عيني فوق خدي يهلون
 حطوه في قبر عساه الهياما
 في مهمه من عزب الأموات مسكون
 يا حفرة يسقي نزاه الغماما
 مزن من الرحمة عليها يصبون
 جعل البختري والنفل والخزاما
 ينبت على قبر دفن فيه مصيون

مرحوم ياللي ما مشأ بالملاما
 جيران بيته راح ما منه يشكون
 واوسع عذري وان هجرت المناما
 ورافقت من عقب العقل كل مجنون
 من طيب خيم إلى ذكرته بلاما
 ومحاسن ما عنهن الناس يدرون
 أخذت أنا وياه سبعة أعواماً
 مع مثلهن في كيفية ما لها لون
 والله كنهه يا عرب صرف عاماً
 يا عوننة الله صرف الأيام هالون
 وأكبر همومني من غويش يتاما^(١)
 وان شفتهم قدام وجهي ييكون
 وان قلت لا تبكون قالوا علاما
 نبكي ويكي مثلنا كل محزون
 قلت السبب تبكون قالوا يتاما
 قلت اليتم اياي وأنتم تسجون^(٢)
 مع العيال وكل جرح يلاما
 إلا جروح بخاطري ما يطيبون

(١) غويش: الأولاد الصغار.

(٢) تسجون: تسون.

جرحى فنيح مثل كسر السلاما
 إلى عثم^(١) عنه الطبايب يعجزون
 قمت اتشكا عند ربع عداما
 وجوني على فرقا خليلي يعزون
 قالوا تجوز وأنسّ لامه بلاما
 بعض العذارا عن بعضهن يسدون
 قلت أنها لي وافقت بالولاما
 ولو بقا ثلثينهم ما يسدون
 وأخاف أنا من غاديات الذماما
 اللي على ضيم الدهر ما يتاقون
 أو خبلت ما عقلها بالتماما
 تضحك وهي تلدغ على الكبد بالهون
 توذى عياي بالنهر^(٢) والكلاما
 وأنا تجرعني من المر بصحون
 والله يلولا هالغويش اليتاما
 واخشاء من السكه عليهم يضيعون
 لا قول كل البيض عقبه حراما
 واصبر كما يصبر على الحبس مسجون

(١) عثم: إذا تعفن.

(٢) النهر: أي دايم تنهرهم وتهوش عليهم.

عليه مني كل يوم سلاما
عدة زها الوارد حجيج يلبون

وصلوا على سيد جميع الاناما
على النبي يللي حضرتوا تصلون

واشتهرت هذه القصيدة بعد وفاة ابن مسلم شهرة واسعة وأصبحت تغنا في
السامري لجودتها وصدق تعبيرها وتأثيرها في قلوب الناس وفالسنوات الأخيرة
حصل أن حرفتها بعض الرويات الخاطئة من قائلها الأصلي وهو كما ذكرت
الشاعر / محمد بن مسلم من أهل الإحساء رحمه الله .



السيرة الذاتية للراوي:

محمد بن علي بن شرهان من مواليد عام ١٩٤٩م في روضة سدير بالمملكة العربية السعودية - له أولاد وبنات، وأبناؤه/ خالد ثم أحمد وسعد وعبدالله.

محمد حصل على شهادة الثانوية العامة - القسم الأدبي عام ١٣٨٨هـ بالرياض، لديه اطلاع واسع وثقافة عالية في مجال الأدب الشعبي وبالأخص القديم، وخبرته طويلة في هذا المجال.

محمد يعد محمد الشرهان من أشهر الرواة للأدب الشعبي في الجزيرة العربية والخليج، وذلك بشهادة عدد كبير من أساتذة الفكر والمعرفة والكتاب البارزين في الصحافة العربية وقد كُتب عنه الشيء الكثير.

محمد صاحب مشاركة مستمرة برواياته الممتعة وأسلوبه الجذاب من خلال طرحه للسالفة والقصيدة من خلال وسائل الإعلام المسموعة والمرئية في القنوات التلفزيونية المتعددة.

محمد شارك في عدد من الملتقيات الأدبية بدبي وأبو ظبي وقطر والكويت وصوت العرب وفي ليبيا والجزائر وإيران وكانت مشاركته متميزة في ملتقى ابن لعبون في الكويت عام ١٩٩٧م.

محمد يتميز الراوي محمد الشرهان عن غيره من الرواة بحفظه للأشعار القديمة والجديدة، وحسن إلقائه للشعر وطرحه للمشاهد بالحركة وكل تعابير الوصف الممتع، وكأنك ترى فيلماً مصوراً أمامك.

محمد وثق اللهجة النجدية في الخليج في تسجيله لعدد ٩٦ حلقة من برنامج الراوي من خلال محطة قطر الفضائية خلال شهر رمضان المبارك مدة ثلاث سنوات.

✍️ عضو في الجمعية العربية السعودية للثقافة والفنون منذ عام ١٤٠٢هـ، وشارك فيها بعدة أمسيات أدبية شعبية، وكذلك في مهرجان الجنادرية السنوي.

✍️ شارك في عضوية لجنة التحكيم التي قامت بدراسة قصائد الردود على قصيدة لغز سمو الشيخ/ محمد بن راشد آل مكتوم مدة عامين ١٩٩٤ - ١٩٩٥م.

✍️ حصل على شهادة شكر وتقدير من سمو ولي العهد في عام ٢٠٠٢م وذلك لساهمته في حفظ المصادر التاريخية الوطنية، ودعم جهود دارة الملك عبدالعزيز - رحمه الله - في هذا المجال.

✍️ تشرف بخدمة حكومة بلده مدة ٢٤ سنة منها عشر في جهاز الحرس الوطني والباقي في وزارة المالية وتقاعد مبكراً عام ١٤٢١هـ ليتفرغ للأعمال الأدبية الشعبية خلال وسائل الإعلام.

✍️ ألف ثلاثة أجزاء من كتاب سالفة وقصيدة، كل جزء يحتوي على عدد (٣٢) سالفة وقصيدة وموجود بالمكتبات.

✍️ له في الأسواق حوالي ثمانية عشر شريط كاسيت بصوته ورواياته الجميلة التي لا تخلو منها سيارة أي مسافر لما فيها من المتعة والتسلية والفائدة.

✍️ يحظى بقبول واسع عند الناس على مختلف طبقاتهم؛ لما يطرحه من مواضيع أدبية شعبية لا تثير حساسية أحد من الناحية القبلية والأصول أو الدين.

✍️ يشارك الآن في إعداد وتقديم برنامج الخيمة الشعبية الذي يقدم من إذاعة الرياض كل يوم خميس، وكذلك المشاركة في برامج شعبية أخرى.

obeikandi.com

